

Erithondekana Kyinya-masako erya Amakanisa wa Kristo

**Bisakiirwe
JIM MASSEY**

**Byamabindulhwa omo Lhukonzo
na Mbusa Benard
Omuthuuliiri w'ekanisa ya Kristo -
Kidodo, Kasese Town P.O. 462, Kasese
Tel.: +256774403285**

© Copyright, 1985 - WORLD EVANGELISM PUBLICATIONS

This printing, 6000 copies, 2023 - **Lhukonzo**

InDesign Layout - Shane Fisher

Funded by:
World Evangelism Publications
Winona, MS

ERY'ENGEHULHA

Ukakokiibawa oko by'eryigha by'endondekania y'amakanisa wa Kristo. Ekyi niky'eryigha kyikulhu. Biblia yiwithe bingyi ebyo yikakanaya oko ky'eryigha ekyi.

Obuli ky'eryigha kyiwithe ebihandi bisathu; (1) Endondekania y'ekyerigha (yiri omo bikuuh), (2) Omwatsi omunene kutse erikania oko ky'eryigha omo bughali bwakyo, na (3) Ebiibuulyo okw'iluma eky'eryigha ekyosi.

Abakangiiriya bakatholera ibakolesya omusiindo w'erikangiiriyyamo ibakakolesaya eribuulya abiyyi. Esyonzumwa nyike-nyike silhusiibawe omo ndondekania, esyanzumwa esi sikatholera esyasoboliibwa ndeke, nguma oko nguma. Ekyi kyikathokekana omukangirirya amasangwa oko nzuuko inyabiri soma n'eriminya ndeke omwatsi owali omo kyihande eky'ahakathi ekyinene omo kyittabu kyino. Neryo emilhalha eyitsuukire ekyittabu kyino yamabiri-yyiithendibw'ako ndeke, esyonzumwa esirimo sikatholera isyakangiiriibwa erikolesya omusiindo ow'ebibuulyo kutse erisubiriramo ngendo nyinyi n'abathendekwa aboosi abali omo kyithunga ekyiri okwithendekero.

Eriyibegherya libuya omwisubirira omo nzumwa esi kyikendithokesya abathendekwa ibabya n'eryiikalha ibaniibuukire emyatsi eyoosi eyiryabakan-giriribawa.

Ebiibuulyo ebiri oko muhiindo bikatholera ibyasoboliibwa omo mii-siindo minene: (1) Obuli muthendekwa anganasuubirira mubylo athalyiingira omo kyithunga akasa okw'ithendekero. (2) Omukangiiriya inyabuulya inyamabiriminya athi abathendekwa biwe babirihamba ndeke ebyalyabakangiiriaya. Kutse (3) Omuthendekwa anganabuuliibwa erisakanga eby'erisuubirya byiwe endambi eky'eryigha kyabirikaniibwako nde-

ke omo kyithunga ky'abathendekwa. Abakangiirya banganayisombolera ngani musiindo wahi owa bakendi-kolesya omo misiindo isathu eyi kutse ib-abindu-liikania ebibuulyo.

Abathendekwa bakatholera ibakolesya esya Biblia syabu ibathoka eriyisomera n'eriminya ndeke obuli mulhondo owathondirwe omo. Wibuke ghuthi Biblia nyisa yu buthokyi omo makanisa wa Kristo. Ekyittabu eky'erikangiri-riry'amo ekyi kyiriho busana n'erikuulholerya oko ngangiiriirya ye Biblia kyisa, ahabwa obw'embembethya bw'ekanisa.

Ekyitabu kyino kyanganakolesiibwa omo mathendekero kutse busana n'eriyikangiriirya ly'omundu iyuwene-wene inyane eka ewiwe. Kyiriho busana n'abikiiriirya b'ekanisa kutse n'abathe banyakanisa. Okwabo abakakolesaya eby'erigha ebi bayithendaye omwisaba busana na Nyamuhanga eriba-hererya amenge. Yesu mwabuugha, "mwasyaminya okwenene, n'okwenene kwasyabayir'amo ba bwiranda" (Yoh. 8:32). Omusaki.

ENGUUNUULHO

Ngabiriminya Jim Massey ahabw'ebirimo bingyi. Enzumwa yiri yithi abya mukangiriirya waghe ow'eGuriki omughulhu nabya ngasoma okw'ithendekero likulhu lya Alabama Christian College eMontgomery, Alabama, USA. Eriihwa omughulhu oyo. Abiriyihighulha ng'omuthuuli w'engulhu omo Nigeria na Trinidad. Ahokathi aho, mwathasya kangiriirya oko Lubbock Christian College n'e Sunset School of Preaching, Lubbock, Texas, USA, lino akakangiiriiraya oko International Bible College of Florence, Alabama, USA.

Abiri-kolera omo mibiiri yithe ya muthiina mug huma omo miibiiri y'ekanisa, kandi n'eribya isihali bisakango ebihambire oko by'eryigha bingyi busana n'erikolha omubiiri, ebiyitsutsirwe kutsibu, neryo mwasuubira erikolha omubiiri ow'erisakanga. Busana nekyo, ebrisakango byiwe bikasangawa omo ngonde nene sy'ekyihugho n'erikolesiibwa okwithokesya ndeke. Kyino kyo kyitabu ky'erimbeere ekyo thwamathasaka n'erikolhamo kyitabu hano omo India, neryo Mughalha wethu Jassey iyo musaki wakyo, niikwa ngawithe amaha nyithi abandi bakendikwam'oko. Thukamuhereraya ewasiingga busana n'erithokesya omubiiri oyu eribya embeere syethu kandi thubuyahirwe thuthi omubiiri oyu akendikolha ndeke kutsibu.

Ngoko ekanisa yikyine nyirere omo India, kandi yikyine omo nzuko y'erikulha-kulhana n'erihiika oko lhulengo olhukuulire kinya-mulii mu, ekyitabu kyino kyanganana kolha mubiiri munene omubuya ngoko kyikatheka omuuuhwa omo baliikyethu erithoka erikwama amasako omo mithondekere

y'ekanisa. Enzumwa ngulhu siyiri oko ebyo abandu bakayitheker'aho, niikwa oko ebyo ebikaalhwa oko Mukama. Busana n'ekyo, eribya Kanisa ya Kristo, thukatholera erikwama akalikyi-rikyi ka kinya-muliimu. Endambi iyane nguma, ekyitabu kyino kyikendibya kyibuya n'oko balikyethu banya-kanisa bathoke eribya isikwamisamalira emithondekere y'ekanisa, niikwa kyikendi-bawathikya erilhangira ngoko emithondekere y'ekanisa yithasosire ngoko yitholere erisosa erikwamana n'erikangirirya eriri omo Biblia. Omundu am-abirilhangira engabane, kwenene akendiyisuunza erikwama emithondekere y'omukama.

Ngabasaba erisoma n'eryigha ebindu ebyosi ebiri omo kyitabu kyino iwunawithe oko Biblia. Kwenene, omusaki akagheraya erikulholerya oko mu-biiri w'omukama, wangathoka erilhangira ghuthi ebi byobika-kangiriribawa oko ky'eryigha ekyi. Oko muhiindo w'obuli ky'eryigha ghukendisang'aho ebibuulyo, bikendikuwathikya erikamathya esyonzumwa ngulhu-ngulhu. N'okweryo kyangakolesiibwa ng'erikangiri-ribwa iwune eka kutse ekyitabu ky'erikangiri-ribw'amo omo kyithunga eky'eriithendekero ly'e Biblia.

Nokweryo ngatsemire ingabengehulha oko kyitabu ekyi kandi ngasaba indi kyithoke erikolesiibwa ehosi-hosi. Byamabya bithya kyikendikolha muu-biiri munene.

J.C. Choate
New Delhi,
Feb. 29, 1980.

EBIRI OMO KYITABU

Eky'eryigha 1: Obuthokyi bwethu ni bwahi omo Kanisa?	6
Eky'eryigha 2: Busana nakyi thukangiiriiibwa emithondekere y'ekanisa?	8
Eky'eryigha 3: Esyonzumwa esy'eritsuukirako omo mithondekere y'ekanisa	11
Eky'eryigha 4: Ekanisa ni kyi?	13
Eky'eryigha 5: Ekanisa eyoswire ni kyi?	16
Eky'eryigha 6: Ekanisa eyoswire yikathondekawa yithi?	17
Eky'eryigha 7: Ekanisa yithondekire yithi oko Kyihugho	19
Eky'eryigha 8: Ababya bakwenda na Abaminyereeri ni bahi?	22
Eky'eryigha 9: Obuli kanisa yikathondekawa yithi?	25
Eky'eryigha 10: Amakanisa awali omo bipindi-bipindi by'ekyihugho	

akayithabalh'ako athi?	27
Eky'eryigha 11: Nyamuhanga anzire amakanisa inyayithabalh'ako?	30
Eky'eryigha 12: Ekanisa yisunzikenie yithi n'obuthabali bw'egavumente?	33
Eky'eryigha 13: Busana nakyi abandu bakakwama abasondoli babu?	35
Eky'eryigha 14: Busana nakyi eby'erilhangirir'ako ni kyikulhu omo kanisa?	37
Eky'eryigha 15: Ni bahi omo kanisa bo ky'erilhangirir'ako?	40
Eky'eryigha 16: Busana nakyi hali ebitsumbi omo miibiiri y'ekanisa?	43
Eky'eryigha 17: Amena w'abakulhu ni wahi?	46
Eky'eryigha 18: Busana nakyi omugulhu omunene ekyiinywa "abakulhu" kikakengawa nabi?	48
Eky'eryigha 19: Ngoko amadini akalibathanganaya egavumente.....	51
Eky'eryigha 20: Ngoko ekanisa ya Kristo yangana libathangania obw'embembethya bw'ekanisa	53
Eky'eryigha 21: Ni misiindo yahi ey'erihiindan'amo wamasuu- nziikaniayo n'engulhakulhana yayo omwi- thondekana lyayo?.....	57
Eky'eryigha 22: Ebikaleka abandu ibatholera eribya Bakulhu (i)	59
Eky'eryigha 23: Ebikaleka abandu ibatholera eribya Bakulhu (ii)	62
Eky'eryigha 24: Ebikaleka abandu ibatholera eribya Bakulhu (iii)	66
Eky'eryigha 25: Ebikaleka abandu ibatholera eribya Bakulhu (iv)	69
Eky'eryigha 26: Ebikaleka abawathiikya ibabya bawathiikya hayiima n'emiibiiri yabo	73
Eky'eryigha 27: Ab'embembethya ngoko bathatholere erisomboolhwa erikolesya obuuthuuli	76
Eky'eryigha 28: Ngoko Muliimu Abuyirire yukakolha abakulhu	79
Eky'eryigha 29: Nyamuhanga yukahereraya olhukwamirwa oko Bakulhu	83
Eky'eryigha 30: Obuminyikalho bw'obubi omo mithondekere y'ekanisa	87
Eky'eryigha 31: Ngoko obw'embembethya bw'ekanisa bwasamo obulibathangania.....	91
Eky'eryigha 32: Ngoko wang'embembethya endeko y'ekanisa	95

EKY'ERYIGHA 1

OBUTHOKYI BWETHU NI BWAHI OMO ITHONDEKANA LY'EKANISA?

Emithwe Yomo Ky'eryigha

1. Isibyo ebisosire nganibyo birengire omo bubuya.
2. Isibyo eby'abandi bakakolha.
3. Endaghano nyiihya-nyiihya nyisa.

ERIGHANIIRYA KUBYO

1. Isibyo ebikasosa nganibyo birengire omo bubuya. Obuli ky'eryigha ki-katholera ikyabya ikyinawithe olhulengo lhulebe olhw'obuthoky. Ebibuulyo ebyosi bikatholera ibyabya ibinawithe eby'erisubiry. Hakatholera ihabya ihane obuthoky, obo abandu bosi bangawkama eribya ba kwenene. Ngoko ebithuka-kanayako ni bindu bihambire oko dini, lino thukabuulhaya, “obuthoky bwethu ni bwahi omwithendekwa oko mithondere y'ekanisa? Ni lhulengo lhwahi olhuthukendikolesya thwangathoka eryikiiriirya ndeke thuthi ebiibuulyo bikendisubwamo omw'isuubiry ery'okwenene?” Abandi baki-di buugha bathi obuli mundu niw'eriysiombolera ekyakalenge-kanaya athi kyihikiire omo dini. “Ukwamikolha ekyoghukalhangira uthi ky'ekyiwene,” abandu abo bakabuugha bathi, “obuli mundu iyo y'olhulengo lwiwe. Ukwame endekathea yosi eyikakolha ndeke.” N'abandi bakabuugha bathi emikolere yabu yoyikakolha ndeke kulengererya. Niikwa obulengekania bw'abandu sibwo bw'eriseghemerako. Sithwangaminya okwenene okw'erithabuulya okwebyo ebyikathusosera ngabyuwene embere syethu.

2. Isibyo abandi bakakolha. Obwikiiriirya obw'akabiri omo myatsi y'obuthoky omo kyisomo buli buthi, ebyo abandu abanene bakakolha bikatholera eribya iby'ebihikire. Abo abiikiiriraya omo ndekathea omo kihano kirebe eky'ekanisa bakathuulhagho ngani bandu bangahi abakwamire emitheghekere eyo kutse emikolere eyo ngayamabirighunza mughulhu mangahi iyinemukolesiibwa. Niikwa obu ni bundi bulengekania obuthere omo myatsi y'obuthoky omo kanisa. Obulengekania bw'abandu abanene sibw'eriyikethera kokyine nibya ng'obw'omundu omughuma. Yesu mwabuugha athi abandu abanene bakaghaniraya bathi bali oko kwenene, athi niikwa syabasi (Matt.7:13, 14). Abanya Israel mubanza erithunga omwami ambu bangathoka eribya ng'awandi mami awabya abathimbireko. Niikwa omw'iyiisunza eribya ng'abandi, babya ibamaghana endekathea ya Nyamuhanga ey'erisondolha abandu biwe. (I Sam. 8:5-7). Ekanisa yikatholera eribya isiyirisamalira

oko bandu abathimbire kuyo yithi nayo yibye ngibo. Ekanisa ni kyithuunga ekyibirikirwe eriilhwa omo kyihugho (II Kor. 6:17). Ni bandu abasombwerwe (I Pet. 2:9). Obuliiba-thangania (obuuliba-libania) obunene obukingira omo mithondekere y'ekanisa y'Omukama bukingira busana n'obulhuhe bw'abiki-riiry a kayakisuunza eribya ng'ebindi bisomo ebibathimbireko. Bakayira eryanza libi omo mitheka-thekere n'emikolere ey'abandu abanene bakakwama. Niikwa ebindu eby'abandi bakakolha sibyo lhulengo lhwa Nyamuhanga ol-hw'okwenene.

3. Endaghano nyihya-nyihya nyisa. Endaghano nyihya-nyihya nyisa, y'olhulengo olhw'okwenene busana n'ekisomo. Sihali Katekisimu, ekyitabu ky'emisabe y'abandu boosi, kutse eby'erisubiriramo ghuthi biwithe buthoki omo kisomo eyihi. Yesu musa yuwithe obuthoky i obwoosi omo Lhubulha kandi n'omokyihugho (Matt. 28:18). Mwahererya Omuliimu Abughiriire busana n'erisondolha abakwenda biwe omo kwenene okwosi (Yohana 16:13). Nokweryo, ebisakirwe omo masako biriko Omuliimu wa Nyamuhanga kandi bihikene omwibuyirira ly'omukristo wosi (II Tim. 3:16,17). Abandu butsira bakathomeker'ako kutse erilhuusyako omo Kitabu kya Nyamuhanga (Erib. 22:18, 19). Aboosi bakatholera erighendera okw'ikangiiriiry a Yesu niikwa isibaghenda kwilhaba lhulengo embeere sy'erithuulhagho a Yesu. (II Yohana 9,10). Abandu isibabindulha kutse erikyiithya engulhu mbuya (Gal. 1:7-9). Kikatholera ikyakengwa ndeke, ngoko endaghano engulhu siya buthoky i oko bakristo. Iyo yabu mukangiiriiry, musondoli erikolya okwitsubuka ly'eriki-riiry omo Yesu, niikwa lino abandu sibakyiri ahisi sy'obuthoky i bw'omusondoli oyo (Gal. 3:24,25). Ebihano mubyalhusiibw'aho n'eribambwa oko musalaba (Kol. 2:14). Abakristo bali ahisi ly'erilhagha erihya-lihya kandi erilengire, erilhagha lihya-lihya erya Yesu Kristo (Heb. 8:6-13). N'okweryo, ebihano by'omo Ndaghano engulhu ebihambire oko mibalha y'okw'ihulhulha (maghese) isiyakolesiibawa myua buthoky i omo kanisa omo mughulhu ono. Eky'eryigha oko mithondekere y'ekanisa kikendihererya ekyitsumbi oko ndaghano nyihya-nyihya, nga, nyisa eribya y'obuthoky i eriilhwa ewa Nyamuhanga. Ebindu ebisakire omo by'eryigha ebi bikatholera erikwamwa omo Biblia erilebya nga ko bine bithya (Emib. 17:11). Obuli mukangiiriiry, ni mulenge nibya erikangiiriiry eryosi erilhwa omo Biblia erikolesya obuthoky i obukaalhuua omo Kiinya kya Nyamuhanga (I Yohana 4:1). Omughulhu ono sithulisangana obuthoky i bwa Nyamuhanga omo bandu niikwa erilhwa omo masako. Ekyo kyisa ekyikasangawa omo kitabu kya Nyamuhanga kyo kyikabya ikyikalighawa na Nyamuhanga. Thukatholera ithw'ikiiriry kwenene-nene omo butswiri-tswiri omo myatsi eyiryalethawa n'eBiblia (Juda

3). Thukatholera erikania ngoko “obulhaghu bwa Nyamuhanga bukakanaya” (I Pet. 4:11). Nyamuhanga siyo nzuuko y’ekimbunzange niikwa y’onzuuko y’obuhoolho (I Kor. 14:33). Abo abakasiikaya obuthokyи bwa Nyamuhanga bakendikangiiriya eby’eBiblia yikakangiriraya neryo ibaghana kyindu kyahи kyosi ekyitheliighawa n’amasako. Abandu ba Nyamuhanga bakatholera eribuugha aho eBiblia yikabuughira kandi ibabya buukuuthu aho Biblia yikabya buukuuthu. Bakatholera erikolha ebindu by’eBiblia omo musiindo w’eBiblia kandi ibahulha ebindu by’eBiblia omo mena w’eBiblia. Ihane erisiikya eritholere oko kyiinywa kya Nyamuhanga ko nikyo kyisa lhulengo lhw’obuthokyи omo kisomo, ghukasabawa eriyithendya oko by’eryigha byoko ithondekania ly’ekanisa. Ghusamalire ndeke obuli masako erilhwa omo Biblia yaghu. Ni kyiinywa kya Nyamuhanga kandi ekyiinywa ky’okwenene (II Tim. 2:15).

EBIIBUULYO

1. Obulengekania bw’omundu bwangathunga obuthokyи omo kisomo?

2. Thonda eby’erileberyako 3 ebithatholere, eby’abandu bakalengekanaya bathi bihikire _____
3. Ebihano by’abandu bikakolha eriramya _____
4. Endwamu y’abanene ninayerikwama? _____
5. Thonda ebindu bibiri oko kyindu kyosi-kyosi ekyika-kanganaya abanene ibabiri kwama ekyithere _____
6. Abanya Israel mubayisuunza erithunga omwami nga _____
7. Thonda ebindu bibiri ebikakanganaya ngoko ekanisa yiri lhuhandi _____
8. Obuthokyи bwa Nyamuhanga omughulhu ono bukanabanika omo banu?

9. Thonda ebindu bibiri ebikakanganaya ngoko thukatholera ithwalenga ebindu ebyosi erilhwa omo masako. _____
10. Thonda ebindu eby’obwimirи 8 ebikaka-nganaya ngoko olhulengo olhw’obuthokyи oluhikire lhuli omo kisomo _____

EKY’ERYIGHA 2: BUSANA NAKYI THWIGHA OKW’ITHOMENGEKANIA AMAKANISA

Emithwe Yomo Ky’eryigha

1. Abahona okw'ilhwa omwikiiriirya babya nabo ibane omw'ithondekania.
2. Erihamya ly'abandu likaletha obulibathangania omo busondoli bwo-si-bwosi.
3. Erihiindaa-hiindana likabya libuya kutse libi erikwamana n'abasondoli bamu.

ERIGHANIIRYA KUBYO

1. Abakatsuuka erihoona eriilhwa omwiikiiriirya babya nabo ibane om-wiyithondekania. Biblia myalhaghulha okwihoona eriilhwa omwiikiiriirya. (1 Tim. 4:1). Abandi ibaleghulha neryo ibalhuua oko mwatsi mubuya ow'ok-wenene. Omukwenda Paulo mwakunga abakulhu b'ekanisa ya Efeso athi bayitheghaye bakatholera ibayirinda omughulhu bak'embembethaya ekyii-hyo kya Nyamuhanga eky'obakasondolha (Emibiiri 20:28). Mwababwira erii-riisya ekyiihyo (ekanisa) kutse erikangiiriirya abikiriirya kusangwa abakangii-riirya b'amabehi bakendisyasa. Abakangiiriirya b'amabehi babya b'eryasa neryo ibathalya abakwenda eribalhusya omo kanisa eyo Kristo aghulha omo musasi wiwe (Emib. 20:18-30).

Thukighira oko byabya byabere oko kanisa kera ngoko omo myaka mike neryo obuminyereri obu mubwabererera. Abandu mubatsuuka eriy-ihighulha okw'ikiiriirya. Abakangiiriirya b'amabehi mubatsuuka erilhuusya abiikiiriirya b'oko kwenene. Abembembethya b'ekanisa mubatsuuka erisondolha omo mibere Nyamuhanga athabya ayisuunzire. Mubatsuuka emikolere omo kanisa eyiri ng'eyomo kanisa y'abarama (catholic church) hayiima n'ebindi bisomo. Obu bw'obusondoli bw'ekanisa obwabya bwaberemo obu-liba-libania.

Enguma oko syonzira esy'abandu babya balhwirir'emo oko Biblia yab-ya ey'emithondekere y'ekanisa. Abakulhu mubatsuuka ery'embembethya amakanisa awalhabire oko nguma. Neryo "abaliisya" mubatsuuka eritheka obuthokyi bwabu oko Bakulhu. Abandu mubatsuuka eribinduuliikania omusiindo w'erisondoleramo ekanisa owali omo Biblia erikolya aho Papa aby-a singikirwe. Omo Biblia simuli Papa, niikwa abandu babya ibamabirikyitha okw'ikiiriirya.

Hakikalha ihane obubi – abandu erihengema erilhwa oko ndondekania y'ekanisa. Ababirikyitha banabya bamasa, ibakatsuukira oko busondoli. Busana n'ekyi, erikangiriribwa oko myatsi y'emithondekere y'ekanisa ni kyindu kyikatholera kutsibu. Omwiminya ndeke ngoko abandi babiriilhuua oko kwenene thwanganayikakiirya ithwe isithwenditherera omwithera lyabu.

2. Emiyiheko y'abandu lhuuba yikaletha obulibathangania omo bw'em-

bembethya bwosi-bwosi. Ni sohya-sohya oko mwembembethya ghosi-ghosi. Mundu wahi akabya amabya omo kyitsumbi ky'obwembembethya, akayira ebbiihi-bbihi oko kyitsumbi ekyirengire eky'akabya inyalimo. Omw'embembethya akabya amathunga obuthokyi neryo kwakananza athya obuthokyi obulengiry'aho. Ni busana nekyi, obusondoli bw'ekanisa bukanguhirawa eribyamo obulibathangania.

Abandu ni baghuma omo ndengo syosi. Emiyihoko ni lhuhe ok'obuli mundu. Mama w'abakwenda Yakobo na Yohana mwanza athi baghalha biwe ababiiri angambe basikalha oko mbandi syosi esya Yesu omo bwami bwiwe (Matt. 20:20-28).. abakwenda babya nga mundu ghosi-ghosi ow'omughulhu ono, abuli mundu anzire obuthokyi. Thukanza erimya ebitsumbi ebyahighulhu. Akanya-bundu sikendisyatha-binduka.

Busana nekyi olhuhe olhw'eritsandya endekathea ya Nyamuhanga oko mithondekere y'ekanisa ni lhuhe lhun'eho munabwire. Abandu obuli kyiropakingira omo kanisa ibanawithe amaha aw'erihebwa ebitsumbi by'obwembembethya. Abandu bangyi bangabere bikiiriirya omo kanisa bamaba-lhagha ambu bakendihebwa ebitsumbi. Omughulhu omunene abandu sibalyoghutha, busana nekyo sibalithoka eribya bahererya b'omukama ab'olho-bolho omo kanisa. Omo mwanya wekyi, abangyi bakasondaya obuthokyi obulengerery'eyo obwangathoka eribanika. Bakalibathanganaya endekathea ya Nyamuhanga ibahir'aho emyanya y'ebitsumbi ahabwabu ibibene. Eriyiminyako ly'abandu likalibathanganaya obusondoli bw'ekanisa. Nokweryo, eky'eryigha kyino nikyamubongo.

3. Eriramirya haghuma omughulhu omunene kyikanabya nga kyibuya kutse nga kyibi oko abasondoli b'erihindana eryo. Omukwenda Paulo mwa-minyerera ekyi omughulhu abirikira abakulhu erilhwa Efeso neryo mwakaniryabo (Emib. 20:17-30). Mwaminya ngoko amakanisa amanene akakwama ab'embembethya abuwene neryo inyabya Makanisa awasiikire kutse inyakwama ab'embembethya abalhuhire neryo inyabya makanisa mabi. Kyirekire endeka-theke y'Omulum Abughirire iyabyaho busana n'abakulhu abuwene kutse abathungereri om'obuli lhuhinda-hindano (Emib. 20:28). Abasondoli abasiikire bakakolha ekanisa eyisiikiire.

Niikwa obw'embembethya obubuya sibuliyi-banikira ahathe erikolla kutsibu. Bukaalhwa omwiikangiiriirya inene kandi ikwakwama erihii-ra ebiryakangiriiriibawa by'omo mikolere. Ab'embembethya b'abandu ba Nyamuhanga bakatholera ibathekwa-thekwa ndeke kandi n'erikangiiriiriba ndeke. Omubiiri wabo gh'omubiiri owalengerery'eyo omo bukulhu kuna kihugho.

Paulo mwalhaghira Timoteo erikolesya ebindu ebyakangiiriribawa, nayo erihererya abandu abayiketherwa, kusangwa babakendithoka nabo erikangiiriya ebindu ebyo by'abandi bandu (II Tim. 2:2). Erikangiiriya ndeke abandu abanganathoka nabo eriyakangiiriya ndeke abandi ni mikolere ya Nyamuhanga ey'obw'embembethya. Busana n'esyonzumwa esi, eky'erigha ky'eBiblia ekyi oko "Mithondekere" y'obusondoli bw'ekanisa ni kyindu kyikulhu kutsibu.

EBIIBUULYO

1. I Tim. 4:1 mubyalhaghulhwako ngoko abandi bakesya _____ okwi_____
2. Gal. 1:7. Hakabuugha hathi abandi _____ bandisya _____ okwi_____
3. Emibiri 20:17 hakakanganaya hathi Paulo mwabirikira aba_____ ab'e_____
4. Emibiri 20:29 hakabuughahathimwabwir'aboeriyirindaoko_____ n'oko_____
5. Emibiri 20:29 hakabuugha hathi _____ bakesya_____ isihali erithendi_____
6. Biblia yikabugha oko Papa busana n'ekanisa?____
7. Omo Matt. 20:2 mama wa _____ mwasaba Yesu.
8. Eriyiminyako ly'omundu ni nalya bubi omo mughulhu ono ng'omo mughulhu wa kera?_____
9. II Tim. 2:2 hakakanganaya abakaka-ngiriribawa bakesyathoka eri_____
10. Basondoli babuya bakahulhukaya amakanisa _____; abasondooli babi bakahuulhuukaya amakanisa _____

EKY'ERYIGHA 3

ESYONZUMWA NGULHU-NGULHU ESIHAMBIRE OKWI-THONDEKANA LY'EKANISA

Emithwe Yomo Ky'eryigha

1. Obuli kyithunga kyikatholera eribya n'abembembethya.
2. Obuli kyithunga kyikatholera abakwami.
3. Obuli kathunga kakatholera erikolerana n'ehindi hithunga.

ERIGHANIIRYA KUBYO

1. Obuli kithunga kyikatholera erithunga ab'embembethya. Yesu omughulhu omunene inyakakwira abandu abanene ababya bakamukwama b'olhukeri kusangwa babya ng'esyambuuli esithawithe muliisya (Matt. 9:36). N'obuhyo bw'ebisoro nga esyambuuli nasyo sikathunga omusondoli. Ekyi kokyine kithya n'omo bithunga by'abandu. Nyamuhanga mwalhangira ngoko eka yikayitsuutsa omusondoli, neryo mwakolha omulhume mo muthwe (Efeso 5:23). Ebihugho bikatholera ibyathunga abasondoli, kobithya Nyamuhanga abirihamulha athi habye abami n'abasondoli abandi (I Pet. 2:13,14). Ebithunga by'abakooli bakakolha ndeke omubiiri mubuya bamabya ibanawithe abasondoli obuwene. Ebindu ebi bikathukanganaya ngoko endekatheka ya Nyamuhanga oko basondoli be'kanisa yeyiwene. Obuli kyithunga kyikatholera eribya n'abasondoli.

2. Obuli kyithunga kikatholera erithunga abakwami (abikiiriirya). Yesu mwabuugha athi "obuli muuyi kutse enyuumba eyiyighabire siyangathoka eryikalh'aho (Matt. 12:25). N'omo hangabya abasondoli abuwene, obuli kyithunga kyikatholera ikyathunga abakwami babuya. Erikwamana n'ekyo ni kyindu kyikulhu okw'ikulha-kulhana ly'ekyithunga erilholya emuliro bussana n'abakwami. Niikwa ni bubuya bwahi abasondoli abuwene eribyah kandi isihali mundu w'erisondolha. Abakwami bakatholera ibakangiiriiriiibwa ngoko bangathoka erikwama. Nyamuhanga akalindirira abakamukwama kutse abikiiriirya eribya bakwami babuya. Bakatholera erikangiirii-ribwa ngoko banga kwama.

3. Obuli kyithunga kyikatholera ikyaligha erikolerana n'ekyindi. Abasondoli babuya hayiima n'abiikiiriirya babuya banasi ngoko bangakolerana ndeke hayiima n'abandi. Abasondoli bakatholera ibabya ibanasi omubiri wabu ndeke kandi n'abakwami (abikiiriirya) nabo kuthya. Obuli muyiima w'okwabo akatholera inyaminya ndeke olhukwamirwa lhwiwe kandi n'eb-yathatholere erikolha nga ni byahi. Abasondoli bakatholera ibaliigha omwanya ow'abakwami (abikiiriirya) balimo, kandi n'abakwami (abikiiriirya) nabo ibasiikya emyanya y'abasondoli. Ekyi kyikendileka ihabya emikolere mibuya ahakathi-kathi k'abosi.

Biblia yikasuunzikanaya emithondekere y'ekanisa ng'ebitsuuko by'omundu, niikwa obuli kitsuko kyikatholera busana n'omubiri owosi (I Kor. 12:12). Ekisando isikyayowa nga sikya mubongo, ambu busana ikyo si kuboko (omul. 15). N'eriiso nalyo siryangabwira okuboko lithi iryo siriyyitsutsire kuboko. N'ehitsuuko ehighunzerereyo obuke nahyo ni hyamubongo oko mubiri (emil. 20-26). Neryo ebindu bino biringirirene ng'okwenene okuli oko mubiri wa Kristo owa Kinya-mulimu, ekanisa (omul. 27). Sihatholere hakabya erit-

suuro ahakathi-kathi k'abembembethya hayiima n'abiikiiriirya. Hakatholera ihabya obulengekania obuhikene eriilhwa oko basondoli embere sy'abikii-riirya. Abiikiiriirya abosi bakatholera erikolera haghuma ibathoka erikolha ndeke obuli mundu akakolha omubiiri wiwe owakathoka erikolha. Ekyitabu kyino kyikendibya kyitabu ky'obw'embembethya, erikwama, n'erikolerana.

EBIBUULYO

1. Matt. 9:36 hakabuugha hathi, abangyi _____ kandi muba_____ eyisirya isibawithe mwembe-mbethya.
2. Efes. 5:23 hakabuugha hathi omulhume y'omuthwe wa _____
3. I Pet. 2:13,14 hakakanaya okw'iyyhererya oko bihano bya _____ na _____
4. Matt. 12:25 hakabuugha hathi obuli nyuumba _____ oko yiyene-na yiyene si yanga_____
5. I Kor. 12 Hakasuunzikanaya abikiiriirya b'ekanisa na _____
6. Abakoli bakanayiitsuutsa omusondoli? _____
7. Erikwama nina kyindu kyikulhu omo Kanisa? _____
8. Ni kyiinywa kyahi ekyikaminyisaya erikolerana? _____
9. Ebitsuuko ebike-bike sibiwithe mubongo oko mubiri? _____
10. Omubiri wa Yesu owa Kinyamulimu ni wahi? _____

EBY'ERYIGHA 4 EKANISA NI KYI?

Emithwe Yomo Ky'eryigha

1. Ekanisa omo mbwarara.
2. Ekanisa eyosi kutse omubiri wa Kristo?
3. Olhuhindano lhw'obuli kanisa.
4. Elhuhindano lhw'abosi.

ERIGHANIIRYA KUBYO

1. Ekanisa omo mbwarara. Ekyiinywa “ekanisa” kyikaminyisaya “ekyithunga ky'abandu ekyibirikirwe”. Sikyirimiiinyisaya enyuumba. Paulo owe Tarso mwendererya “ekanisa”. Niikwa sibuugha abalhume n'abakaali abosi bo kanisa, liriryo abo basa “ababirikiirwe erihulhuka”. Biblia yikabya yikakolesya ekyiinywa “ekanisa” omughulhu oghosi yikabya iyikakanaya oko “kyithunga ky'abandu ababirikirwe” Stefano abya akathuliira oko banya Israeli ababirikirawa eriilhwa eMisiri eriya omo mbwarara. Abandu

bano babirikirawa erilhwa omo bukobe n'omomulikyi, neryo mwahulh'abo mo “ekanisa eyiri omo mbwarara”. (Emib. 7:38). Ekyi kyikaleka ithwathoka erilhangira okwenene kw'ekyiinywa “ekanisa”. Kwenene, ekyithunga ekyibirikirwe ekyi sikyo kyabya Kanisa ya Kristo eyomo Ndaghano Nyiihya-nyiihya. Mubiibiikwa omw'ikiririya lya Musa erilhaba omwisoka Engetse Y'omunyama ahisi sy'ekyilhumbi (I Kor. 10:1, 2). Ekanisa eyo Yesu ahiimba muyithasa Yesu athe asa oko kihugho kandi n'erisuba eLhubulha (Matt. 16:18). Ekisomo ky'endaghano Engulhu kya Kisomo ky'abayuda (Gal. 1:13,14). Kyabya sikyasi Kristo niikwa kyabya kyikatheka-theka erysa lyiwe (Gal. 3:24,25).

Nibya, ekanisa eyo Biblia yikakanay'ako si Dini (denomination). Sihab-ya madini omo mughulhu w'ekanisa y'endaghano Nyiihya-nyiihya. Ebiso-mo ebyosi byatsuukirwe n'abandu omo mughulhu mulebe yesu inyabirihiimba eyiwe Kanisa. Amadini n'ighabolha-ghabolha iryatsuukawa n'abandu ekyithe omo ngangiriry ayeBiblia erikabuugha lithi abosi babye mughuma (Yoh. 17:20,21). Eriyighabania eri lyatsuuka erihasuka omughulhu abiikii-riiry batsuuka erikwama abasondoli babu (n'amena wabu nibya) isiryo erii-na lya Kristo (I Kor. 1:10-13). Omo Biblia, n'okweryo, ekanisa yabya yikabya ekyithunga ky'abandu ababirikiirwe. Siyabya nyumba kutse kisomo. Ekanisa y'omo mbwarara yabya Kyithunga ky'abandu ababirikirwe.

2. Ekanisa eyosi kutse omubiri wa Kristo. Thwamasuba omo ndaghano Nyiihya-nyiihya thukamina omo Kanisa ya Kristo. Yesu mwabuugha, “ngandisyahiimba ekanisa yaghe” (Matt. 16:18). Mwanz'ayo neryo mway-herery'ayo busana nayo (Efes. 5:25). Obuli mundu oyuwabirilhama omukama akamuthomeka omo kanisa eyi (Emib. 2:47). Yikahulhaw'amo “omubiri wa Kristo” owa Kinya-mulimu, kandi iyo y'omuthwe wayo (Kol. 1:18,24). Ekyithunga ekyi ekyikolirwe omo bikiiriiry abosi, ni bandu ab'okwenene ababirikirawa. Babiribakulhwa eriilhwa omo mwirima eryingira omo bwami bwa Kristo (Kol. 1:13). Babiri hulhuka eriilhwa omo myatsi y'obunya-kyihugho neryo babiriyikolh'amo kyithunga eky'engabane eky'abandu abyihwire (II Kor. 6:7). Ekyithunga ky'abandu ababiribirkirwa ekyi, eBiblia ky'oyikahulh'amo ekanisa eyoswire kutse omubiri wa Kristo.

3. Obuli Kanisa. Omusiindo oghundi ow'erilhaghana lihya-lihya aka-kolesiib'awamo ekyiinywa “Kanisa”, ly'erisamalira akathuunga k'abiikii-riiry akake. Olhu ni lhuhindano lhw'abandu ababirikirawa abali omo bul-hambo bughuma kutse omo muuyi mughuma. Thukasoma omo “kanisa ya Nyamuhanga eyiri eKorinto” (I Kor. 1:2). Thukasangana ambu “amakanisa musangyu awali omo miyi ya Asia” (Erib. 1:11). Paulo akathuma eriramukya

liwe oko makanisa erilhuua omo makanisa aw'omo malhambo, akabuugha athi, “amakanisa wa Kristo akabaramukaya” (Rom. 16:16). Ekyithunga ky’ababirikirawa eriilhwa omo Kyihugho, eyo ni kanisa eyiyithaber’eko.

4. Olhuhindano. Omusiindo w’akani owo Biblia yikabuughir’amo ekyiinywa ‘Ekanisa” ly’erikania oko Lhuhindano. Abandu bamabirikirwa erilhwa omo manyumba wabo, eryingira omo lhuuhiindano lhw’abandi, neryo bakahulhaw’amo “ekanisa”. wibuke ghuthi “ekanisa” omughulhu og-hosi yikahulhaw’amo “abandu ababirikirwe”. Paulo akakanaya oko “ekanisa” eryasa haghuma omo I Kor. 14:23. Akabuugha athi abakaali ni b’eribya bukuuthu omo “makanisa” (omwihiinda-hiindana). Ni kyihemo abakaali erikaniirya omo “kanisa” (omwihiinda-hiindana), omul. 34-35. Olhuhiinda-hiindano ni kyithunga ky’abikiiriirya ekyibirikirwe ibabiryasa haghuma omwisanga-sangana.

Eyi y’emisiindo ini eyo Biblia yikakolesiray’amo ekyiinywa “ekanisa”. Omugulhu ghosi ekyithunga “ky’ababirikirawa” kyikabya ikyo ikyakamiinyiisaya. Ghulhangire ghuthi ghukibuka emikoleserye ini eyi ey’ekyiinywa kanisa thukakangiriribwa emithondekere y’ery’embembethery’amo eklesia. Kandi thulhangire thuthi thukakaniraya ahosi aho Biblia yikakaniraya, kandi ithwabya buukuuthu aho Biblia yikabera buukuuthu. Ekyimbunzange kyingyi kyangena yirindwa omwikania oko kanisa hasa, ngoko Biblia yikanaya oko kanisa. Thuhiighire hali obulengekania bw’amakanisa obuthe omo Biblia.

EBIIBUULYO

1. “Ekanisa” omughulhu omunene kyikaminyiisaya _____
2. Ekanisa y’omo mbwarara muyabirikirwa erilhwa omo bihi? _____
3. Ekanisa eyabya omo mbwarara yanengumerera n’ekanisa ya Kristo? _____

4. Ebisomo mubyatsuukibwa na Kristo? _____
5. Yohana 17:21 okw’ibya mug huma na _____ omwinywe.
6. I Kor. 1:10 simusabya _____ omwinywe. _____
7. II Kor. 6:17 hakabuugha hathi “mubye _____, Omukama yukabuugha.
8. I Kor. 1:2 hakakanaya oko kanisa ya Nyamuhanga eyiri _____
9. Ni kanisa yahi ey’abakaali bakatholera erithendi-buughir’amo? _____
10. Ekanisa eyosi yikahulhaw’amo _____

EKY'ERYIGHA 5

EKANISA EYIHINDENE, NI KYI?

Emithwe Yomo Ky'eryigha

1. Obuli mwikiriirya ali ahisi sy'obuuthoky bwa Kristo
2. Obuli mwikiriirya alingirirene n'oghundi mwikiiriirya ahisi sya Kristo.
3. Olhwanzo, omuuhwa, n'abosi erikolera haghuma.

ERIGHANIIRYA KUBYO

1. Obuli mukristo ali ahisi sy'obuthoky bwa Kristo, iy'omuthwe. Eky'eryigha ekyikabughirira mukyikathu-kangiiriaya kyithi ekanisa eyosi yikolirwe n'obuli mukristo oyuli omo kyihugho. Ekanisa eyosi ni mubiri wa Kristo kinya-muliimu, yikolirwe n'abikiiriirya abosi ab'obuli lhuhindano. Yesu y'omuthwe w'omubiri wiwe, y'ekanisa, kandi iyo ni tsuuka ly'ekanisa (Kol. 1:18, 24). Yesu musa yuna muthwe w'omubiri wiwe, ngoko omubiri wethu ow'obulikiro awithe omuthwe mughuma. Obuli mukristo ali ahisi sy'obuthoky bwa Kristo, iyo muthwe, ngoko ebitsuuko ebyosi oko mibiri yethu bikolhobera omuthwe. Yesu Kristo abirihebwa obuthoky obwosi elhubulha n'oko kyihugho (Matt. 28:18). Akahereraya erilhaghira liwe oko mubiri wiwe erilhaba omo kyiinywa kiwe eBiblia (Matt. 28:19). Obuli mukristo ow'ekwenene akolhobera Kristo, iy'omuthwe, kandi ni mughuma gh'oko mubiri wa Kristo owa Kinya-muliimu, ekanisa.

2. Obuli mwikiiriirya alingirirene n'oghundi mwikiiriirya ahisi sya Kristo. Ng'omwikiiriirya w'oko mubiri wa Karisto, abikiiriirya abosi bingene-ngene. Sibawithe mithwe, omuthwe ni Kristo. Sibali ahisi sy'obuthoky bundi kyithe ekyiinywa kyiwe. Sihali mwikiiriirya oyuwithe obuuthoky, amaka, kutse ekyitsumbi oko ghundi mwikiiriirya w'omo kanisa eyosi. Sihali mwikiiriirya kutse kyithunga ekyiwithe obuthoky erirema abandi bikiiriirya. Abosi balingene ahisi sy'omuthwe ini Kristo. Obuli mundu anawithe ekakathoka erikolha, niikwa isihali oyukayibughira ebyosi (I Kor. 12:4-6). Hali miibiiri yithe ya muusiindo mughuma erikwamana n'emitheghekere y'obuli mughuma, niikwa sihali mwikiiriirya wahi oyukasumbirawa eyighulhu oko bandi (I Kor. 12:12-24). Obuli mwikiiriirya omo kanisa eyosi kutse omubiri wa Kristo ingengene omo mubiri wa Kristo, ekanisa.

3. Olhwanzo, omuuhwa, n'abosi erikolera haghuma. Abikiiriirya abosi banze abandi biikiiriirya ng'abasubeneko. Abosi bali omw'ihiika lya Nyamuhanga (I Yoh. 3:1). Abikiiriirya abosi bayitsutsire ihabya emikolere eyihikiire ahakathi k'abikiiriirya abosi. Abosi ni biitsuko oko mubiri muguma

(I Kor. 12:12,13). Ebihanda byosi biringirirene embere sya Kristo, n'abakaali niba-mubongo ng'abalhume embere sya Nyamuhanga (Gal. 3:26-28). Ithwe ng'abikiiriya ab'oko mubiri mug huma, abakristo bayitsutsire abandi bakristo omo kanisa. Hakatholera isihabya eriyighaba-ghabania ly'omuusindo ghosi-ghosi omo mubiri wa Kristo (I Kor. 12:25). Abikiiriya abosi bathunge erilholerera liyimerera. Hamabya yuwamahinolhwa na kyindo kyah i, neryo abosi bayowe bathya. Omwikiiriya mug huma amasiikiibwa, abandi abosi ibatsemerakyo (I Kor. 12:25,26). Ekyitsuuko kyighuma ky'oko mubiri w'omundu kyamathwikalha, omubiri oghosi akahinokalha busana nako. Ko bine bithya omo mubiri wa Kristo owa kinya-mulimu ithwabosi thuli bikiiriya boko bandi. Thukatholera ithwathunga olhwanzo, eriyitsuutsa, na erikolerana haghuma n'abikiiriya abosi abali omo mubiri wa Kristo.

EBIIBUULYO

1. Kol. 1:18 hakabuugha hathi Kristo y'omuthwe w'o _____ kutse

2. Matt. 28:18 haka-kangiiriaya hathi Kristo yowithe _____
3. Omubiri wa Kristo awithe mithwe mingahi kwehi _____
4. Abikiiriya abosi baningene omo Kristo? _____
5. I Kor. 12:5 hakabuugha hathi ithwe bosi thuwithe _____ kighumera-ra.
6. Obuli mwikiiriya nina wa mubongo? _____
7. Eribya wa Kihanda kirebe kikanakolha omundu mo mukulhu oko bandi? _____
8. Omukaali ni wa muthambo embere sya Kristo ng'omulhume? _____
9. Abikiiriya abali omw'ihindana ehandi n'ehandi bane omo mubiri mu-ghuma? _____
10. I Kor. 12:25 hakabuugha hathi eribya isighuwithe _____ omo mubiri.

KY'ERYIGHA 6

EKANISA YITHONDEKIRE YITHI?

Emithwe Yomo Ky'eryigha

1. Oko kyihugho sikuli muuyi mukulhu wa kisomo.
2. Oko kyihugho sikuli Buhikira.
3. Erigherya erihiraho emithondekere mibi omo kanisa eyosi, ni ilholho.

ERIGHANIIRYA KUBYO

1. Oko kyihugho sikuli muyi mukulhu wa kisomo. Ekanisa kutse omubiri wa Kristo syawithe endema oko kyihugho. Awithe omuthwe w'elhubulha kandi n'obuthokyи bw'elhubulha (Matt. 28:18). Omo muusiindo oyu ni yangabane oko makanisa w'ebisomo. Bawithe omuthwe oko kyihugho kyino nga Papa kutse Omuthungereeri. Obuthokyи bwabu ni buthokyи bw'abandu obusakire omo Katekisimu n'omobitabu by'emisabe erilhaba omo ndeko thetthe. Niikwa Biblia sihali mundu ghundi oyoyikahulh'amo Muthwe, liriryo Kristo musa (Efes. 1:21-23). Omubiri wa Kristo syawithe muna Kyihugho mo mitheghekere eyirimo abasondoli abakahira obuthokyи bwabu bw'oko bikiriiryя abosi. Syawithe buliisa kutse obw'ise badikoni. Abikiiriiryя babo sibalyasa haghuma ambu bakasya boha myatsi y'amakanisa. Ebyosi ebi ni mwatsi wa bulibathangania n'eribindulikania ery'abandu baserebethirye omo mikolere y'ekanisa. Omo kyitswa ky'erikundikania n'abandi bikiiriiryя muna kyihugho, abikiiriiryя abosi bawithe erihambana n'abandi kinya-mulimu kandi hayiima na Kristo. Obuli mukristo kandi na obuli lhuhindano biri ibyibyene kandi biri bwiranda omo Kristo. Ekanisa eyosi kutse omubiri wa Kristo sibiwithe ndema kuste mithondekere omo Kyihugho.

2. Sihali Buhikira bwa kanisa oko kihugho. Obuhikira bukabya bwikalho bw'omuthwe. Ngoko Yesu musa y'omuthwe w'ekanisa, Elhubulha hasa ho hali Kristo lino, omuthwe w'ekanisa (Heb. 12:2). Amakanisa w'ebisomo awithe obuhikira obwa-muna-kyihugho buyiima-yiima. Neryo omuthwe (omukulhu) akikalha oko Buhikira obo neryo inyathea obuthokyи bwiwe bw'oko makanisa ayo. Ekyi nakyo kyikakanganaya engabane eyiraho ahakathi-kathi k'ekanisa y'omukama n'amakanisa awa tsuukibawa n'abandu. Sihali mwanya munene owathimbire oko kanisa kutse okw'ithendekero owangabya Buhikira bw'ekanisa y'omukama. Olhuhiindano olhukatsuuka erithekwaho omo bulhambo kutse omo mwanya wahi, syalibya wamubongo kw'ilhaba eyindi myanya. Sihali ithuha ly'a bihembo byosi-byosi oko Buhikira bw'omukyihugho. Sihali muyi wosi owakathuma abathuuliiri kutse eribindulha aho bakathendekera. Sihali kyibanza ekyo bikiiriiryя abosi bakasanga-sangana busana n'esyondeko esy'obuli mughulhu, bakanaboha emyatsi eyihambire oko busondoli bw'amakanisa. Omo kitswa ky'ebyo, Elhubulha aho Kristo y'omuthwe, hona buhikira bw'ekanisa ya Kristo.

3. Erigherya erihiraho emithondekere emibi omo kanisa eyosi, ni ilholho. Abandu kutse amakanisa omughulhu omunene bangagherya erihiraho obusondoli bw'ekanisa eyosi obulhwire eyighulhu. Ekanisa enene yikasonda eritheka obuthokyи bwayo bw'okomakanisa amake-make awali omo busondoli bwayo. Engumbu eyi yangalhwa omwanza erithondekania amakanisa

w'omo kyihugho ekyosi. Ni kusangwa abikiiriya bamu oko nzuuko baba ya omo bisomo, neryo sikyolhobire eryibirirwa emithondekere y'omobisomo byabu by'omokyihugho eyo batsuuka. Bakanza omuhuuthuuko munene. Bakanza ebyaghanda hayima n'abakoli ng'amakanisa w'ebindi bisomo ebi-bathimbir'eko. Niikwa ebindu ebi bikahallaya oko mithondekere y'ekanisa ey'okwenene. Bakalibathanayaya omithondekere y'enzongole y'ekanisa eyikasanganawa omo Biblia. Sithutholere thukaghenda kwilhabya lhulengo omo kyiinywa kya Kristo (Gal. 1:6-9). Thukatholera erithendi thomeker'ako kutse erikehya oko ndekathea y'eBiblia (Erib. 22:18,19). Erigherya lyosi eryangaby'aho okw'ithondekania ekanisa eyosi omo muusiindo wahi, kyikabya ini ilholho.

EBIIBUULYO

1. Omuthwe w'ekanisa ikere hayi? _____
2. Ekanisa ya Kristo yiyighabir'emo bipindi-bipindi? _____
3. Efes. 1:22 hakabuugha hathi Kristo ni muthwe w'e _____
4. Heb. 12:2 hakabuugha hathi Kristo ali _____
5. Ebisomo binawithe Buhikira kunakyihugho? _____
6. II Yoh. 9: hakabuugha hathi _____ sibiri omo ikiiriya lya Kristo sibiri _____
7. Gal. 1:7 hakabuugha hathi abandi bakendisyा _____
8. Erib. 22:18 hakathukunga eri_____ oko binywa by'omo Kitabu kya Nyamuhanga.
9. Erib. 22:19 hakathukunga eri_____ oko biinywa by'omo Kitabu kya Nyamuhanga.
10. Omubiri wa Kristo ana_____ kuna kyihugho? _____

EKY'ERYIGHA 7

EKANISA Y'OKO KYIHUGHO YITHOMENGEKENIE YITHI”

Emithwe Yomo Ky'eryigha

1. Obuli Kanisa yiyithondekire oko kyihugho.
2. Eby'erikangiiriya by'eBiblia oko Kanisa eyisiikire kutse ey'eribyaho mughulhu muli bikabya ibikakanaya ok'obuli Kanisa.
3. Oko kyihugho kyino sikuli thembe-thembe eyiihya sy'obuli Kanisa.

ERIGHANIIRYA KUBYO

1. Eby'eryigha ebilhabire ebibiri, mubyathukanganirye bithi ekanisa eyi

yabya isiyiwithe mithomekere eyihambire oko kyihugho ekyosi haghumer-
era. Obuli Kanisa yikathunga abakulhu bayo, yoyiwithe kuna kyihugho
kw'ekyaghanda (office) n'emithondekere omo mughulhu ono. Omukwenda
Paulo mwabirikira abakulhu b'ekanisa y'omo bulhambo bwa Efeso (Emi-
biiri 20:17). Mwabuugha athi bakatholera ibayitheya busana n'ekyiihyo ku-
tse ekanisa ey'omuliumu abakolh'amo balhangiri (Emibiri 20:28). Omulimu
abuyirire akakolha abandu mo balhangiri busana n'ekanisa y'omukama. Bib-
lia siyiri-yatha buugha yithi hatholere ihabya omulhangiri oko muthwe-muth-
we w'ekanisa eyosi omo kyihugho kutse oko mubiri wa Kristo. Omo I Pet. 5:2
abakulhu mubabwirwa eri-liisyu ekyihyo kya Nyamuhanga ekyabya ikyine
mubo. Babya isibawithe lhukwamirwa ng'abakulhu ahinya y'ekanisa yabo
eyiri omo bulhambo bwabo, aho ho babya ng'abalhangiri. Amasako aya aka-
kanganaya ngoko Nyamuhanga atheka-theka abakulhu eribya om'obuli kani-
sa. Endambi nguma abandu banganalengekania bathi esyondekatheka syabo
esy'erithondekania ekanisa syuwene. Omo mughulhu ono bangyi bananzire
erithondekania amakanisa eritsuuka eyighulhu ery'andaghala rira oko sy'ahisi.
Niikwa obuli nga bukyiru bwa Nyamuhanga bulengire amenge w'abandu (I
Kor. 1:25). Hali nzumwa esyuwene sinene esyangathuma amakanisa mangyi
aw'omo malhambo inyathunga emithondekere. Abandu bakatholera ibasiik-
ya emithondekere ya Nyamuhanga n'eritheka ekyitsumbi omo menge Wiwe
neryo ibakwama endekatheka Yiwe. Ekanisa y'omo bulhambo nyisa y'eyeri-
yithondeka kuna kyihugho kyino. Isiy'ekanisa eyosi eyomo kyihugho hagh-
merera.

2. Ebyosi eby'eryigha oko kanisa eriyira omusingyi owasiikiire omo bu-
sondoli bikahamba ok'obuli kanisa. Omughulhu amasako akakanaya oko
byaghanda ebisiikire (permanent), n'oko thembe-thembe sy'omo kanisa
(church officers), aho obuli kanisa yikabya iyo yamakanibw'ako. Oko nzuu-
ko y'ekanisa, omughulhu amasako aby aisyalyasonga-songiibwa haghuma,
habya ihane esya thembe-thembe esya mughulhu mukuuhi. Omo I Kor.
12:28, Biblia yikakanganaya yithi Nyamuhanga mwahiira abandi b'omokani-
sa, oko nzuuko, "abakwenda, ab'akabiri hamabya abaminyereeri, aba ka-
sathu hamabya abakangiiriya, embere waho muhabya ebithiko-thiko,
neryo esyonzunzo esy'erilhamya amakoni, eriwathiikya, obusondoli n'erib-
indulha emiibuughe". Niikwa ebihembo by'amulimu abuyirire ebyathoke-
saya erikolha ebithiko-thiko byabya bya mughulhu muukuuhi. I Kor. 13:8-
10 hakakangiiriaya hathi omughulhu w'eriykangania lya Nyamuhanga;
Biblia, yabya y'eryasa, niikwa erikanganiibwa erya mughulhu omuukuuhi
iryathanthwiiry'aho. Neryo esyonzuunzo esy'erikolha ebithiko-thiko syabere

sikahwa, ebyaghanda ebya mughulhu muli mubyalholya embere. Ebitsumbi omo kanisa ebyo Nyamuhanga atheka-theka eryikalh'aho ibineho sibyabya biseghemere oko buthoki bw'ebithiko-thiko. Thwamasoma oko eby'omukulhu akatholera inyabya omo Kanisa, obuthoki obw'erikolha ebithiko-thiko sibughuma bwa kubyo. Abandu banganabya Bakulhu isibawithe buthokyi obw'erikolha ebithiko-thiko nibya.

Ebyaghanda ebya mughulhu muli (permanent offices) byaby'aho busana n'obuli Kanisa. Abakwenda n'abaminyereeri aba mughulhu muukuuhi busana n'omubiiri wa Kristo neryo mubyahw'aho lhuuba. Niikwa abakulhu mubathekebw'ako ebyalha om'obuli kanisa (Emibiiri. 14:23). Tito mubamu-siigha eKreti athoke eritheka ebyalha ok'obuli mukulhu omo kanisa sy'omo muuyi (Tito 1:5). Emilhondo eyi yikakanganaya yithi Abakulhu babya bakabya om'obuli Kanisa niikwa isi ok'obuli mubiri awosi owa Kristo. Abakulhu eriilhwa Efeso babya b'erilebererya oko Kyiihyo eky'omulimu Abuyirire abya inyabiri bakolh'amo batheya (Emibiiri. 20:28). Ekyihyo kyino kyabya iy'ekanisa eya Efeso (Emibiiri. 20:17). Abakulhu bakalhaghira rawa eritsunga ekiihyo kya Nyamuhanga ekyiri omw'ibo (I Pet. 5:2). Sibawithe buthokyi oko Kanisa eyindi. Thukalholya embere ithunemwigha emithondekere y'ekanisa y'Omukama eyisiikiire, thukendibana eby'erikangiiriya ok'obuli Kanisa.

3. Sihali thembe-thembe oko kyihugho eyiihya sy'obuli kanisa. Yesu Kristo musa yukyine muthwe w'ekanisa ow'ebunya-Lhubulha. Abakwenda b'omukama n'abaminyereeri bakalholha embeere n'eribya n'omwanya owasiikiire omo Kanisa kusangwa thukyinakwamire obuthokyi obw'ebiinywa byabu ebya kinya-muliumu. Niikwa esyathembe-thembe esikalebereraya oko kanisa siri elhubulha. Sibawithe abiimaniirii kwitse abasiwa kuna kyihugho. Omughulhu ono esyathembe-thembe sy'ekanisa sikasanganawa om'obuli Kanisa. Ekyi thukaminyakyo erikwamana n'amasko abuyirire. Biblia sihali ahosi-hosi aho yikalhaghira yithi ihabya thembe-thembe (officers) hathe ihan'aho mwikiriiryia akahindanira n'abandi bikiriiryia. Ngoko Biblia yikathusondolha ndeke erilholya omo miibiiri yowene, thukaminya ngoko Nyamuhanga mwasunzira ekanisa yiwe erisyaby'amo abakooli (officers) (IITim. 3:16,17). Aho Biblia yikabya n'eribuuigha, nethu ithwabya n'eribuuigha; niikwa aho Biblia yikabya buukuuthu, nethu ithwabya bukuuthu. Thukatholera ithwaghendera omo bulengekania bwa Kristo niikwa isithwaghenda kulhabya lhulengo okw'ekyo ekisakire (II Yoh. 9).

EBIBUULYO

1. Emibiiri. 20:17 Paulo mwabirikira abakulhu b'e _____

2. Emibiiri. 20:28 Hakabuугha hathi babya b'erilebererya oko mbuuli es-yaleka ibabirikirwa. _____
3. I Pet. 5:2 hakabuughha hathi mutheghaye esyambuuli _____
4. Ekanisa eyosi yithondekire omo kyihugho? _____
5. Esyathembe-thembe esy'eribyaho mughulhu muuli siri omo _____ Kanisa.
6. Ni kanganiibwa lyahi erihikene ery'imanaya ebithiko-thiko? _____
7. Abakulhu banatholere erikolha ebithiko-thiko imobabya Bakulhu? _____
8. Emibiiri. 14:23 hakabuughha hathi abakuulhu bathekaw'akoebyalha omo_____
9. Tit. 1:5 hakabuughha Abakulhu mubathekw'ako abyalha busana na _____
10. Hane esyathembe-thembe _____ y'obuli Kanisa?

EKY'ERYIGHA 8 **ABABYA BAKWENDA NA ABALHAGHUULI NI BAHI?**

Emithwe Yomo Ky'eryigha

1. Babya thembe-thembe sy'ekanisa esy'engabane eriilhwa oko nzuuko y'ekanisa.
2. Obuthokyи bwabu ob'werikolha ebithiko-thiko bwahwer'eho.
3. Babya ba mughulhu muke, isiba mughulhu muli.

ERIGHANIIRYA KUBYO

1. Babya bakoli b'ekanisa ab'engabane eriilhwa oko nzuuko. Ebindu byosi ebiri kuna kyihugho byatsuuka-tsukana n'ebithiko-thiko. Abandu n'ekyihugho byatsukawa erilhaba omo kyithiko-thiko. Niikwa omughulhu ono abandu n'ekyihugho bikalholh'aya embeere busana n'endekatheka ya Nyamuhanga eyilhwire enyuuma isi busana n'ebithiko-thiko. Omo musiindo iwanoyo, ekanisa muyatsuuka n'ebibithiko-thiko. Niikwa ekanisa yighalihiire kandi yikalholhaya embere erikwamana n'endekatheka ya Nyamuhanga. Ekyiinywa kya Nyamuhanga oko nzuuko muky'abyaho erilhaba omo bithiko-thiko. Niikwa lino thuwithe Biblia eyikaminyawa isihali bwagha bw'eri-by'aho ly'ebithiko-thiko ebiriho oko mughulhu ono.

Abakwenda babya bandu b'engabane abakakolha ebithiko-thiko, ababya bakoli oko nzuuko y'ekanisa. Nyamuhanga mwabahererya obuthokyи bw'engabane busana n'eribisulha ekyiinywa kyiwe n'erikolha oko nzuuko y'ekanisa yiwe. Yesu mwalhagha athi abakwenda bakendisyasondol-

hwa Omuliimu Abuyirire omo “bindu ebyoosi” (Yoh. 16:13). Abakwenda n’abamiinyereeri babya ibakatholera eriby’aho ng’endo nguma oko nzuuko kutse omusingyi ow’eritsuukir’ako ekanisa (Efes. 2:20). Biblia yikabuugha yithi abandu nga abakwenda n’abamiinyereeri bathekaw’aho na Nyamuhanga eritsuukirira oko kanisa (I Kor. 12:28). Ebithiko-thiko byabu kabya kaminyikalho k’erikangania ngoko balyathumawa (II Kor. 12:12). Ebithiko-thiko byabu byabya by’erihamaaya ngoko erikangiiriya lyabu likalhwa oko Nyamuhanga (Heb. 2:3,4). Ebyaghanda n’esyat thembe-thembe hino byatholera eriby’aho busana n’enzuuko y’ekanisa. Niikwa ebitsumbi byabu n’ebithiko-thiko sibikyitholere omo mughulhu ono.

2. Obuthokyibwabu ob’werikolha ebithiko-thiko mubwahwa. Thunasi omughulhu ono ngoko omo kanisa simukyiri bakwenda kusangwa obuthokyibow’erikolha ebithiko-thiko bwahwere. Ni ndekatheka ya Nyamuhanga a thi ebithiko-tiko bikatholera erihw’aho omughulhu ekyilhubirirwa kyabyo kyasyahw’aho. Obulhaghu, erikania omo mibuughe thethethe, n’amenge aw’ebithiko-thiko abya ini w’eritsweka (I Kor. 13:8-10). Ebyosi ebi byabya by’erilemwa kutse eritsweka omughulhu erikanganiibwa lya Nyamuhanga erihikene lyasa hiika, erihiika eri y’eBiblia. Nyamuhanga nibo ahereraya esyanzuunzo esi erikolya aho erikiiriya lyasabererera omo bw’oswire (Efes. 4:8,11-12). Lithya Biblia yabirihindana, thuwithe omwatsi ow’oswire owa-hambire oko mughalha wa Nyamuhanga. Erikiiriya lyabiryasa ndambi ngumerera oko bikiiriya (Yud. 3). Ngoko enzumwa yiri yithi Yesu ni mughalha wa Nyamuhanga yabiry’engehulhwa erilhaba omo bithiko-thiko (Yoh. 20:30,31). Ekyindu ekyabiriminyikalibwa ndeke sikiyiryanza kandi erithasyaminyikalibwa kandi. Okwenene ky’ekyiinywa kya Nyamuhanga ngendo nguma kyabiriminywa ndeke. Okwenene okuli omo kyiinywa kya Nyamuhanga kyabiriminyikalha ndeke-ndeke kandi kulihokera-na-kera ikune kwene. Omughulhu ono amasako akathulholeraya oko miibiiri yowene (2 Tim. 3:16,17). Obuthokyibow’abakwenda bwabiri tsweka kusangwa ekyilhubirilhwa kyabu kyabirihikana. Eriilhuua obuthokyibow’abaakwenda eritsweka, lithya sihakyiri bakwenda omo mughulhu ono n’obuthokyibow’ebithiko-thiko bwabirihwa.

3. Babya ba mughulhu mukuuhi, isiba mughulhu muli. Ebihembo bw’erikolha ebithiko-thiko byahebawa busana n’emitsuukire y’ekanisa erilhaba omo bithiko-thiko. Ebihembo ebi, mubyahererya abandu erithoka eribya bakwenda n’abandi eribya balhaghuuli. Niikwa esyo nzuunzo sy’erikolha ebithiko-thiko syabirtsweka, n’obulhaghuli bwabirilekwa. Nokweryo, omughulhu ono sihali buthokyibow’abakwenda n’abalhaghuuli. Ebyaghanda

ebi sibyabya by'eribyaho kere-na-kera. Nyamuhanga mwathakyikolha athi abakwenda n'abalhaghuuli basyathunga abasiwa (ab'erisiighalya emyanya yabo). Emยanya yabo yaby'aho busana n'eritsuukiisya ekanisa, isi busana n'erilhanda-ghaniayo omo kyihugho. Kusangwa thukikiriraya eBiblia, thukikiriraya thuthi ebithiko-thiko mubyakolhwa kandi thuthi abakwenda n'abalhaghuli mubaby'aho. Busana n'enzumwa iyan'eyo, thukiikiiraya thuthi ebithiko-thiko byahwere, kandi thuthi abakwenda n'abalhaghuuli sibakyiri. Biblia iyane nguma yikaka-ngiiriiraya ebyosi. Busana n'ekyi, sithulibaana abakwenda n'abalhaghuuli omo Kanisa y'omughuulhu ono. Sibabya b'erikalh'aho, babya ba mughulhu muke. Mundu wahi oyukayahulh'amo mukwenda kutse mulhaghuuli akabya ini mubehi (Erib. 2:2). N'omo lyanabya oko nuzuuko, hanabya abakwenda b'amabehi (II Kor. 11:13). Abandu obuli mughulhu bakasondekanaya erikangania ebithiko-thiko eby'eriyitsopa-tsopania n'erithiikya (II Tes. 2:8,9). Bangyi basyabuugha bathi bakakolha obumin-yikalho n'ebi'eriswekerya ebikalire, niikwa Yesu asyabuugha athi, syabasi (Matt. 7:22, 23). Abakwenda n'abalhaghuuli babya habwa mughulhu muke, isi berikalh'aho omo kanisa eyatsuuka.

EBIIBUULYO

1. Biblia yineyatha kangiiriirya yithi ebithiko-thiko okwitsuuka mubyakolhwa? _____
2. Biblia yineyatha kangiiriirya yithi ebithiko-thiko bikendisyaghenda embere n'erikolhwa? _____
3. Yoh. 16:20 hakabuugha hathi abakwenda mubasondolerwa omo _____
4. Efes. 2:20 hakabuugha hathi abakwenda n'abalhaghuuli banabya omo _____ y'ekanisa.
5. I Kor. 12:28 hakabuugha hathi Nyamuhanga mwathondeka abandi omo kanisa _____ bakwenda.
6. II Kor. 12:12 hakabuugha hathi abakwenda mubakangania _____ by'obukwenda.
7. Heb. 2:3,4 Nyamuhanga akanganaya obwimiri _____ na _____.
8. Yuda 3 eryiikiiriirya mulya _____ oko bakwenda.
9. Erib. 2:2 Hakabuugha oko bakwenda b'amusiindo wahi? _____
10. Abakwenda n'abalhaghuuli banabya bawithe ebitsumbi ebya mughulhu muli? _____

EKY'ERYIGHA 9

OBULI KANISA YIKA YITHONDEKAWA YITHI?

Emithwe Yomo Ky'eryigha

1. Obuli kanisa yikayithabalh'ako kutse yikayibughira ebyayo.
2. Abasondoli bakathunga obuthokyi om'obuli kanisa.
3. Amakanisa syathomekire eyighulhu oko wandi

ERIGHANIIRYA KUBYO

1. Obuli Kanisa yikayi-thabalh'ako kutse yikayibughira ebihambire kuyo. Ekanisa ya Kristo niy obwiranda okwithendi-thabaliibw'ako n'obuthabali bw'ekanisa ngulhu eriilhwa eyighulhu. Bakagheraya erighendera oko ndeka-theka ya Nyamuhanga, Biblia. Bakaronde-kanaya erithekaho ekanisa eyiri ng'eyabya omo ndaghano nyiihya-nyiihya. Bakathonganirira erisuu-byta obuli kyighuma, ngoko kyiri omo ndeka-theka y'ekanisa y'omukama. Ekyighuma kyoko bihandi eky'erisuubuulya omo kanisa, y'emitho-ndekere kinya-mulimu. Thwamaminya emibere y'emithondekere y'ekanisa omo ndaghano nyiihya-nyiihya, kuthuna kwama-kwamanaye thuthya emisondolare y'ekanisa omo mughulhu ono. Eky'eryigha ekyo thulhweko ahanyuma mukyikathu-kangiriraya kyithi abakoli (officers) bakabya om'obuli Kanisa. Muthuka-kangiriribawa ngoko sihali bakoli ahiihya sy'ekanisa. Erihindha-hindana eri siriwithe kathunga kwitse endeko nyisondoli. Obuli kanisa yikabya n'abasondoli bayo abalyalhwa omo kanisa iyaneyo. Sihali buthokyi obukalhwa eyighulhu ambu bukasasondolha amakanisa awandi.

Ekyiinywa “autonomous” kyikamiinyiisaya “self rule” eriyithabalh'ako. Ekanisa eyiri autonomous, y'ekanisa eyikayithabalh'ako. Siyiwithe obuthokyi obukalhwa eyiihya sy'ekanisa ambu bukasa thabalha kuyo. Yikayisombolera abakoli bayo, iyayiihiiriir'aho abathuuliiri, erithabalha oko syambuulho syayo, kandi iyasuyira abikirirya bayo abakabya ibaghendire mahengo-mahengo. Siyiriby'ako buthokyi bwosi-bwosi obukaalhwa eyiihya sy'ekanisa eyo, ambu bulyalhwa eyiihya n'eryasa lebererya eby'ekanisa. Yiri ahisi sy'obuthabale bwa Kristo busa ekitabu kyayo eky'obuthokyi y'eBiblia nyisa. Yikakola eripipa lyayo iyoyene-yene, esyandeko sy'erithekatheka ekanisa syayo, n'eyindi mikolere busana n'ekanisa. Obuli kanisa yikatholera iyayitha-balh'ako imu-hathoka omo mughulhu ono erisuubuulya emithondekere y'ekanisa y'omo ndaghano nyiihya-nyiha.

2. Ab'embembethya bakathunga obuthokyi omo kanisa. Omuusiindo omughuma owo batsuukir'ako erilhwa omo mithondere y'ekanisa y'omwil-

haghana lihya-lihya, yalhwa omo bakoli, omo bembembethya omughulhu batsuuka eritheka obuthokyи bwabo bw'oko makanisa awalhabire oko nguma. Eriyihighulha oko mitheka-thekere y'eBiblia neryo lhuuba mulyabakolya okwithunga ebyaghanda bya district omo makanisa nomo myanya the-the-the. Neryo emikolere eyo tuyabakolya okwisingika Papa. Imuthwathoka erisuuby'aho emikolere y'omo Biblia, abakoli b'ekanisa sibatholere bakakolera omo makanisa awalhabire oko nguma. Thwamakwama-kwamania endekathea ya Nyamuhanga, yikathulinda oko mibere eyaletha ekanisa ye Roma (Roman Catholic Church). Amakanisa mangyi aw'abahoona (protestant churches) nagho awithe abakoli abakathabalha oko makanisa awalhabire oko nguma. Bawithe bitsumbi binene nga; “agents-aba bbuloka” kwitse “travelling isiops”. Omubiiri wabo ly'erilebererya oko wandi makanisa manene awali ahisi sy'obusondoli bwabu. Omughulhu mungyi bakikalha ibanemuthimba, eriilhwa oko kanisa nyirebe erihika oko kanisa eyindi omo malhambo wabu. Niikwa abakoli b'ekanisa bakatholera ibasondolha omo kanisa nguma. Amakanisa wa Kristo awakulire akalholhaya omwsonda athi habye obuthokyи bw'oko makanisa amahya-mahya. Amakanisa aw'omo miiyi (town churches) akanasonda erisondolha emiibiiri y'omo makanisa awali hakuuhi omo malhambo eyiihya sy'emiyyi. Bakathuma Abakulhu eriy'embe-mbethya othukanisa othuke-thuke othuthawithe kaghalha. Niikwa eyi ni mitheka-thekere y'ebisomo (amadini). Ni nzira y'erilether'amo obuliiba-thangania omo mithondekere y'ekanisa. Ekanisa siyangathoka eribya iyiyi-thaber'eko yamabya iyikasondolhawa abasondoli abakalhwa omo yindi kanisa eyiihya.

3. Amakanisa syathomekire eyighulhu oko wandi. Abikiiriirya bangyi abomo makanisa wa Kristo ibakabugha myaka minene ibane omo makanisa w'ebindi bisomo. Neryo omughulhu omunene ogho baghunza omo bisomo eyo akaba-kakiraya okwiminya ndeke emithondekere ey'okwenene. Bayisunzire bathi Ekanisa ya Kristo yisosekaniibawe n'esyobalhw'amo ehandi. N'okweryo, bakanza ihabya erihiindana banene hayiima. Bakanza ebithunga-bithuunga ibinayithondekire imune abakoli hayiima n'obubikiro bw'es-yambuulho. Omughulhu akahiika ibakolha “obuhererya obwa haghumerera” ekyikaghanga-ghangaya eriramya lyabu ly'obuli Kanisa. Obuli kanisa yabya iyiyithaber'eko omo mithondekere. Kristo mwasakangira niibya obuli Kanisa omo Asia (Erib. 1:11). Obuli Kanisa musakangirwe ekyayo kyisango, nomo kyine ambu syabya omo bulhambo bughuma, amakanisa syabya athomengekenie. Sihabya kyithuunga kya b'embe-mbethya ababya bakathabalha oko makanisa omusangyu ayo haghumerera. Obuli kanisa om'obuli

muuyi yabya eyiyithaber'eko. Endeka-theka y'ekanisa eyiri omw'ilhaghana lihya-lihya yamakwama-kwamaniibwa, amakanisa isy'endisyabya akath-omengekaniibwa haghuma.

EBIIBUULYO

1. Ekyiinywa ekyikamiinyiisaya “self-rule) kuste eriyithabalh'ako ni_____
2. Biblia yikanakanaya oko “agents” “aba bbuloka”? _____
3. Emibiiri. 1:11 hakabuugha hathi ebisakango mubya sakiirwa oko makani-sa musangyu awa_____
4. Ebisomo eby'eyo bikiiriya bethu balhwa bikaleka ibanza eri _____ haghuma.
5. Kyinatholere amakanisa awakuulire kandi inyanasiikiire erithabalha oko makani-sa awakatsuuka? _____
6. Biblia yikana kanaya oko kyithunga eky'erisondolha amakanisa manene? _____
7. Amakanisa w'omondaghano nyiihya-nyiihya anabya ethomengekenie oko wandi? _____
8. Ni kyiinywa kyahi ekyikamiinyiisaya erithasyahir'aho ekyindu ngoko kyabya oko nzuuko? _____
9. Ebyaghanda by'oko district neryo mumwalhwa _____
10. II Yoh. 9 Hakabuugha hathi thwama _____ kandi thukathendi kwama obulengekania bwa Kristo, thukendibya isithutha _____

EKY'ERYIGHA 10 OBULI KANISA YIYITHABER'EKO YITHI? AYITHABER'EKO ATHI?

Emithwe Yomo Ky'eryigha

1. Eriyithabalh'ako.
2. Eriyiimani'aho.
3. Eriyiikanyirirya.

ERIGHANIIRYA KUBYO

1. Eriyithabalh'ako. Omuusiindo mughuma owakakanganaya athi ekyithunga kyikayibughira ebyakyo ly'eriyithondekania. Ekyi kyabirikan-ganiibwa omo by'eryiigha ebyo thwabiri-lhab'amo enyuma. Erikiiriya obw'iranda bw'eriyithabalh'ako yonzira nguma ey'ekanisa yangabya iyikay-isondolha. Ekanisa yamatthalhuka eriyithokera ebihambire kuyo, neryo yikabya iyikaya kyindawa ebini ebyosi ebihambire kuyo. Abandi bandu bak-

abya bamasaghulha ekanisa y'obusondoli bwayo, yikabya iyamabirilhwiika obwiranda bwayo aho isiyikiyithaber'eko. Amakanisa amanene akakolha endwamo yagho, niikwa isyawithe eriyithabalh'ako omo bw'oswire, inyaky-inawithe eriyiitsuutsa lyagho eriilhwa eyiihya omo by'esyombulho nomo bindi biyitsuutso nabyo. Eriyithabalhako likatholera eryakolya ekanisa y'ok-wiyibughira emyatsi yayo n'omo hangabya erithahuka.

Ekyindu ekyikulhu eky'eriminya ndeke hano ky'ekyi, nomo bine ngoko byamakanibw'ako ehighulhu, ekanisa siyangalhuusya obuthokyi bwayo bw'eyiihya kandi yikabya isiyithalhwika obwiranda bwayo. Niikwa ekanisa yanganathunga obuwathiikya eriilhwa eyiihya habwa mughulhu muke isiyithalhwika eriyithabalh'ako lyayo. Sihali ky'erilhangirir'ako ekanisa y'omo ndaghano nyiihya-nyiihya yikalhuusya obusondoli bw'ehandi. Niikwa thukanasoma omo ndaghano nyiihya-nyiya ekanisa yikathunga obuwathiikya omo by'omulimu n'omo by'esyambulho eriilhwa eyiihya. Abakulhu kutse abalebererya b'eYudea mubathunga obuwathiikya omo sy'ombulho erilhwa Antokia (Emibiiri. 11:27-30). Paulo mwathunga olhuhembo eriilhwa omo makanisa inyanemuthuulha ekyiinywa eKorinto (II Kor. 11:8). Ekanisa y'e Filipi nayo tuyathuma obuwathiikya ngendo nguma eyiri Paulo n'omo yindi myanya (Fil. 4:15,16). N'okweryo, omo Biblia mune eby'erilhangirir'ako obuwathiikya bukalhwa eyiihya mughulhu muke.

2. Eriyuumaniaho. Omusiindo oghundi owakakanganaya ngoko Nyamuhanga anzire amakanisa eriyisondolha, kyikalhangirika omw'iyiibughira ebiiriitho byagho. Paulo mwasiima ekanisa y'eFilipi busana n'erimuwathiikya omo by'esyombulho n'omwitsuuka ly'engulhu mbuya ya Kristo niibya (Fil. 4:15). Ekanisa isiyiribya iyiyithaber'eko omughulhu yikabya isiyiriyahii-ka okwiyyumaniaho omo by'esyombulho. Obuwathiikya obwa mughulhu mukuhi bwanganayiitsutswa eriby'aho, niikwa eriyuumaniaho likatholera iryahiikw'ako lhuuba. Omughulhu obuwathiikya bukathungawa erilhwa eyiihya, hali obuba obw'obuthabale obwangasa ibunakwamir'eko. Amakanisa awandi akaliigha athi n'erithwamo oko kyindu kyirebe, amakanisa aw'eyiihya wabathwiremo. Amakanisa akatholera inyayuumaniaho iwiwene-wene.

Ababuuthi erikangiirrirya omwana iritsuuka eribbasulha, kyikathwalha kyisando oko kyisando busana n'omwana oyo iyuwene-wene. Omwana athathagherya iyuwe-wene eribbasulha, syalyigha erighenda. Niikwa ok'obuli kisando ekyakabbasulha iyuwene, kyikamukangiirriraya ndeke eriyibbasulira iyuwene-wene. Kobine bithya, ekanisa yikatholera eribbasulha nomo kwangabya okwitsuuka lyayo. Abandi bakyinawathikay'ayo omo by'esyambulho siyendisyathoka eriyibbasulira iyoyene. Niikwa bisando bingahi ebyo yikayibbasulira

iyiyene, yikabya iyinemwigha eriyiisingika iyoyene. Yikabya iyamigha erilhaba omwiyikolera. Eribuuthi ly'engoko nalyo liwithe olhukwamirwa elhw'erikan-giiriiryia obwana bwalyo erilhaba omwiyihambir'ako. Eribuuthi likyinasonderaya obwana bwalyo bw'ebyerirya ebyosi n'eribuuliisy'abyo, sibwangathoka eryigha eriyiimaniaho. Niikwa omughulhu yikabukaka eriyironderya eby'erirya ibubwene-bwene, bukathoka erikulha ibune ibubwene kandi ibunawithe amani. Nomo kyine kyithi obundi bwana bwanganaghana eriyiiriisya oko nzuko, eribuuthi likabuhighitha, lithi buyayironderaye eby'erirya. Neryo omo mughulhu muke bukabya n'eriminya ngoko eriyiiriisya lirengire erilisiibwa. Kobine bitya, amakanisa amaghuma n'amaghuma akatholera inya kakwa eriiyiimaniaho. Awandi niibya angayitsuutsa athi asuyirawe (aritsumangwa) imwathoka eryigha eriyiimaniaho. Niikwa amagherya omo kwenene, akalhangira inyangakolha ndeke kwilhaba ngoko alyabya akalengekania. Neryo akendikulha-kulhana n'eribyaho mughulhu muli.

3. Eriyiikanyirirya. Ekyiinywa ekyi kyikaminyisaya eriyilholya embere. Ekanisa eyikayilholhaya embere yikayilhandaghanaya n'erithulhughania engulhu mbuya eyikatsuuka awandi makanisa. Ekyiinywa kya Nyamuhanga yo mbutho y'obwami kutse ekanisa (Luk. 8:11). Obuli mbutho yinawithe omo kathi kayo engebe eyikatholeray'ayo eriretha oghundi muthi. N'eBiblia kuyine yithya yinawithe obuthokyi obw'eritsuuka n'erikulha-kulhania ekanisa. Ahosi aho emithima mibuya yikendyangirira ekyiinywa, amakanisa akenditsukwaho. Ekanisa siyiriyyisunza eyindi y'eyiihya kutse eryasa yikasyatsuukisya eyindi kanisa. Omo muusiindo oyu ekanisa yiri ng'endina y'ekyitoke. Yamabiriherwa, yikabya n'obuthokyi obw'erikulha isihali buwathiikya obukalhwa ehandi. Neryo kyikathokesaya awandi matoke eribyaho. Ekyi ly'eribugha ambu "eriyiikanyiiriya" kuste erikanyirira. Biblia yikabuugha yithi ekanisa yo ngusu kutse enzeghu ey'okwenene (I Tim. 3:15). Obuli kanisa n'iyerituuyikirira n'erilhalhania okwenene. Ekyo neryo kyikendireka awandi makanisa inyatsuukwa. Neryo nasyo sikendisingika okwenene omo yindi mwanya. Ekanisa eyabya eyerusalemaya tuyatsatsangwa n'erighenda obuli handu iyinemukangiiriiryia ekyiinywa (Emibiiri. 8:4). Ebithuunga by'erithuulha engulhu ebikalhwa eyiihya kutse eby'ebisomo, sibkulhu busana n'erithulhughania ly'ekanisa y'omukama. Amakanisa awa Kristo ayithaber'eko erilhaba omwiihiinda-hiindana, omwiiyiimaniaho, omwiyitha-balh'ako n'omwiyiika-nyiiriiryia.

EBIIBULYO

1. Ninakya mulimu ekanisa erithunga obuthabali eriilhwa eyiihya? _____
2. Ni nakya mulimu ekanisa erithunga obuwathiikya erilhwa eyiihya habwa

mughulhu muke? _____

3. II Kor. 11:8 Hakabuugha hathi Paulo mwathunga _____ eriilhwa oko makanisa.
4. Fil. 4:15,16 hakabuugha hathi Filipo mwathuma _____ na _____ habw'eriyyitsuutsa lya Paulo.
5. Fil. 4:15 hakabuugha hathi Filipo mwathumira Paulo erilhwa omo _____ y'engulhu mbuya.
6. Eby'eriminyirako ngoko ekanisa yiyiimenieho ni _____ na _____
7. Eriyikanyiiriya kyikaminyisaya ki? _____
8. Luk. 8:11 hakabuugha hathi Ekyiinywa nikyo _____ y'e _____
9. I Tim. 3:15 hakabuugha hathi ekanisa ni _____ na _____ ey'okwenene.
10. Emibiiri. 8:4 hakabuugha hathi abakwenda mubaghenda _____ ibanemu-kangiiriya _____

EKY'ERYIGHA 11

BUSANA NAKYI NYAMUHANGA ANZIRE AMAKANISA INYAYITHABALH'AKO?

Emithwe Yomo Ky'eryigha

1. Kyikakulha-kulhanaya abembembethya hayiima nabikiiriya.
2. Kyikaletha omuuhwa omwihiithya kandi n'omwiikolha.
3. Kyikakakiraya abikiriiryia erihengema bakahuma okwiikiriya erilhun-gukere.

ERIGHANIIRYA KUBYO

1. Kyikakulha-kulhanaya abembembethya hayiima nabikiiriya. Nomo thwangabya isithwangaminya busana nakyi Nyamuhanga anzire amakanisa awakayithabalh'ako, thukatholera ery'olhobera obuthokyi bw'eBiblia. Niik-wa thwanganalhangira esyanzumwa nene esyuwene busana nakyi esyondeka-theka sya Nyamuhanga esy'ekanisa eribya eyikayithabalh'ako kyikathol-era oko makanisa. Ekyighuma kyoko nzumwa esi kyiri kyithi emikolere eyi yikaleka omo makanisa imwabya abembembethya n'abikiiriya. Omughul-hu abembembethya bakalethawa omo kanisa erilhwa eyiihya, neryo abembembethya b'omo Kanisa eyo sibalikulha-kulhana. Omughulhu omubiiri w'ekanisa akakolebawa abembembethya abakallhuua eyiihya, abikiiriya sibaly'anguhirawa erikulha-kulhana. Obukristo bukatholera ibwathokesya omundu erikolha ngoko kyikatholera. Nyamuhanga abirithekatheka ngoko emithondekere y'ekanisa yangakulhaukuulhania abikiiriya eribakolya oko

lhulengo olhukatholera. Abikiiriirya bomo kanisa bamayowa ambu abembethya babu bakendithwamo erilhwa ehandi, irikendibya lyabu. Emithondekere y'ebisomo siyirikamiriraya engulhakulhana y'omo makanisa. Omo Rom. 15:14 Omukwenda Paulo mwasiingga abikiiriirya b'eRoma busana n'eryusuliibwa obubuya kandi n'amenge, kandi n'erikubakubania obuli muyima w'okwibo. Abandu aba babya ibabiriyikulha-kulhania omo kanisa eyiyimenieho. Niikwa omo Heb. 5:12-14, abikiiriirya bakatswebawa busana n'erithendiyikulha-kulhania. Abikiiriirya aba babya ibabiribya omo kanisa habw'omughulhu muli niikwa isibangathoka erikangiiriirya. Hano bakabwirawa ngoko bakayitsuutsa erikolha kutse erithunga erigherya omwikangiiriirya. Obw'embembethya bw'omo kanisa bukayitsuutsa abandu abasi ebyobakakolha. Nyamuhanga akanza amakanisa inyayimaniaho omo bw'embembethya, hangathoka eribya abebembethya abasi ebindu, omo mwanya muke (lhuuba).

2. Kyikaletha omuuuhwa omwihihtha kandi n'omwiikolha. Endeka-theka y'omo by'esyombuulho omwiithondekana ly'ekanisa omughulhu munene bikayitsuutsa esyombuulho erilebekwa oko muyi mukulhu. Niikwa omo makanisa awakayithabalh'ako awa Kristo sihali muuyi mukulhu (Buhikira) w'ekanisa kuna kyihugho. Eby'esyombuulho ni by'obuli kanisa erikolesya es-iryasonga-songiibawa omo kanisa eyo kutse eriyilhangirira ngasikendikolesiibwa sithi oko mubiri w'omukama. Sihabye mukoli mulebererya kutse muuyi mukulhu owa tholere eriwathikiibwa. Endeka-theka eyi yikaletha omuuuhwa mubuya ow'erihererya esyambuulho. Omwikiiriirya akabya amaminya ngoko esyambuulho syiwe alyaletha esyosi sikendikolesiibwa omo kanisa yiwe, akatholera inyanza erihererya nene n'okwaho. Akabya inyanasamalire ngoko hali eriyitsuutsa omo bulhambo bwabu, akalhangira ngoko esyambuulho siwe siyitsutsirwe kutsibu. Akayowa omo muthima wiwe mw'ebere-rerya, akalhangira ebiyitsutso by'abandu bikakolhw'ako omo syambuulho es-yalyahereraya. Omusuindo mubuya ow'erihererya omo bandu mw'omuthima w'erihereryayo n'erihsyandira, ly'ekangania eriyiitsuutsa erikalire emebere sy'abakahereraya. Emikolere ya Nyamuhanga koyiri yithya aka-kakamiriraya abangyi omo muthima w'omuuuhwa busana n'omubiiri w'ekanisa. Obuli mwikiiriirya akalhangira ngoko sihali ghundi mundu oyukendiilhuua eyiihya akasamukolera omubiiri ow'ekanisa yiwe. Iyo iyuwene-wene ni lhukwamirwa lhwiwe. Ekyi kyikiikalha ikyinathekire olhukwamirwa ok'obuli mwikiiriirya omo mwanya w'erilengekanirya omo kyindi kyithunga ambu ky'ekyikendikolha. Endekatheka ya Nyamuhanga athi obuli kanisa yiyithabal'eko w'omusuindo owalhabire oko yindi owakaletha omuuuhwa omwiher-

erya kandi n'omwiikolha.

3. Kyikakakiraya erikanyirira ly'abikiriirya erihengema bakahuma ok-wiikiriirya erilhungukere. Amabwe manene-manene amaboherwa haghuma oko bihandi bighuma by'omuulikyi, sibiribya ibibyene niikwa bihambenie n'ebindi. Neryo ekyihandi kyighuma kyamathoghera omo lhuusi, kyika-ka-kiiraya ebundi bihandi ebyosi by'omo lhuusi. Niikwa ebihande by'am-abwe byamabya bithabohere haghuma, ekyihande kyighuma kyamathogha, ebundi sibyangathogha. Biri ibyobyene. Erisuunzikania eri likakanganaya ngoko ekanisa eyiri eyoyene koyisosiire. Ebisomo bikabohera amakanisa gho haghumerera neryo ibyalhuusaho eriyithabalh'ako. Neryo ekanisa nguma yamasuba enyuma omo bwikiiriirya yikayikakiray'ako esindi esyosi. Endeka-theka ya Nyamuhanga y'eyilhabire kusangwa yikakakiraya erikyitha thukalhuua okwiikiiriya ery'okwenene n'erighenda oko ngangiiriirya eyithere. Amakanisa awandi akabya akatsuuka erikolha emikolere eyithe ya Nyamuhanga, awandi akasighalha inyaniimene kusangwa akabya inyayithaber'eko. Ekyi ni kusangwa endeka-theka eyi yikabutha abembembethya n'abikiiriirya, yikakulha-kulhanaya omuthima w'erihererya n'erikolha, kandi yikaka-kiiraya erikanyirira ly'erihengema n'erilhuua okwikirirya ery'okwenene.

EBIIBUULYO

1. Rom. 15:14 hakabuugha hathi abikiriirya mubathoka _____ ok'obuli muyiima.
2. Heb. 5:12 endambi mwanga _____
3. Thunatholere erikwama endekatheka ya Nyamuhanga n'omo thwangabya isithulhangire busana nakyi? _____
4. Obukristo bukalethera omundu y'e _____ eyirengererya.
5. Abandu bakigha erikangiiriirya erilhaba omo _____
6. Erihererya ndeke oyukahereraya akatholera inya _____
7. Sihali kyithunga ekyanga _____ busana nayo.
8. Amabwe awahambenie haghuma sya _____
9. Ekanisa nguma siyanga sondolha esindi omo _____
10. Thwanganalhangira esyanzumwa mbuya esiri okwiyitha-balha'ko ly'amakanisa? _____

EKY'ERYIGHA 12

EKANISA YIKASUNZIKANIIBAWA YITHI N'ENDEMA Y'EGAVUMENTE?

Emithwe Yomo Ky'eryigha

1. Ni misiindo yahi y'erisondolha ly'enoka.
2. Ni mithahi yahi endema y'ekyihugho?
3. Obwami bwa Kristo buli buthi ibubwene, kutse bw'amuthabali mughumma?

ERIGHANIIRYA KUBYO

1. Ni misiindo yahi y'erisondolha ly'enoka. Endambi eno ni kyibuya eryigha oko misondolere y'omobihugho imuthwathoka erisuunzikania n'emisondolere y'ekanisa. Hali misiindo isathu emikulhu y'erisondoler'amo: (a) Anarchy-kyimbunzange), (democracy-eriyibuughiiira), (c) Mornarchy-omwami oyuthebindulhawa). (a) Anarchy – obuthabale obuthawithe ndina-na-muthwe. Ni buthabale obwa kyimbunzange, sihali oyukabya inyali ahighulhu ok'o ghundi. Isihali mundu wahi oyuwithe obuthokyi. Omo buthabale obuli ng'obu hakabya isihali ulindire kyilhayiro obuli mundu ni mutsweeri. Sihalibya balindi b'obuhoolho kutse bathabali bosi-bosi abangalinda obuhoolho. Ni kwenene ekanisa obu sib'obusndoli yikwamire. Biblia yikatsweba abo abakaserembulha obusondoli obuli oko butheghekyi (II Pet. 2:9,10). Obukristo bukwamire obuthokyi bwa Kristo n'ekyiinywa kyiwe. Ekanisa ni kwenene siya busondoli bwa kimbunzange. Democray-eriyibughira, ni sondolhwa n'abandu ibobene-nibobene. Nisondolhwa n'obuthabale obw'abandu balyayisombolera. Omo buthabale bw'eriyyibughira (democracy), hakabya erisombolha ery'obuhoolho kandi ery'obuli mundu akayitsungir'amo isihali bulibathangania. Hano obuli muttaka awithe obwiranda obw'erisombolha kutse erisombolhwa eryingira omo buhererya. Omuthwe w'ekanisa, Kristo, syali bindulhawa. Sihali mundu-nzwiri omo kanisa oyuwangathoka erisuba omo kyitswa kya Kristo. Abikiiriya sibawithe bwiranda obw'erisombolha oghundi mwami. Eriyibuughira ni busondoli bubuya omo kyihugho mo hanu, niikwa isibiri bithya oko myatsi y'ekanisa. Omubiri wa Kristo ni bwami obuthe bindulhawa (Monarchy). Ni buthabale bw'omundu mug huma, yu-withe obuthokyi obwosi. Sihali mundu wahi oyuwithe obwiranda bw'eribuallya obusondoli bwiwe ngabuhikene kutse omusiindo w'obuthabali bwiwe ngani wahi. Ekyi kyikathuthokesaya erilhangira obuthabali bwa Kristo, ekanisa, omo muusiindo w'omwisi wayo owahikene. Yesu awithe obuthokyi

obwosi omo lhubulha nakuna kyihugho (Matt. 28:18,19). Ni mwami wethu kandi musondoli Yoh. 18:37). Thuli ahisi sy'obuthokyи bwiwe omo bwami bwiwe (Matt. 16:18,19). Ekanisa ni bwami obuthe binduka-binduka, Kristo musa y'omwami. Awithe amaka awosi n'obuthokyи obwosi.

2. Ni mithahi yahi eyomo ndema y'eGavumente? Emithahi y'endema y'ekyihugho ni: (a) Legislative-ekyithunga ky'epaliamente), (b) Judicial-ekyithunga ky'abatsweri), and (c) Executive-Presidenti). Legislative – ky'ekyithunga ky'egavumente ekyikakwika ebilhayiro omo kyihugho. Hano ekyithunga ekyi y'epaliamente ye Uganda kyokyikakwika ebilhayiro. Kyikasakanga ebilhayiro by'erihanga. Judicial ekyithunga ekyrimo esyambugha sy'ebilhayiro omuli abatsweri abakatswera ibanimanire oko bilhayiro by'erihanga. Ekyithunga ky'abalemi kyokyikakwama-kwamanaya ebilhayiro erighenderwako. Kyikimanirawa n'omukulhu w'abaminista, hano ni president. Omundu oyu y'omuthwe w'abasirikali omuli Police na abasirikaali abakalhangira ambu ebilhayiro by'erihanga bikaghenderaw'ako.

3. Obwami bwa Kristo sibuli binduka-binduka buthi, kutse bw'amuthabali mug huma buthi? Obwami bwa Kristo nibwa muthabali mug huma busana n'esyanzumwa isathu: (a) yuwakolha ebilhayiro, (b) mwabikangania n'erisoboly'abyo, kandi (c) yukalhangira athi bikalindawa. Yesu akakolha emanya omo myanya isathu ey'omo busondoli bw'ekihugho. Akahulhaw'amo ow'omughisa kandi iyo musa yumuthabali oyuthehambibawako n'ebilhayiro (potentate), omwami w'abami, kandi omukama w'abakama (I Tim. 6:15). Iyo y'omughalha w'abami ba munakyihugho (Erib. 1:5). Sihali namughuma omo bembembethya b'ekanisa oyuwasakianga ebilhayiro. Omuliumu Abuyirire mwakangania kutse mwa sobolya ebilhayiro biwe erilhaba omo masako w'abakwenda (Yoh. 16:13). Erikangiiriya lya Kristo likendisyat-swera abandu omo kyiyo ky'omuhindo (Yoh. 12:48). Ithwabosi thukendisyabanika embere sy'ekyithumbi ky'eritswera kya Kristo (II Kor. 5:10). Yesu y'omwami wethu, Omukama, Omukulhu, kandi muthabali. Ekanisa yiwe ni bwami obo abikiiriya babiry-a-ngirirw'amo (Kol. 1:13). Abosi abakingira omo bwami obu baminyerere nga ni bwami bwa muusiindo wahi obo balimo. Sihali mundu wahi oyukasa omo Kanisa eryas'abye mulemi. Sihali oyukingira omo Kanisa eryasa kolha bilhayiro. Abosi abakathomekawa oko Kanisa n'omukama bakabya bahererya abolho-bolho kandi ibali ahisi sy'obuthokyи bwa Omukama Yesu.

EBIIBUULYO

1. Ni kyiinywa kyahi ekyikaminyisaya kyithi “sihali musondoli”? _____

2. Ni kyiinywa kyahi ekyikaminyisaya “eriyithabali’ako”? _____
3. Ni kyiinywa kyahi ekyikamiinyiisaya kyithi “omwami yumuthabali)? _____

4. Ni muthahi wahi ow’ekyihugho awakalhangira athi ebilhayiro bikakwama-wa? _____
5. Ni muthahi wahi ow’ekyihugho owakasobolhaya ebilhayiro? _____
6. Ni muthahi wahi w’ekyihugho owaka kwika ebilhayiro? _____
7. I Tim. 6:15 hakahulha Yesu _____ owe _____ kandi _____ owe _____ akesyatwera oko muhiindo w’ekyihugho.
8. Omo Yoh. 12:48 Yesu mwabuugha athi _____ asyatswera oko kyiro ky’omuhiiindo.
9. Kol. 1:13 hakabuugha hathi thukalethawa omo Kanisa _____
10. Obwami bwa Kristo ni na bw’eriyiibuughira? _____

EKY’ERYIGHA 13

BUSANA NAKYI ABANDU BAKAKWAMA ABEMBEMBETHYA?

Emithwe Yomo Ky’eryigha

1. Bakasagha obuthokyi.
2. Bakayira amaha w’erihembwa (omubiiri kutse eriyighulirira) “ebisoko”.
3. Erikwama eby’erilhangirir’ako (erikopererya).

ERIGHANIIRYA KUBYO

1. Erisagha obuthokyi. Omo misiindo-misiindo y’omobwembe-mbethya mukabya ekyikaleka abandu ibakwama ab’embe-mbethya babu. Ekyighuma oko bindu ebi ly’erisagha obuthokyi. Omwembe-mbethya amabya ini w’ama-ka manene ng’omwami, abakwami biwe banganakuunwa erimwolhobera. Abakwami ng’abo bakubaha omwembe-mbethya oyu yokutsibu kandi bakasagha bakabulha ngabanga-thoka bathi erithendimukwama. Obukristo sibulikolesaya erikaka abikiiriiryra erikwama ab’embembethya babu. Nyamuhanga syalyatha kaka abandu erimwowa. Nomo kyine ambu Yesu awithe obuthokyi obwosi, syalikaka mundu eryowa. Abakamukwama bakamukwama busana n’eriyisombolera. Omundu n’omwangathunga buthokyi bungahi obw’omo kyihugho, syangakaka abandu b’omokanisa erimukwama. Sihabye musondoli w’ekanisa wahi, oyutholere erigherya ery’embembethya ambu kusangwa abandu bamusaghire. Abikiiriiryra niberisagha Setani, niikwa isi balyubaha mundu. Yesu mwakania okwithendyubaha oyo oyukiitha omubi-ri (Matt. 10:28). Ab’embembethya b’ekyihugho bang’embembethya omwi-

kolesya obuthokyti niikwa ab'ekanisa isi kuthya. Biblia yikabuugha yithi omo lhwanzo simulibya buba, yithe kusangwa olhwanzo oluhuhikene lhukahigha obuba (I Yoh. 4:18). Sihabye mundu wangalengekania athi angabya mw'em-bembethya omo kanisa busana n'erikaka kutse athi abandi bakendyubaha obuthokyti bwiwe.

2. Bakayira amaha w'erihembwa (omubiri kutse eriyighulirira). Eky-ilhubirilhwa ekyindi ekyikathuma abandu ibakwama ab'embembethya ly'eribya ibakanza ebihembo kutse erighulirilhwa. Ekyo kyo kyireka omundu inyakwama ebyosi ebyo mukama wiwe akamulhaghira. Akasonda ebi-hembo eby'akendithuuha. Ekyi nakyo ni nzumwa abandu banzire erighulirirwa imubathoka eryolhobera erilhayira ly'omwembembethya. Abandu banzire erighulirirwa. Omubiiri ogho ghulyathunga isikuli eriyihembe-rera, niwa kyitsumbi. Sihali kyithere ok'omukoli erihembwa busana n'omubiiri owalyakolha. Niikwa ekyi siyo nzumwa eyireka ahabya erikwama omwem-be-mbethya omo kisomo. Abakwami abandi abathakwamire omo kwenene bangasondi-kwama omwembe-mbethya busana n'amaha aw'erihebwa Biblia kutse ebundi bihembo. Abandu bakagheraya eribya bembe-mbethya b'ek-isomo ambu bangathung'ayo esyombuulho. Niikwa ekyilhubirilhwa ekyi sikuitholere eribya ekyokyika kuuna omundu eribya munya-kyisomo. Abakulhu bakalhaghira wa erilebererya oko mbuuli "isi habwa eryanza erihembwa, niikwa busana n'obulengekania obw'eryanza" (I Pet. 5:2). Omughulhu akanahika omwikiiriya oyuwithe oko bindu inyalengekania athi akendi thabalha oko Kanisa busana n'esyombuulho syiwe. Anganalengekania athi eriyisunza liwe ly'erikendikwamwa kusangwa angahererya mbuulho nene. Ekyi sikyo nzumwa eyikaleka iwabya wa kyitsumbi omo kanisa. Olhwanzo lw'esyombuulho lhukatholera ilhwabya hali omo myatsi y'ekanisa. Eyi yo nzuuko y'amalholho awosi (I Tim. 6:10). Lhukaletha obulibathangania omo b'embembethya kandi n'omo biikiiriya. Kyikathokesaya abandu abatholere obw'embe-mbethya ibaghulha obw'embe-mbethya obuthabatholere. Sihabye mundu wahi ery'embembethya kutse erikwamwa omo kanisa busana n'esyombuulho.

3. Erikwama eby'erilhangirir'ako (erikopererya). Enzumwa engulhu omo bw'embembethya ey'erilhangirir'ako omo kanisa ly'erikwama ebyo omw'embembethya akakolha. Abandu bakakwama ab'embembethya babu omo Kanisa kusangwa bakanza eribasosa kutse erikolha ngoko bakakolha. Ekyi ky'ekyilhabire okwiamba oko bandu kwilhaba ebundi ebyosi. Obw'em-bembethya bw'omuthina oyu bukahuulhukaya ab'embembethya babuya. Kyikaleka obw'embembethya by'omundu ibwakwamana n'emitse yiwe. Erith-

omeka okw'ekyo eritheka eky'erilhangirirako kyikahiira embere sy'abikii-rirya ekyilhubirirwa ekyisiikiire embere sy'abikiiriiry. Eritheho eky'erile-beryako ky'okyindu kyikulhu kutsibu omo bw'embembethya bw'ekanisa. Emikolere eyi yikwamakwamene n'ebi'erilebery'ako omo Biblia yikakania oko buhererya bw'obwembembethya.ni kyo kyibohooli omwiminya ndeke obw'embembethya bw'ekanisa. Yesu yu ky'erilhangirir'ako ekyirengire ekyo ekyihugho kyamabirithaminya. Biblia yikabuugha yithi mwatsuuka erikolha hayiima n'erikangiiriiry (Emib.1:1). Sithuli kakawa eryolhobera erikangii-rirya lyiwe. Sihali lhagha bihembo oko bakwami biwe niibya. Niikwa Yesu y'omuthabali mukulhu oyuwamathaby'aho. Abandu bangyi babirimuyisam-ulira kwilhaba ghundi muthabali wosi. Ni kusangwa akaleka ibanza eribya ngayo. Akathukanganaya obuthokyi obukalhuua omo ky'erileberyako. Erigh-erererya eky'erileberyako yonzumwa eyihikene eyikaleka abandu ibakwama ab'embembethya babu.

EBIBUULYO

1. Kristo akana kaka abandu erimukwama? _____
2. Matt. 10:28 hakabuugha hathi ghusaghe oyowangathoka _____
3. I Yoh. 4:18 olhwanzo olhwa _____ lhukahigha _____
4. I Pet. 5:2 hakahulha esy'obuulho mo _____
5. I Tim. 6:10 hakabuugha hathi _____ e _____ niyo nzuuko y'e_____
6. Ni kyiinywa kyahi ekyikaminyisaya erigherya eribya ng'omwembethya _____
7. Emibiiri1:1 hakabuugha hathi Yesu mwatsuuka eri _____ n'eri _____
8. Nindi omw'embembethya oyuwamathayiriby'aho oyulengire abandi omo kyihugho? _____
9. Erihebwa omubiiri ery'ekitsumbi siriri banika eyiihya sy'ekanisa?

10. Ni nzumwa yahi eyirengire, eyikaleka omw'embembethya inyakwamwa?

EKY'ERYIGHA 14

EKY'ERILEBERY'AKO OMO KANISA NI KYIKULHU KYITHI?

Emithwe Yomo Ky'eryigha

1. Busana n'ekyo kyerilebery'ako kyikamiinyisaya.

2. Busana n'eriyitsuutsa eky'erilebery'ako.
3. Buasana n'obuthoki bw'ebyerileberyako.

ERIGHANIIRYA KUBYO

1. Busana n'ekyo ky'erilebery'ako kyikamiinyiisaya. Eky'erilebery'ako nikyisosano kutse erikangania ekyisosirekyo. Kyikaka-nganaya isikwamiikania kukyo. Ni kalhandirira akakanganani-bawa embere sy'abandi imobathoka erigherererya n'erikwama ndeke ekyo balyalhangira. Biblia yikabuugha yithi Kristo mwathu-siighira eky'erilhangirir'ako athi thwangakwama ebisandu byiwe (I Pet. 2:21). Yesu abiribbasula olhughendo olhw'engebe embere syethu niikwa thwangathoka erikwama omo bisando byiwe. Enzira y'erilhabamo yolhobire eriminyerera kusangwa thwabiribana eky'erilhangirir'ako eky'erikwama. Eky'erilhangirir'ako kyiri kyithya. Ekyiinywa "eky'erilhangirira'ako" n'ekyiinywa "ekyerilebery'ako" bisosene. Abosi baminya eky'erilebery'ako nga nikyi. Omusuburi akabya akaghulya omo kathale, akakanganaya eby'erilebery'ako esuburo yiwe. Akanza erikangania ebindu ebyuwene ndeke omo bindu akaghulhaya athi abandu imobanza erighulha oko byiwe. Syalikaka abandu erighulha aliryo akabasoha-sohaya athi baghule erilhaba omo bindu ebithekire aho ebiwen'enga. Ekyi kokyine kyithya oko ngebe y'obwiikiiriirya. Yikatholera iyabya eky'erilhangirir'ako eky'erikolha ng'omukulhulho abandu imo bathoka erikurirwa eyiri Kristo. Erikangania eky'erilhangirir'ako kyanganabya kyibi kutse kibuya. Biblia yikabuugha yithi emiiyi eyitsandire eye Sodomo na Gomora biri embere syethu thwangathoka eribilhangirir'ako (Yud. 7). Ni by'erilhangirir'ako bibi. Bikalhangiriraw'ako erithuuuhuulya lya Nyamuhanga oko banya malholho. Ababya isibayiketherwa omo banya Isaleri omughulhu babya omo mbwarara, ni ky'erilhangirir'ako kyethu munabwiire (I Kor. 10:6,11). Eby'erilhangirir'ako, nokweryo, ni byuutsuutsu, eby'erilebery'ako, kutse ebyo thwangalhangirir'ako ekyo Nyamuhanga anzire ithwakolha kutse eky'athanzire ithwakolha. Obuli mwiikiiriirya ni ky'erilebery'ako ekyibuya kutse ekyibi. Obuli ndambi akakanganaya abandi obubuya kutse obubi. Eby'erilhangirir'ako ni bikulhu omo Kanisa kusangwa bikakengawa lhuuba neryo ihabya erikwam'abyo.

2. Busana n'eriyitsuutsa eky'erilebery'ako. Eby'erilebery'ako ebyuwene nibya mubongo eribya omo Kanisa kusangwa biyitsutsirwe kutsibu. Nyamuhanga mwathuma omwana wiwe ekyusa, kusangwa ekyihugho kyabya kyiwithe obwagha bw'ekyerilhangirir'ako ekyihikene kyo kutsibu. Nyamuhanga aby a nyabirikolerana n'abandu habwa mughulhu muuli, niikwa erikolya aho Yesu asira hasa niho babya baminyerere Nyamuhanga yondeke-ndeke.

Ekyihugho kyabirilholha oko bakangiiriiry a'abembembethya banene abasiikiire, niikwa isimuli oyowangathoka erikangya eky'erilhangirir'ako liriryo Yesu musa. Abandu bakwire enyotha ey'erilhangira erikangiiriiry a'lye Yesu likabanika omo mikolere y'abikiiriiry abamukwamire. Ekyihugho kyikathulikira n'abakangiiriiry b'ebindu muthina-muthina. Niikwa omukangiiriiry oyukakolha ebyaka kangiriiraya sikyanguhire eribanika. Omuthuuliiri Timoteo mwabwirwa eriyirinda iyuwene-wene kandi n'omwebyo akakangiiriiry imwathoka eriyilhamya hayiima n'abo abowa erikangiiriiry a'lyiwe (I Tim. 4:16). Omo kanisa muli bandu bangyi abayisunzire eribya bembembethya, niikwa muli bake abanzire eribya by'erilhangirir'ako. Eriyiitsuutsa lyoswire omo kanisa hayiima n'eyiihya sy'ekanisa. I Tim. 4:12 hakabuугha hathi Timoteo aby'e kyerilhangirir'ako "oko" bikiiriiry. Omulhondo oyu omo Biblia eyabindulhawa liinyuma (Revised Stardad Version) akabuугha athi Timoteo akatholera eribya ky'erilhangirir'ako "embeere" sy'abikiiriiry. Hali eriyiitsuutsa ab'embembethya eribya b'erilhangiriir'ako kandi n'ekanisa iyoyene-yene eribya ky'erilhangirir'ako embere sy'ekyihugho eyiihya. Ekyihugho kyiwithwe obwagha bwe by'erileberyak, n'ekanisa yikwire enyotha ey'ebi'eberryak ebibuya ebyo yangakwama. Eby'erileberryak nibya mubongo kusangwa obwagha bwabyo ni bunene kustibu.

3. Busana n'obuuthoki bw'ebi'eberryak. Eby'erileberry'ako ebitholere biyisunzirwe kutsibu busana n'obuthoky biwithe. Paulo mwabuугha athi emibughire yiwe n'erikangiiriiry a'lyiwe sibirikolha-kolhaya eryibuukya amenge w'abandu, athi niikwa erikangiiriiry eryo "ni kyerilhangirir'ako omuliumu hayiima n'obuthoky" (I Kor. 2:4). Emibere ya Paulo muyabya y'amaka kusangwa abya ky'erilhangirir'ako ekyisiikiire. Abandu bangathuuilira eby'eryigha ebiri omo buthoky kandi isibathabuугha na kyiinywa na kyighuma. Biblia siywithe ekyo yisakire yithi Aberi abya abuughire. Niikwa inyanakwire, akakanaya erilhaba omo ky'erileberry'ako (Heb. 11:4). Enoka, Abraham, na Yosua sibabya mbuuyii, niikwa babya bandu bakoli. Thaghanirya ok'obuthoky bw'erilhangirir'ako bwabu. Ekanisa y'omukama omo mughulhu ono, yiwithe esya mbuuyi nyinyi, abakabuугha niikwa isibendikolha. Ob'wembembethya bw'omusiindo oyu bukabya isibuwithe mani (ibuluhire). Niikwa omw'embembetha embangyi y'omundu oyukatholera ekyitsumbi eriilhwa omo bandu. Bakamughereraya busana n'emite yiwe mibuya. Akathunga mukulhulho n'obuthoky busana n'obubuya. Engebe yiwe niyabuthoky omo kanisa hayiima n'eyiihya. Thasamalira ngoko engebe ya Yesu yabiribindulha ekyihugho! Emyaka eyilhabire oko 1900 bandu bangyi abayiherery'eyo kutsibu bakagheraya eribya nga Yesu. Abirib-

indulha emilengekanirye y'abandu bomo kyihugho kwilhaba bandi bosi wamabasamalirira haghumerera. Amami n'abathabali bangyi esyambangyi babirithera n'eryibiriranwa, niikwa obuthokyi bwa Yesu bulholhaya embere n'erikulhakulhana. Sihali mundu uwithe buthokyi obw'obwengebe ya Yesu yangabindulha omo kyihugho ky'amalholho. Eby'erilhangirir'ako ni kyindu kya mubongo omo kanisa busana n'obuthokyi obwo kyikaletha.

EBIBUULYO

1. I Pet. 2:21 hakabuугha hathi Yesu mwatusighira _____
2. Aho hali misiindo mingahi y'ebyerilhangirir'ako? _____
3. I Tim. 4:16 hakabuughha hathi muyitheghaye oko _____ noko_____
4. Eky'erilhangirir'ako kyinawithe buthokyi kwilhaba esy'ombuulho?

5. I Kor. 2:4 hakabuughha hathi erikangiiriya lya Paulo lyabya _____ oko Muliimu n'obuthokyi.
6. Heb. 11:4 hakabuughha hathi Aberi inyanahoolire niikwa _____
7. Nindi oyuli ky'erilhangirir'ako ekyirengererye munakyihugho ? _____
8. Hereraya ebiinywa bibiri ebikaminyisaya ekyiinywa “eky'erilebery'ako”

9. Heb. 4:11 hakabugha oko ky'erilebery'ako ekya _____
10. Abanya Isaleri ibane omo mbwarara, mubanabya ky'erilhangirir'ako kyethu? _____

EKY'ERYIGHA 15

NI BAHI OMO KANISA NIBO KY'ERILEBERY'AKO?

Emithwe Yomo Ky'eryigha

1. Kristo.
2. Abakulhu n'abawathiikya.
3. Abathuuliiri.
4. Ababuuthi.
5. Abikiiriya.
6. Obuli mwikiiriya omo kanisa.

GHANIRAYA KUBYO

1. Kristo. Biblia yikaka-nganaya obukulhu obuli omo ky'erilhangirir'ako omwikangania obuli mukoli w'ekanisa n'obuli mwikiiriya akatholera inyabya iyo ky'erilhangirir'ako. Abikiiriya sibalibindulha abandu erilhaba omwibakaka kutse omw'ibaghulirira. Liriryo obuthokyi obw'eriba bindulha

bwangalhuua omwibalhangirir'ako. Yesu iyo mwatsuuka eriyikoh'amo ekyosi ekyo omwikiiriya akasabawa erikolha. Mwatsuuka erikolha kandi n'erikan-giiriya (Emibiiri 1:1). Mwathusighira eky'erilhangirir'ako athi thwangakwama ebisando byiwe (I Pet. 2:21). Y'omuhereeri wethu mukulhu oyukayowa ngoko thukayowa, thwamayowa nabi nayo akayowa nabi. Mwalengw'ako omo mibere yosi ng'ithwe kothukalengawako niikwa mwathakolha kyibi (Heb. 4:15). Yesu yu muliisya mukulhu oyukasondolha esya mbuuli syiwe isyali sihararaya (I Pet. 5:4). Abaliisya b'omo mughulhu wa Yesu ibaka ke-saya hakuhi n'esyambuuli syabu. Obuli mbuuli ibakaminyayo nguma-nga-uma. Omuliisya inyawithire embuuli yiwe y'olhwanzo, n'embuuli iyikanza omuliisya wayo n'eryanza erimukwama. Omuliisya omughulhu oghosi inyakabya embere y'esyambuuli. Inyakakangay'asyo enzira y'erikwama. Isyali huunz'asyo n'erikak'asyo eyihi. Inyakasondolha omo bwolho-bwolho neryo isikanza erimukwama. Oyo ghomusiindo w'omuliisya ogho Kristo ali.

2. Abakulhu n'abawathiikya. Ngabalebererya n'abawathiikya ab'ekanisa eyosi, abakulhu n'abawathiikya bakatholera ibabya ky'erilhangirir'ako embere y'esyambuuli. Abakulhu b'e Efeso mubabwirwa eritsuuka eriyiitheya ibobene-bene neryo imubatheya esyombuuli (Emibiiri 20:28). I Pet. 5:3 haka buugha hathi, "isibabya bami oko kyihyo ky'omukama, niikwa ibabya ky'erilhangirir'ako embere y'esyambuuli". Ebyo abakulhu bakatholera ibabya y'enzira ey'eribya ky'erilhangirir'ako embere sy'abikiiriya kandi n'embere sy'ekyihugho. Abawathiikya b'erimbeere mubasombolhwa kusangwa banya bandu abakanibaw'ako ndeke, iboswire omulimu Abuyirire, n'amenge (Emibiiri 6:3). Abawathiikya batholera ibatsuuka erisiimwa n'erisangwa isi-bawithe kahinira (isibaliko kyibuulyo), isibaliko ekyikahemulha (I Tim. 3:10). Abakulhu n'abawathiikya kwenene bakasombolhwa kusangwa bawithe eby'erilhangirir'ako. Ekanisa yikanza eribawkwama kusangwa esyo ngebe syabu ni sy'erilhangirir'ako. Isibasombolhwa kutse erikwamwa busana na nzumwa yindi. Endema y'obwami bw'Omukama yiseghemere oko by'erilhangirir'ako. Abakulhu n'abawathiikya omughulhu bakatsweba omughuma oko bikiiriya, esyongebe syabu sikatholera isyabya isisiriko kyibuulyo. Biblia yikabuugha yithi omukulhu syanga sondolha erihika lya Nyamuhangana kandi eka yiwe iyinamulemire (I Tim. 3:4-5). Nayo akatholera inyabya inyakanibaw'ako ndeke n'abandu b'eyiihya sy'ekanisa (I Tim. 4:12). Ebakulhu n'abawathiikya bakatholera ibabya ky'erilebery'ako.

3. Abathuuliiri. Ekyindi ky'erilebery'ako ekyikulhu embere sy'abikiiriya y'omuthuuliiri. Abathuuliiri bakabwirawa, "Ubye ky'erilebery'ako" (I Tim. 4:12). Bakatholera eribya ky'erilhangirir'ako omo kathi, omo mib-

ere y'esyangebe syabu, omo lhwanzo, omo muliimu, omwikiiriirya, iberire. Paulo mwabwira Timoteo eriyiitheya iyuwene-ni-yuwene kandi n'omwikii-riirya kutse erikangiiriirya (I Tim. 4:16). Omwithek'aho eky'erilhangirir'ako, hayiima n'omwika-ngiiriirya, angabere inyakendiyilhamya kandi inyal-hamya n'abakowa erikangiiriirya lyiwe. Paulo mwabuугha n'abikiiriirya be Tesalonika, “inywe munasi ngoko mukatholera erithukwama: kusangwa muthuthayithwalha tsatsambu embere syenyu” (II Tes. 3:7). Paulo mwasobol-ha athi emikolere yiwe niyikolhamo eky'erilhangirir'ako ky'abandu (omul. 9). Abathuuliiri bakaghereraya Kristo imubathoka eribya eky'erilhangirir'ako kyibuya embere sy'ekanisa.

4. Ababuuthi. Aba thatha abikiiriirya n'abamama bakatholera erib-ya eby'erilhangirir'ako ebisikire embeere sy'abana. Timoteo akyine mulere aby'awithe nyinya wiwe omubuya embere syiwe (II Tim. 1:5). Sihali ky'erile-bery'ako ky'amaka emibere sy'omwana ekyirengire ekyo eky'oko babuuthi. Omwana anasi omo kwenene eby'ababuuthi biwe bakakolha. Syangatheb-wa. Ekyi kyikaleka abakaali bangyi, abakabya isibangathoka erisoma kutse erikangiiriirya Biblia, ibakangiiriirya erilhaba omo by'erilhangiirir'ako. Aba-buuthi nib'omubongo omwilholya embere kutse eribya by'erilhangirir'ako omo Kanisa.

5. Erihiinda-hiindana. Eby'erilhangirir'ako ebyo abikiiriirya abosi baka-kanganaya abandi, bikabya bibi kutse bibuya. Ekanisa ye Tesalonika muyasii-ma eribya ky'erilhangirir'ako ekyisiikiire embere sy'abosi abikiiriirya omo bulhambo bwabu (I Tes. 1:7). Amakanisa amakeku (amatseke) anganathunga omuuuhwa erilhusirirya oko ky'erilhangirir'ako eky'ekanisa eyindi eyimene ndeke. Ebisomo n'abathikiriryre banahandire ameso woko by'erilhangirir'ako eby'obuli kanisa. Yesu mwabuughha athi abandu biwe bakesyabya ng'omuyi owahimbire oko kyithwa owathe angabiswa (Matt. 5:14). Mwabuughha athi obuli mwikiiriirya niw'eribya kyakakalha, neryo bamabiribya haghuma, bak-abya ng'omuyi owakakangabasanaya neryo inyalhangirika inyane hali kusti-bu. Amakanisa niw'eribya ky'erilhangirir'ako ekyibuya.

6. Obuli mwikiiriirya. Ekanisa siyangabya kyakakalha ekyikakolera-aya kutsibu, obuli mwikiiriirya athekoleraya kutsibu. Yesu akanaya ok'obu-li mwikiiriirya mug huma-mug huma,, “Omwiisi wenu akolereraye embere sy'abandu” (Matt. 5:16). Engebe y'obuli mwikiiriirya ni kyitabu ekyasibwe n'erisomwa n'abandu abosi (II Kor. 3:3). Obuli mwikiiriirya w'omo kanisa y'omukama akatholera inyabya ky'erilebery'ako kyibuya eky'omundu oyuso-sire Kristo.

EBIIBUULYO

1. Heb. 4:15 hakabuugha hathi Kristo ni _____ mukulhu?
2. I Pet. 5:4 hakahulha Kristo moky? _____
3. Emibiiri 20:28 hakakanganaya abakulhu eriyitheya oko _____
4. I Pet. 5:3 hakasaba abakulhu eribya _____ oko sy'ambuuli.
5. Hereraya mulhondo mug huma owakakanganaya athi abahererya bakatholera ibabya ky'erilebery'ako._____
6. I Tim. 3:7 hakabuugha hathi abakulhu bakatholera ibabya ibaka _____ n'abandu.
7. I Tim. 4:12 hakabwira abathuuliiri' hathi "mubye _____".
8. I Tim. 4:16 hakabwira abathuuliiri eriyitheya oko bindu bibiri, ni byahi?

9. II Tim. 1:5 hakahererya eriina lya mama wa Timoteo iniyo _____ na mukaka wiwe iniyo _____
10. Hereraya emilhondo ibiri eyikakanganaya yithi amakanisa akatholera in-yabya ky'erilhangirir'ako: _____

EKY'ERYIGHA 16

NI BITSUMBI BYAHI EBY'EMIIBIIRI EBIRI OMO KANISA

Emithwe Yomo Ky'eryigha

1. Abakulhu.
2. Abawathiikya.
3. Abathuuliiri.

ERIGHANIIRYA KUBYO

1. Abakulhu. Lino thukayigha aho emiibiiri yikabanika omo kanisa ey'abembembethya b'ekanisa. Hano ghukatholera iwatsuuka eriminya ekyiinywa "ekyaghanda-office" ngakyikamii-nyisay'akyi. I Tim. 3:1 hakabuugha hathi, "omundu amanza eribya oko mubiiri w'obukulhu bw'ekanisa inyakayiitsuutsa mubiri mubuya". Ekyi kyikakanganaya kyithi ekyiinywa ekyaghanda (office) omo myatsi y'ekanisa kyikamiinyisaya "omubiiri". Omubiiri omo kanisa ni lhukwamirwa lhw'erikolha. Abangyi bakalengekanaya bathi abakoli b'omokanisa y'omukama bakabya ng'abakoli begavumente. Bakalengekanaya bathi bakabya ibawithe emeza n'ekyaghanda neryo ibabya bakakwamirilhagiiriya oko bandi ambu emiibiiri yikolhawe. Ebyaghanda bingyi omo suburo n'omo gavumente byabiritsanda omo kyihugho kyosi. Abali omo bitsumbi by'obuhererya bakayighulirira ambu bangathunga esy-

ombuulho esy'anguhire (easy money). Ebitsumbi byabu ebi bakalengekanaya bathi niby'eribatsunira okwithendikolha. Bakalengekanaya bathi ebitsumbi byabu ebi nibya highulhu kutsibu, ambu niikwa kuli erikolha like. Abakoli b'omo Kanisa y'omukama bangana-suunzikaniibwa n'abakoli abomo mali-ma w'engasi. Omulhume mug huma awithe olhumimbi olhw'erisamba omo mithi n'eriithwa ebighuma. Omukali anganathunga omubiiri ow'erisong-ya-songa n'eriheka ebighuma by'engasi. Neryo oghundi mulhume inyahond'abyo n'eritumba amaghutha. Abosi bakatholera erikolha butswiri-tswiri omo ngwamirwa esibalya yisinga. Omo muusiindo oyu, abakulhu bawithe olhumimbi olw'erikolha, nab'athuuliiri bawithe olhwabu lhumimbi, obuli muyiima awithe aho akendikolera. Ekyo kyo-kyikaminyisaya "ekyaghanda" kyiwe. W'omubiiri wiwe kutse omuusiindo w'erikoler'amo. Abakulhu bawithe omo kanisa mw'olhumimbi olhw'erilebererya (I Pet. 5:2). Ni balebererya (Emib.20:28). Bakalebereraya busana n'ebirimo by'abikiriirya (Heb. 13:17). Nibo baliisyba ba kyinyamuliimu oko sy'ombuuli (Emibiiri 20:28).

2. Abawathiikya. Abawathiikya nibahererya omo kanisa. Ekyiinywa "deacon" kyikamiiyiisaya "omuwathiikya". Nomo kyine ambu abikiiriirya abosi nibawathiikya abolho, abawathiikya ni bandu abathendekire busana n'erikolha erisonda ly'ekanisa. Omo kanisa ye Yerusalem abalhume baba ya bayiisunzirwe erihererya oko meza kutse erilhangira bathi abikiiriirya abathe yithoka bakahikaw'ako ng'erisonda lyabu ko liri. Omubiiri oyu mwahebwa oko bahererya ab'erimbeere (Emibiiri 6:1-6). Ebyo abahererya bakatholera ibabya bikathukanganaya bithi, bakatholera ibabya balhume b'emite mibuya hayiima n'omuuuhwa. Ni balhume abawithe erisiimwa omo kanisa busana n'esyon gebe syabu kandi n'emikolere (I Tim. 3:8-13). Bawithe aho bakatholera omo kanisa, ngoko abakulhu banawithe aho bakatholera. Ekyi kyokyika-miinyiisaya omo kyiinywa "ekyaghanda kutse omubii-ri w'obuhererya" (I Tim. 3:13). Abakulhu n'abawathiikya basa omo Biblia nibo bawithe ebitsumbi (emiibiri). Ebindi bitsumbi nya-mungyi n'esya them-be-thembe ebikasangawa omo bisomo sibiryowibaw'ako omo masako. Omo Fil. 1:1, Paulo mwahandikira ekanisa ye Filipi iyinawithe abakulhu hayiima n'abawathiikya. Abakulhu n'abawathiikya ni bakoli b'ekanisa.

3. Abathuuliiri. Omuthuuliiri si mukoli w'ekanisa, liriryo awithe ol-hukwamirwa olhw'erikolha. Paulo mwabwira Timoteo athi akole omubiiri ow'omuuthuuliiri (II Tim. 4:5). Omuthuuliiri ni muthuuli w'engulhu. Omwanya wiwe ow'engabane owakakoler'amo. Nomo ekanisa ye Filipi yanabya yiwithe abakulhu hayiima n'abawathiikya (omul.1), Paulo mwabalebeka Timoteo eriyakolha omubiiri ow'omuthuuliiri abya w'erikolha (Fil. 2:19).

Abathuuliiri bakabya ahisi sy'obulebererya bw'abakulhu ngoko abandi bikii-riirya bane. Omuthuuliiri anemukolera ahisi sy'obusondoli bw'abakulhu akatholera inyasiky'abo (I Tim. 5:17). Niikwa obuthokyi bw'omuthuuliiri si-kyo ekyiinywa ky'omukulhu, niikwa ekyiinywa kya Nyamuhanga. Biblia yika-kanganaya yithi omukulhu oyuthayithondekire akatholera inyasuyirwa nibya kyamayitsuutsa kyithya, ambu abandi bangabya n'eryuubaha (I Tim. 5:19). Nyamuhanga anawithe omwanya w'abathuuliiri kandi anawithe n'omwanya w'abakulhu hayiima n'abawathiikya. Obuli mug huma okw'aba akatholera in-yabaya inyahikire erikolha omubiri wahi okw'eyi. Obuli mug huma akatholera in-yabaya inyanasi omwanya ow'akakoler'amo omubiiri wiwe neryo inyathoka erikolha omubiiri ow'o Nyamuhanga alyayiisunza akole. Ko bithya, n'abikii-riirya abosi bakatholera ibabya ibanasi emiibiiri ey'abakoli banu bakathol-era erikolha. Isi habaya bandi bakoli kutse byaghanda bithe ibyan'ebya abakulhu hayiima n'abawathiikya. Sihabanike muthuuliiri oyukimaya omu-biiri w'obukulhu obw'erisondolha ekanisa. Liriryo obuli muyiima aminye n'erikenga ndeke emyanya eyiri omo mubiiri wa Nyamuhanga omo kanisa. Neryo obuli mundu akole mubiiri wahi owakathoka kandi ow'amutholere erikwamana n'eriminya lyiwe.

EBIBUULYO

1. I Tim. 3:1 hakabugha athi omubiiri w'omukulhu ni mubuya _____
2. Ni bitsumbi bibiiri byahi ebiri omo kanisa (Fil. 1:1) _ na __
3. Heb. 13:17 hakabuугha hathi abakulhu bayitheghaye omo kyitswa kya _____

4. Ekyiinywa Omuwathiikya kyikamiinyiisaya _____
5. II Tim 4:5 hakabuughahathi Timoteo abyaw' erikolha _____
owa _____
6. Abasamaliri b'ekanisa ni bahi? (I Pet. 5:1,2) _____
7. Abakoli b'ekanisa bali ng'abakatumba engasi. Obuli mug huma awithe _____ lhwiwe.
8. I Tim. 3:13 haka-kanaya oko _____ lhw'omuwathiikya.
9. Ni kihandi kyahi ekyikakanaya okw'isombolha ery'omuwathiikya oyuwat-suuka? _____
10. Omuthuuliiri ni mulebererya w'omukulhu? _____

EKY'ERYIGHA 17

AMENA W'ABAKULHU NI WAHI?

Emithwe Yomo Ky'eryigha

1. Elders- Abakulhu.
2. Presbyters - Abaliisya.
3. Bishops - Abakulhu.
4. Overseers - Abathungereeri.
5. Pastors – Abaliisya.
6. Shepherds – Abaliisya.

ERIGHANIIRYA KUBYO

1. Abakulhu-Abakulhu omo kanisa y'omukama bawithe amena mukagha. Obuli riina liwithe kyindu kyikulhu ekyo likamiinyiisaya. Erilhaba omwikangiiriibwa ok'obuli riina, bingyi bikendiminywa ebihambire oko mii-biiri eyi. Eriina erikabanika lhuba-lhuba ly'eriina Omukulhu- “Abakulhu”. Eriina “omukulhu” likamiinyiisaya “omundu oyukuulire omo myaka”. Ekyi kyikakaniibawa ok'omundu oyukuulire omw'ikiiriirya kandi ikyamiinyiisaya oyukuulire omo myaka. Abakulhu ni bandu abikiiriirye kutsibu kandi ibanasi emyatsi minene ey'obwikiiriirya. Sibangabya bikiiriirya bahya-bahya (I Tim. 3:6). Si ikwami-buugha ambu omusyakuulhu w'omobulhambo kusangwa ni mukulhu omo myaka neryo ase abye mukulhu w'ekanisa. Anganabya iyo mukulhu oko bosi abali omo kanisa, niikwa ekyo sikirimiiinyiisaya ambu atholere eribya Mukulhu w'omo kanisa. Anganabya iniyo watsuuka eribya mwikiiriirya niibya, niikwa ekyo sikiri muthuungananaya eribya Mukulhu w'omokanisa. Biblia yikabuugha yithi Paulo mwabirikiira abakulhu b'ekanisa abe Efeso (Emibiiri 20:17). Omo miiyi mingyi obuli Kanisa iyikayisombolera abakulhu (Emibiiri 14:23). Tito mwasiwa eKret ambu asighale akasingika Abakulhu om'obuli Muuyi (Tito 1:5). Eriina “elder-Omukulhu” likakanganaya lithi abalhume aba inibakulhu kandi ibakulire nomo bw'ikiiriirya. Ibawithe erisikiibwa erikalethawa eribugha emyaka minene iwune wa-kwenene.

2. Abaliisya -Presbester. Erina eri likamiinyiisaya omukulhu omo Kanisa. Ekyiinywa ekyi kyikamiiinyiisaya omundu mukulhu oko bandi. Kyikasanganawa omo Biblia ngendo nguma nyisa (I Tim. 4:14). Kyiwithe misabolere mighuma ng'ekyiinywa “abakulhu” kandi kyikatholera ikyakolesiibwa erikwamana n'erisoboolya eriri ahighulhu.

3. Abakulhu -Bishop. Eriindi riina ery'abakulhu ni “Bishops” kyikaminyiisya “abathungereeri”. Kyikasanganawa omo I Tim. 3:1,2; Tito 1:7;

Fil.:1. Halebe kyikakolesiibawa bakakania oko Yesu ng'omuthungereeri ow'emithima yethu (I Pet. 2:25), kandi n'oko mwanya ow'erilhangirir'amo owo Yuda Sikaliota awir'amo (Emibiiri 1:20). Eriina eri likakolesibawa oko Bakulhu, likakanganaya omubiiri o'werilebereerya ow'abakulhu bakatholera erikolha. I Pet. 5:2 hakabuugha hathi bakatholera ibathunga ameso awakalhangirira hali. Ekyi kyikathasya hamaya oko bulengekania obukabuugha buthi abakulhu sy'ikolha emiibiiri eyosi ey'erikangiiriya n'eriembembethya abandi, niikwa bakalebereeraya n'oko bandi bakakolha eyindi miibiiri. Bakatholera ibasondolha kutse ibalebereerya emiibiiri eyikakolhawa omo kanisa. Ngoko ebithunga ebyosi bikatholera ibyabya ibinawithe abathungereeri, ekanisa y'omukama nayo yikathunga abakulhu kutse abathungereeri.

4. Abalebererya - Overseers. Ngoko thulyalhangira ahighulhu, ekyiinywa ekyi kyikamiinyiisaya kyindu kyighuma ekya - abalebererya. Kyikakolebawa omo hiinywa hibiiri: "lebaya" na "erya". Omutheya (omuthungereeri) akalebereeraya oko Kanisa. N'erilhangira eribya ndeke ly'ekanisa hayiima n'oko mibiiri yayo. Emibiiri 20:28 hakabuugha hathi Mulimu Abuyirire abya inyabirikolha Abakulhu ba Efeso mu balhangiri b'esyombuuli. Babya b'eriyyitheyabebene-bene "kandi noko bihyo ebyosi". Lhwabya lhukwamirwa lhwabu erikakiiryabebene-bene ab'amathehi ababya ibakendisyasa (omul. 29, 30). Eriina "omutheya" likakanganaya ngoko ni mwatsi mukulhu omwatsi ow'obutheya kandi ngoko akatholera kustibu omo kanisa y'omukama.

5. Abaliisya-Pastors. Eriina eri likahulha abakulhu, likabanika ngen-do nguma omo ndaghano nyiihya-nyiihya (Efes. 4:11). Ni kyindi kyiinywa ekyikamiinyiisaya abaliisya. Abembembethya aba kinya-muliimu ab'abanya Isaleri, ababya bakahulhaw'amo "baliisya" (Yer. 2:8). Erinuba n'emitsumo byabya bikasunzibwa erihika oko baliisya ababya bakanuubya esyambuuli sy'omukama (Yer. 23:1-7). Ekyiinywa "Omuuliisya - Pastor" kisosire ekyiinywa "pasture-ebithi ebikalibawa esyambuuli". Ekyi nakyo kyikathasya thw'engehulha oko kyiinywa omuliisya n'esyambuuli. Abaliisya b'omobisomo niba ngabane oko baliisya bomo masako. Abaliisya babya Bakulhu omo Biblia, kandi babya ibakabya banene kwilhaba mug huma om'obuli kanisa.

6. Abaliisya-Shepherds. Omwisakangira oko Bakulhu, omukwenda Petero akababwira eriliisya ebiihyo ebiri mwibo. Neryo akabababwira athi omughulhu Omuliisya Mukulhu asyatubuka (Kristo), bakesyathunga empiitha eyithe susuka (I Pet. 5:1-4). Ekyi kyikakanganaya kyithi abakulhu ni baliisya omo Kanisa ahisi sya Kristo oyuli Muliisya Mukulhu. Erisunzikania abakulhu n'abaliisya, nikyo kyikathuboholera ndeke eriminya ko biinywa bighumera. Abaliisya ab'omo kyihugho eky'asakangiiraw'amo eBiblia babya banzire

kutsibu esyambuuli syabu. Ibakanzasyo kandi ibakasitswererera (Eson. 23). Omughulhu oghosi ibakatsuuka ambere wasyo, isihali ithibithaniasyo eril-hwiira enyuma wasyo. Ibasi obuli buliitho obw'obuli mbuuli. Ibatsung'asyo, n'eririsy'asyo hayiima n'erinywiis'yasyo. Abaliisya ibaka nuuba bakasondyu embuuli nguma eyabya iyathere kutse erilinda esyambuuli syabu oko bisoro by'omooli. Oyu w'omusiindo w'abakoli abu Omukama asondire eribya Bakulhu. Eriina Omuliisya "Shpherd" n'awandi mena aw'abakulhu omo kanisa akathuwathikaya eriminya ndeke abalhume aba. Abakulhu, Abaliisya, Abalebererya, abosi aba ni kyindu kyighuma.

EBIIBUULYO

1. Ni mena mangahi ow'abakulhu bawithe? _____
2. Ekyiinywa "elder-omukulhu" kyikamiinyiisaya bihi? _____
3. Emibiiri 20:17 hakabuugha hathi Paulo mwabirkira _____ eriilhwa Efeso.
4. Emibiiri 14:23 hakabuugha hathi _____ mubahirw'ako amaboko om'obuli _____
5. I Tim. 4:14 hak'ahulha abakulhu mo _____
6. I Tim. 3:1 hakabuugha hathi eriyisunza ____ ow'o _____
7. Amena abakulhu "Bishiops" na Omutheya "overseer" bikanamiinyiisaya ekyindu kyighumerera "?" _____
8. Ni binywa bibiiri byahi ebikakolha omutheya "overseer"? _____ na _____
9. Efes. 4:11 hakahulha abakulhu _____
10. Ni baliisya bangahi abakatholera eribya omo kanisa? _____

EKY'ERYIGHA 18

OMUGHULHU OMUNENE EKYIINYWA "ABAKULHU" SIKYIRIMINYAWA NGA KYIKAMIINYIISAYA BAH?

Emithwe Yomo Ky'eryigha

1. Amena mukagha awosi akakanaya oko mulhume mug huma.
2. Omughulhu oghosi, ihakabya abakulhu abalhabire oko mug huma.
3. Abakulhu abosi omo kanisa bawithe obuthokyi obulingirirene.

ERIGHANIIRYA KUBYO

1. Amena mukagha awosi akakanaya oko mulhume mug huma. Eritendiminya ndeke lyalethire omusulhusutho oko mwatsi wa 'Abakulhu'.

Omusiindo mug huma ow'omusulhusutho akahighukalha omughulhu kyikamiiyikalha ngoko amena mukagha awosi akamiinyiisaya riina lya balhume baghumereera. Omo bisomo mukabya abakulhu ab'engabane oko baliisya. Neryo abathungereeri ni bitsumbi by'abandu bandi. Niikwa amena mukagha awalyakangiriribawa omo ky'eryigha ky'erikuumi n'omusangyu, ni bithuunga by'amena abiri ok'obuli kyighuma. "Abakulhu" na "Abaliisya" ni biinywa bibiiri ebikamiinyiisaya "abandu abakuulire". "obalebererya" na "abathungereeri" ni biinywa bibiiri omwimaniiiri "superintendent". Na abakalisaya "shepherds" hayima na abaliisya "pastors" ebyosi bikamiinyiisaya "abakabya n'esyo mbuuli". Lithya ghukendilhangira ngoko ebiinywa ebibiiri ebi bikamathaniibawa n'eryo ibyakania oko balhume baghumereera. Omo Emibiiri 20:17 abakulhu eriilhwa Efeso bakahulhaw'amo "elder-abakulhu". Niikwa omul. 28 akahulha abalhume banu "overseers-abatheya" kandi aka buugha athi ni batheya oko "kyihyo" ekyileka ibabya batheya kutse baliisya. Nokw'eryo, abakulhu nabo ibakahulhaw'amo Baliisya. Eyi simiibiiri y'ang abane niikwa ni biinywa bibiiri oko kyindu ikyan'ekyighuma. Olhughano ol hundi olhukakanganaya lhuthi amena mukagha awakamiinyiisaya ikyan'ekyindu kyighuma "abakulhu" kyikamiinyiisaya balhume baghumerera ni I Pet. 5, omul. 1 akakanaya oko "bakulhu" omul. 2 akabuugha athi abakulhu banu bakatholera "ibaliisya" ebiihyo bya Nyamuhanga", ekyi kyikaleka ibabya Baliisya. N'omulhondo owa 2 nagho akabalhaghira "eritheya" ekyihyo, ek yikaleka ibabya Batheya. Abakulhu, Abaliisya n'abatheya, n'abalebererya; si miibiiri ya ngabane kusangwa eyosi niya lhukwamirwa lhughumereera. Ebyosi ni mena mukagha oko miibiiri mighumereera omo bw'embembethya bw'ekanisa y'omukama.

2. Omughulhu oghosi, ihakabya abakulhu abalhabire oko mug huma. Ekyindi kyisobyo ekyiri omo bisomo ly'erithunga "Omuliisya" kutse omutheya mug huma omo kanisa eyosi. Omo lhuhindano olh'omo kanisa y'omo ndaghani nyiihya-nyiihya, omughulhu oghosi imukabya abaliisya abalhabire oko mu g huma. Omo Biblia sithuli thukathasom'amo "the pastor-Omuliisya mu g huma" o'w'ekanisa. Omo kyitswa ky'ekyo, Biblia yikakanaya oko "Abakul hu" (butsira "Omukulhu") ibakasingik'awa om'obuli kanisa (Emibiiri 14:23). "Abakulhu" (butsira "omukulhu") basingikawa om'obuli Muuyi (Tito 1:5). Paulo mwabirikira "abakulhu-elders" kutse abatheya "overseers" erilhuua Efeso (Emibiiri 20:17,28). Mwasakangira abakaliisaya "bishiops" eFilipi (Fil. 1:1). Eyi y'endekatheka ya Kristo busana n'obwembembethya bw'ekanisa. Omo ndekatheka eyi muli amenge manene. Omulhume mug huma amembembethya ekanisa iyuwene, endambi yanganahiika enyalengetekania ngayo

“Muliisya Mukulhu” w’ekanisa. Iniakendithoghera omo muthegħo ow’eriyordon dhera “eriyisungulika” busana nayo iyuwene. Syangalengekanirye oko bandi omwitswera liwe. Neryo angabere iyo musa iyo mwembembethya (sole rule). Endekatheka ya Kristo siyiri-lighira omwembembethya eriyikoll’amo “omunene”. Endekatheka ye Biblia yiri yithi ‘ekyithuunga ky’abakulhu” ery’embembethya ekanisa. Mbino ihalyabanika abalhume abatholere babiri omo kanisa, ekanisa iyikendilinda imuyathunga abakulhu. Sikyiribya ky’amulimu abughirire erithunga omukulhu mugħuma. Omughuma oko bakulhu banu ababiri amahoolha, kutse amasegheriibwa lhuhandi, oyulyasighalha akatholera inyayirekesya omubiiri erikolya aho oghundi mulhume asyahika okwitholera. Hakatholera omughulhu oghosi ihabya ihane abakulhu abalhabire oko mugħuma.

3. Abakulhu abosi omo kanisa bawithe obuthokyi obuli-ngirirene. Ekyisobyo eky’akasathu, eky’oko mukulhu mugħuma eriyowa ngani w’ahighulhu oko bandi. Ekyi ni kyighuma okw’ihengema eryoko nzuuko eryabanika omo bw’embembethya bw’omo kanisa eyatsuuka. Neryo ekyi mukyalhw’amo ekirengekanio omo kanisa y’eroma (Catholic church) eky’erithunga abathungereeri “bishiops” oko makanisa manene ahisi syabu. I Pet. 5:4 akakanaya oko Kristo nga “Omuliisya Mukulhu”. Biblia siyirikanaya oko mukulhu ow’obuli kyi roġla “Omuliisya Mukulhu”. Ngoko Kristo akahulhaw’amo “Omuliisya Mukulhu”, thukakiriraya thuthi iyo musa yo Muliisya Mukulhu. I Pet. 2:25 hakakanaya oko Kristo mo “Omuliisya kandi omutheya w’emithima yenu”. N’ahake, sithwe thukathasoma ok’omundu wahi oyukahulhaw’amo “Mukulhu-Bisiop” w’amakanisa awalhabire oko nguma. Obuli kanisa yikathunga abalebererya butsira omulebererya. Erithomeka oko, abakulhu abakabya ibabirikolha habw’ebirimo binene sibalithunga buthokyi bulengire obwa ab’omughulhu muke. Abakulhu ab’omo makanisa amannene-manene sibalithunga buthokyi bunene oko bali omo makanisa amake-make. Omukwenda Petero mwayahulh’amo mukulhu munyiky’abo aka-kania n’abakulhu abandi (I Pet. 5:1). Abakulhu bakakungawa eribya isibali yisumbira ah’ondatha n’emiyiheko neryo bakabya ibakendi-thoghera omo lhubanza lhw’omuthebya (I Tim. 3:6). Omuthebya akayitsyangura akakolha omukulhu muw’emiyiheko. Sikyirithwalha mugħulhu muli emiyiheko yithe yatsandya omukulhu. Abakulhu abosi abali omo kanisa bawithe obuthokyi obulingene. Sihali mugħuma okw’ibo oyukalengaya ghundi y’obuthokyi.

EBIBUULYO

1. Ni bitsumbi bingahi ebikakanibaw’ako omo mena mukagħha? _____

2. Amena mukagha kwenene ni bithunga _____ ok'obili riina.
3. Wahule ebihandi bibiri omo Biblia ebikahambanaya amena ayo wa ha-ghuma._____
4. Emibiiri 14:23 hakabuugha hathi _____ mubahighulhwa om'obuli kanisa _____
5. Tito 1:5 hakabuugha hathi _____ om'obuli kanisa.
6. Omo Fil. 1:1 Paulo mwasakangira _____ eFilipi.
7. Omulhume mug huma anganawathiikya ng'omukulhu omo kanisa mw'iyu-wene?____
8. I Pet. 2:25 Akahulha Kristo mo _____ na _____ ey'emithima yenu.
9. Biblia vineyatha kania oko "Mukulhu" w'ekanisa? _____
10. I Tim. 3:6 hakakunga erisanga iwabiriyisumbira ahiighulhu n'e_____

EKY'ERIGHYA 19

NGOKO EBISOMO BIKATSANDAYA OBW'EMBEMBETYA

BW'EKANISA

Emithwe Yomo Ky'eryigha

1. Erikwama obuthoky i bw'abandu omo kyitswa ky'erikwama obuthoky i bw'eBibilia.
2. "Erighenda kwilhaba lhulengo" lhwok'obuli Kanisa.
3. Erikolesya abakoli abathalhaghbirirwe n'emiibiiri eyithalhaghbirirwe.
4. Eribindulha ebitsumbi ebiri omo masako.

ERIGHAMBULHA KUBYO

1. Erikwama obuthoky i bw'abandu omo kyitswa ky'erikwama obuthoky i bw'eBiblia. Omo ky'eryigha ekyi hayiima n'omokyindi ekyikasubuk'akyo thukendikubungulha ngoko obusondoli bw'ekanisa bukatsandiibawa. Omo ky'eryigha kyino thukendisamalira ngoko amakanisa w'abandu kw'akatsandaya obw'embembethya bw'ekanisa. Neryo omuky'eryigha ekyikakwam'ako thukendisamalira ngoko emithondekere y'ekanisa yikatsandiibawa n'ekanisa ya Kristo nayo. Enzumwa ngulhu eyikanganaya ngoko eritsandiibwa eryosi lyasire omo b'wembembethya bw'abandu ni busana n'ebisomo erikwama obuthoky i bw'abandu. Erisoby a erinene ly'erikwama Katekisimu - akatabu ak'abakatoliki bakakwama. Obutabu bwe Misa, bw'ebisomo bikikiriraya eribindulikania ebindu bingyi ebithe omo ndondekania y'e Biblia ko yika-buugha oko ndondekania y'ekanisa. Ngoko katekisimu kakakwamawa, nako ngakawithe buthoky i, neryo eribindulha eribalyabindulha ly'erikakwamawa.

Kyikaliire erisuubuulya abandu bakathoka erisuba oko ndondekania ey'ok-wenene, abandu bakyinalengekanaya bathi Katekismu yiwithe obuthoky. Amasako akatholera inyasikiibwa ngoko igho masa wawithe obuthoky omo kisomo. Bik'en gehulha omukristo eriyakolha emiibiiri mibuya (II Tim. 3:17). Obuthoky bwagho oko bw'embembethya bw'ekanisa, ngoko bine oko ghundi mwatsi wahi, akatholera erisiikiibwa.

2. "Erighenda kwilhaba lhulengo" lhwok'obuli kanisa. Enzira eyindi ey'ebisomo bikahengemer'amo erilhwa oko busondoli bw'ekanisa obw'ok-wenene, ly'erithalhuka okwiisiikya eriyithabalh'ako ly'obuli kanisa.. Omus-ingyi omukulhu ow'endeka-theka y'omukama ali omwiyii-thabalh'ako ly'obuli Kanisa. abandu bangyi sibawithe amakanisa awakayithabalh'ako. Emisondolere yabu ni yangabane kutsibu. Niikwa thukakungawa erithendighenda kwilhaba lhulengo lhw'erikangiiriya lya Kristo (II Yoh. 9,10). Thukatholera erighendera oko ngangiiriya ya Kristo omo myatsi y'emithondekere y'ekanisa, ngoko bine nomo yindi myatsi y'eryanza lya Kristo oko Kanisa yiwe. Thwamalenderera omwikangiiriya ly'eBiblia oko misondolere y'ekanisa, thukendithunga amakanisa awakayithabalh'ako. Abandu bamaghenda kwilhaba okw'ekyi bakayihirir'aho amaliisya, bakabya isibathaghendera omwikangiiriya lya Kristo. Amakanisa w'abandu abirtsanya endekatheka y'omukama busana n'erikolha kwilhaba lhulengo lhw'obuli Kanisa.

3. Erikolesya abakoli abathahamwirwe n'emiibiiri eyithahamwirwe. I Pet. 4:11 hathi thukatholera ithwakolha ng'erilhaghira lya Nyamuhanga kuliqa-buugha. Ekyi kyikamiinyiisaya erikolha ebindu by'eBiblia omo musiindo w'ebiblia n'eryahulha ebindu by'eBiblia omo mena w'ebiblia. Eribi. 22:18, 19 hakathukunga erithendi-thomekera oko kyiinywa kya Nyamuhanga kutse erilhusy'ako. Busana n'esyanzumwa esi obuli kyihandi ky'ekanisa y'omukama ni ky'erikwama Biblia omo kwenene kwayo. Abakoli b'omo Kanssa bakatholera ibabya baghumereera nga ab'omo Biblia. Niikwa ebisomo ebinene biwithe ebitsumbi n'abakoli abathe omo masako. Ebi ni bitsumbi ebikathekaw'aho n'abandu niikwa isibiri omo Biblia. Ebitsumbi ebi, byebi, "Catichest", "agent-omubuloka" "Arch-bisiop", "Papa" n'ebindi bingyi. Eri syikania ngoko Biblia yikakanaya. Ni thomekera oko Kyiinywa kya Nyamuhanga. Ekanisa y'omukama siyangasuba-subaniibwa munabwire, mbino ebitsumbi n'emiibiiri ebithe-sanganawa omo Ndaghano Nyi-nyiihya ibinalya lekawa.

4. Eribindulha ebitsumbi ebiri omo masako. Omuusiindo ow'akani owo ebisomo bikatsanday'amo ekanisa, obusondoli bw'okwenene omo kani-

sa ly'eribindulha ebitsumbi n'emiibiiri ebikasangawa omo Biblia. Ekyi, ni buugha ambu, eriina eriri omo Biblia likakolesibawa, niikwa ekoy likaminyisaya sokyendikwamwa. Ekyi kyikalhangirika omo Bakulhu abalhangirawa omo bisomo. Nomo kyine ambu Abakulhu bane omo Biblia, Abakulhu bomo bisomo sibali ng'abaka-sanganawa omo Ndaghano Nyiihya-nyiihya. Ikyane ekyighuma oko Baliisya b'omo bisomo. Omo Biblia abaliisya babya bakulu omo kanisa. Omo bisomo eby'omughulhu ono Abaliisya ni bathuuliri abak'embe-mbethaya Ekanisa nguma kutse amakanisa manene. Eriina lyan'erighuma, niikwa omubiiri niwa ngabane. Ekyindi eky'erilebery'ako y'omuhereeri w'omo bisomo (I Pet. 2:5, 9). Niikwa omo makanisa w'ebihanda Abahereeri ni bakoli b'engabane omo Kanisa. Omo by'erilhangirir'ako ebi, thukalhangira ngoko eriina eriri omumasako likakolesibawa, niikwa ekoy likaminyisaya isikithakolesibwa. Nokw'eryo amakanisa aw'ebisomo, akatsandaya emisondolere y'ekanisa omwikwama obuthoky bw'abandu, omwika-kirya ekanisa erithendiyi-thabalh'ako, omwikolesya ebitsumbi ebithe omo Biblia, n'eribindulikania amena w'emiibiiri awali omo masako.

EBIBUULYO

1. Ni kyiinywa kyahi ekyikahulha ekyitabu ky'obuthoky bw'abandu?

2. II Tim. 3:17 hakabuugha hathi amasako _____ busana n'erikolha emiibiiri mibuya.
3. II Yoh. 9 hakabuugha oko _____ omo _____ ya Kristo.
4. Omo Biblia mukasanganawa makanisa mangahi? _____
5. I Pet. 4:10 hakabuugha hathi eribugha nga _____
6. Erib. 22:18, 19 hakakunga erithendi _____ kutse erithendi _____
7. Buugha ebyaghanda 4 ebithesanganawa omo Biblia _____
8. Hereraya amena asathu aw'amakanisa w'ebisomo _____ abirtsandya

9. I Pet. 2:9 hakabuugha hathi thuli _____
10. Ekanisa y'okwenene yanganasubibw'aho? _____

EKYER'YIGHA 20

NGOKO AMAKANISA WA KRISTO ANGANATSANDYA OBW'EMBEMBTHYA

Emithwe Yomo Ky'eryigha

1. Erisingika abakoli abathatholere.

2. Erisingika abakulhu “ab’omughulhu mukuuhi”.
3. Eribindulha emiibiiri mo bistumbi.
4. Ehiithunga hy’ekanisa.

ERIGHANIIRYA KUBYO

1. Erisingika abakoli abathatholere. Eritsanda omo bw’embembethya bw’ekanisa lyangabya n’omo kanisa y’omukama ngoko kyanganabya omo makanisa womo bisomo. Amakanisa awa Kristo awandi syalikwama endekatheka eya Biblia yondeke n’eriyiithey. Ng’ekyerilhangirir’ako, Biblia yikakanganaya abakulhu n’abawathiikya ekoy bakatholera ibabya ibali. Yikabuugha yithi omulhume “akatholera-akathekawa” inyabya inyawithe bino - eribya mukoli w’ekanisa (I Tim. 3:2). Ekyiinywa “akathekawa” ni “kyilhayiro – ni kikulhu”. Ekyi ni kyiinywa ekyirithohiire ekyikamiinyisaya eby’omukoli akatholera eribya isy’angabya bith’eho. Yesu mwabuugha, “muwithe eributhwa kandi” (Yoh. 3:7). Eryingira omo bwami bwa Nyamuhanga omundu akatholera eributhwa kandi. Sihali ngabane, ko bine bithya n’eribya mukulhu w’ekanisa. Eky’erisosa “ekoy ghuwithe eribya” kiwithe eriby’aho kutsese isighutholere. Ekyiinywa “ghuwithe eribya” kyikayitsuutsiibawa ok’obuli kitsumbi ekyikabya. Omundu amabya anyawithe ebikatholera eribya kandi ihane n’ebindi eby’athawithe oyo akabya isyalitholera. N’isobya okwikangii-riiryia ly’e Biblia erisiingiika omundu oyuthawithe ebyosi ebikasondiibawa oko mukoli w’ekanisa. Ekyi kyikenditsandya obw’embembethya bw’ekanisa y’omukama.

2. Erisingika abakulhu “ab’omughulhu mukuuhi”. Erind’ithalha erikabya irinimuby’aho omo makanisa wa Kristo, ly’erithunga “Abakulhu “ab’omughulhu muke”. Ni balume abatha-tholere eribya Bakulhu, niikwa bakanza eryahulhw’amo Bakulhu. Si Bakulhu abatholera. Ekyi ni ihalya oko kyiinywa kya Nyamuhanga. Endekatheka ya Kristo busana n’abakulhu b’obuli kanisa kyikwamene n’eky’erilhangirir’ako kyiwe. Omulhume amabya isyangabya ky’erilebery’ako omo byakatholera inyabya ebikanganiibirwe ahighulhu, syangathoka erikolha ekoy athe. Omulhume amabya isyalhwe mukristo, niikwa akanza erikolha “ng’omukristo”. Ekanisa yinatholere erim-uuliighira erikolha ekyi nibya isi mukristo? Sihali mundo oyuwangambalha eriina “mukristo” nibya isi mukristo wakwenene. Ko kyine kyithya, omundu syangambalha eriina “mukulhu” isi mukulhu omo kwenene. Erikolha ghuthya n’ihalya oko masako. Ni tsandya endekatheka ya Kristo okw’embe-mbethya ekanisa yiwe.

3. Eribindulha emiibiiri mo bitsumbi. Omuusiindo ow’akasathu

ow'ekanisa yikatsandiray'amo endekatheka y'ekanisa ya Kristo ly'erikolha omubiiri mubuya m'okyitsumbi k'yomo kanisa. Omubiiri ni lhumimbi. Eky'erilhangirir'ako lhw'olhumimbi olhw'erighanzirira esyambuulho sy'ekanisa. Omundu oyo thukamwahulh'amo "Omubikyi". Niikwa omubiiki si mukoli. Ali okwikolha olhumimbi. Eribika esyambuulho sy'omukama ni mubiiri mubuya. Si kyitsumbi omo Kanisa. Sihali kitsumbi omo Kanisa ekyikahulhaw'amo "Omubikyi" omo Biblia. Niikwa omughulhu akanahika, ababikyi ibanza eribindulha emiibiiri yabo eyo, mo bitsumbi. Ekyi kyi hengemire oko kyiinwa kya Nyamuhanga. Omulhume oyukakolesaya omunyamba muli erikakirya abantu eriyitsing'ako omo Kanisa, simukoli wa Kanisa niikwa akakolha omubiiri owayisuunzirwe. Thalengekania omulhume ng'oyo, amatsuuka eriyirengekania muwa kitsumbi kirebe omo kanisa. Amatsuuka eriyambalya ebitsumbi n'eriyyiha obuthoky. Akabya inyamabindulha olhumimbi mo kyitsumbi ky'omo kanisa. N'omwimbisya ko bine bithya. Omundu ngoyu anganakolha omubiiri mubuya omwisondolya esyonyimbo syo ndeke. Neryo akatsandaya omubiiri mubuya omughulhu akatsuuka eriyithwalha mo momukulhu omo kanisa. Omo I Kor. 14, thukasoma oko banya kanisa ababya bakolire miibiiri minene omwiwathiikya omwiramya. Niikwa erithalhangira ambu awithe olhukwamirwa omwisondolya eriramya sikuiri miinyiisaya ambu abya mukoli. Abya inyaka-kolha lhukwamirwa. Ekyiwe kyi handi kyi abya mubiiri niikwa isi kyitsumbi ky'omo Kanisa. Obuli mwikiiriirya awithe olhumimbi omwiramya n'omo mubiiri w'ekanisa. Niikwa ekayo sikiri thukolha ithwe bosi mo bakoli b'ekanisa. Omulyambo akabanika omughulhu abalhume bakalengekanaya kutsibu oko buthoky obo bangathunga butsiribya oko buhererya bangahiir'aho. Abalhume bangyi bakayira omuuhwa omo bukulhu obo bangathungira is'ibuugha ambu bakalengekanaya oko mubiiri mubuya bangakolera ekanisa. Omughuma okwabo ni Bayiisiiriirya oyuwanza eribya mukulhu (III Yoh. 9). Omo Kanisa muli abo Bayiisiiriirya bangyi. Ni balhume bakasondaya eriyipipa. Bakatsandaya ekanisa y'omukama bakayironderya eribya "banene-banene". Bakatsuuka eribindulha olhumimbi mo kitsumbi ky'omo Kanisa. Banganabya ibalhwe ibanemukolha omubiiri mubuya, niikwa bakatsanday'agho bakanza eribindulh'amo kitsumbi ky'obuthoky. Eritsanya eryi ni kyindu ky'amani ngoko eritsanya obw'embembethya bw'ekanisa kyinatsandire omo bisomo. Thukatholera erithendighenda kwilhaba lhulhengo omo kyiinywa kya Nyamuhanga.

4. Ehiithunga hy'ekanisa. Enzira nguma eyasiibwe ey'abikiiriirya bakabindulir'amo emiibiiri yekanisa mo bitsumbi, mwomu hiithunga hy'ekanisa. Ekyiinywa akathuunga "committee" kyikamiinyiisaya abantu balebe abali

haghuma “ibabiriyisiinga” erikolha omubiiri mulebe. Abalhume abakasawa n’ekanisa erikolha olhumimbi lhulebe endambi yikahiika ibayirengekania ambu bali oko kyitsumbi ky’obuthoky. Kwilhabirirya ekyi kyikalhangirika oko mukulhu w’akathunga ngako. Omulhume ng’oyu akayirengekaniray’amo eribya w’obuthoky. Neryo inyanza erithunga ekyitsumbi kirebe omo Kanisa. Endambi iyahiika inyayahulh’amo mukulhu w’ekyithunga oyuthi-lhuisiibaw’aho. Abalhume bangyi banganasombolwa eriyasuuba-suubania olhuthu lhw’ekanisa. Ekyi kyikendibya kyibuya okw’ibo erikolya aho bakendi-yyisuunzira eribya b’obuthoky oko mithwe y’abandi. Ekanisa yanganathuma erisondekания oyukendibya muthuuliiri w’ekanisa. Kusangwa banzire ebitsumbi neryo ibayahulh’amo “ekyithunga by’abathuuliiri” neriyikoll’amo ba kitsumbi ky’obuthoky omo Kanisa. Obubi obu bukakanyirira omughulhu omulhume omughuma akayahulh’amo “mukulhu w’ekyithunga ekyo”. Omulhume oyu akagheraya erithabalha oko bandi n’eriyahulh’amo mukulhu oyutewanga-lhuisiibaw’aho. Ehithunga-hithunga ni hya bubi, kandi sihitholere erithekw’aho omughulhu hikaletera abalhume erikolhw’amo b’obuthoky (III Yoh. 9). Omughulhu omunene bakabya ba mughulhu muli, neryo omukulhu wabo inyabya mukoli oyuthe lhwaho, bakanza erithwalha obuthoky omo kyitswa ky’erikolha omo bwolho-bwolho olhumimbi olhulh-we lhuyisunzirwe. Bakakolha omubiri omubuya mo kyitsumbi kyabuthoky. Ehithunga-hithunga hy’ekanisa omughulhu omunene hikatsandaya emikolere eyolhobire eyiri omo masako busana n’ekanisa y’omukama.

EBIIBUULYO

1. Ekyiinywa “bikatholera” kyiikamiinyiisaya bihi omo I Tim. 3:2? _____.
2. Ekyiinya “bikatholera” ni ky’eriyisunzibwa ok’obuli mukoli omo busondoli? _____
3. Thukana-soma oko “abakulhu aba mughulhu muke” omo Biblia? _____
4. Omundu anatholere eriyahulh’amo omwikirirrya owa kathuku kake kandi is mwikiiriirya? _____
5. Olhumimbi nikyi? _____
6. Omubikyi w’ekanisa nayo nina mukoli w’ekanisa? _____
7. Iyo Bayiisiiriirya mwanza bihi? _____
8. Abikiriirya omo I Kor. 14 banabya omo bitsumbi bya buthoky? _____
9. Omukulhu w’akathunga k’ekanisa nina mukoli w’ekanisa? _____

10. _____ ni kyithunga busana na_____ lhw'ekanisa.

EKY'ERYIGA 21
NI MISIINDO YAHİ Y'AMAKANISA OKWIKOLHA NDEKE
LYAYO OMW'IYITHONDEKANIA

Emithwe Yomo Ky'eryigha

1. Erithendiyithondeka ngoko amasako akabuugha.
2. Siyithondekire kandi isiyiwithe bakoli.
3. Yiyithondekire omo bithe bilhayiro by'amasako.
4. Ekanisa eyiyithondekire erikwamana n'amasako.

ERIGHANIIRYA KUBYO

1. Erithendi-yithondeka ngoko amasako akabuugha. Amakanisa aghos i akatholera inyakolerera eribya inyakayithondeka inyanawithe abakulhu abatholere n'abawathiikya abatholere. Niikwa ekyi kyanganathwalha mu ghulhu muli. Omo ky'eryigha kyino thukendikubungulha emisiindo-misiindo y'amakanisa erikwamana n'emithondekere yagho omwikulha-kulhana. Omo ky'eryigha ekyi thukendikolesya ebiinywa bbin: "Eriyithonda kyinya-masako" na "Eriyithondeka omo bithe-bilhayiro", "eriyithondeka" na "erithendi-yithondeka" biiri bithi emibere y'obw'embebethya bw'ekanisa yinatholere erikwama ngoko Biblia yikabuugha. "erithendikwama amasako kyikamiinskyaya kyithi emibere eyo yithere, kutse yiwire. Ekyiinywa "eriyithondeka" kyikamiinskyaya kyithi ekanisa yinawithe abakulhu hayiima n'abawathiikya. Ekanisa eyithayithondekire yikabya isiyiwithe Bakulhu kutse Abawathiikya. Ekanisa yanganabya isiyiyithondekire ngoko amasako akabuugha. Eyi y'ekanisa eyithawithe abakoli abatholere, okw'aho isimuli oyusingikirwe omo Kanisa eyo. Ekanisa yikabya iyine kinya-masako, yamabya isiyiwithe abandu abawithe ebikatholeraya omundu eribya omo mubiiri w'obukulhu. Ni ndekathea ya Kristo obuli Kanisa eribya isiyiwithe bakulhu okwiitsuuka lyayo ng'eritsuuka ly'ekanisa y'erimbere. Ekyi yikabya busana n'erithokesya abalhume abakristo erikulha-kulhana omwisiika omo Mukama. Omo mu ghulhu oyu ekanisa yikasoma n'eriminaya emisingyi y'eBiblia ngoko yikanaya oko b'wembembethya bw'ekanisa. Ekanisa ng'eyo yikakanibaw'ako ambu "siyiyithondekire" kusangwa siyiwithe abakoli abatholere. Yikabya isiyitho ndekire omo bwoswire ngoko yikendisyabya yamabirithunga abakoli abatholere. Si mibere mibi ekanisa eribya isiyiwithe bakoli yamabya isiyiri yabugha mughulhu uli. Omo Biblia thukasoma oko makanisa amaghuma

inyanawithe abakoli n'awandi isyawithe. Ni kyibuya eribya isihali bakoli omo kyitswa ky'erithunga abathatholere. Ekanisa eyithayithondekire ngoko amasako akabuugha, yeo eyitheyathunga abalhume abakatholera kandi isi-yiwithe abakoli abathasingikirwe muyo.

2. Eyithayithondekire kandi isiyiwithe bakoli. Eyi y'ekanisa eyithayithondekire kusangwa siyiwithe bakoli, niikwa siyiri omo masako kutse siyitholere eribya omo mibere eyi. Enzumwa ey'eribya isikyitholere, yiri yithi hane abalhume abakatholera abangabere ibabirisiingikwa eribya bakoli muyo niikwa isibali basingikwa. Ekanisa eyi yabiriby'aho myaka mingyi erithokesya abalhume eritholera. Hane abalhume abakatholera, niikwa ekanisa siyiriy-abasingika. Ekyo sikyirireka iyabya isiyighendere oko masako. Omughulhu abalhume bakatholera, neryo ikubana singikwa bathya. Kyangabya kibuya ekanisa eriby'aho isiyiwithe bakulhu kwilhaba erithunga abathatholere. Ni ndekatheka ya Kristo athi obuli kanisa yikolerere erihiikana omo mithondekere yayo iyinawithe abakulhu n'abawathiikya. Ekanisa eyithayithondekire ngoko kyiri omo masako, yeo eyiwithe abalhume abakabya ibanatholere niikwa isibali-basingikwa mo bakoli.

3. Yiyithondekire omo bithe bilhayiro by'amasako. Yiwithe abakoli isibatholere eribya omo mubiiri. Ekanisa y'omusiindo oyu yiwithe abakoli abasingikirwe n'okweryo yiyithondekire, niikwa abalhume sibatholere. Amakanisa awandi akayanguhiranaya eriyithondeka. Bakasingika abakoli isibali batholera. Omw'ekyi bakayikulhulir'ako obulibathangania hayiima n'ebiiriitho. kyine omo masako erithendi-thunga Abakoli bamabya isibawithe ebikabayisunzibaw'ako. Emibere eyi ni kyibi kutsibu kwilhaba eribya si-hali mukoli ghosi-ghosi. Ikyikendiletha omo kanisa mw'emiryambo hayiima n'obulibathangania. Ekanisa eyiyithondekire omo yithe mikolere y'amasako, yeo eyiwithe abakoli abathatholere kandi ibasingikwa mo bakoli b'ekanisa.

4. Ekanisa eyiyithondekire erikwamana n'amasako. Yiwithe abakoli; Abakulhu n'abawathiikya abosi ibanatholere. Ekanisa eyi iyikaghana erisingika abakoli erihika aho bakahikira okw'itholera. Ekanisa eyi yinayithondekire kusangwa yiwithe Abakulhu n'abawathiikya. Yikwamene n'amasko kusangwa abakoli bamo batholere. Kyikatholera obuli Kanisa eribya yikasoma n'erilholerya okw'ihika oko ndambi ey'erithunga abakoli abatholere. Sihabye n'amughuma oyukayangu-hiriranaya omwisingika abalhume isibali batholera ndeke-ndeke. Omo ITim. Ekyihandi 3 na Tito. Ekihandi 1, mukasangawa eby'erighender'ako hakasiingikwa Abakulhu n'abawathiikya. Ebihandi ebi, bikayiitsutsa erisomwa kutsibu. Omo ky'eryigha ekyiri embeere, thukayasoma oko bikayisunzawa omukulhu eribya inyali, nzumwa oko nzum-

wa. Amakanisa akabya inyayithondekire kinya-masako, enyayithondekire omo bithe bilhayiro, isyayithondekire kinya-masako, kutse inyawithe abakoli abathatholere omw'ikwamana n'engulha-kulhana y'erisingika abakoli.

EBIIBUULYO

1. Eribuугha thuthi emibere y'ekanisa yitholere, thukabuугha thuthi _____
2. Erikangania thuthi ekanisa yiwithe abakoli thukabuughha thuth'ikyi? _____
3. Erikangania thuthi emibere y'ekanisa yiwire thukabuughha thuthi _____
4. Erikangania thuthi ekanisa siyiwithe abakoli thukabuughha thuth'ikyi _____
5. Omo Biblia thukanasom'amo okw'iyithondeka n'okwithendi-yithondeka? _____
6. Ekanisa eyithawithe abalume abatholere kandi isihali oyusingikiirwe mo mukulhu, thukabuughha thuthi kyi? _____
7. Ekanisa eyiwithe abalhume abatholere niikwa isihali oyusingikire thukabuughha thuthi yiri kyi? _____
8. Ekanisa eyirimo abalhume abasingikire mo bakoli kandi isibatholere thukabuughha thuthi kyi? _____
9. Ekanisa eyiwithe abalhume abatholere kandi ibanasingikire thukabuughha thuthi kyi? _____
10. Ni bihandi byahi ebibiri omo Biblia ebikathondogholha ngoko abakoli b'ekanisa bakatholera ibabya bathi basingikwa? _____

EKY'ERYIGHA 22

EBIKATHOKESAYA ABANDU ERITHOLERA ERIBYA BAKULHU B'EKANISA (I)

Emithwe Yomo Ky'eryigha

1. Isyali ko kahinira.
2. Inyanahiikiirye mukali mug huma musa.
3. Inyayithondekire.
4. Inyahumulikene.
5. Inyawithe mitse mibuya.

ERIGHANIIRYA KUBYO

Thuthe thwatsuuka eky'eryigha ekyihambire oko mibere y'abakulhu nzumwa oko nzumwa, thutsuuke ery'en gehulha oko ky'eryigha. I Tim. 3:1

hakabuugha. “omundu amanza eribya oko mubiiri w’obukulhu bw’ekanisa, iniakayitsuutsa omubiiri mubuya”. Obuli mundu oyukanza eribya omo mubiri w’ekanisa y’omukama anatholere erithunga eriyitsuutsa eryo kusangwa ni mubiiri mubuya. Isyayitsuutsa omubiiri oyu kusangwa ni kitsumbi kutsi niw’obuthoky, niikwa ni kusangwa ni muusiindo w’erikolera omukama. Akatholera eryanza eribya mukulhu imwathoka eryingira omo mubiiri owa kalire, ahathe eribalha oko mubiiri, kutse eribwirwa ngoko batholere ibakolha. Omubiiri w’eribya mukulhu ni mubiiri akakuyisunza’ako erikolha kutsibu, eribuga ndambi nene n’akaghala kanene. Siwe’riyisunza busana n’erithasonda eriminywa kutse erisonda obuthoky. I Tim. 3:2 hakabuugha hathi “Omukulhu inyabya isyaliko kahinira, inyabya n’omukali mug huma musa, kandi syaku-unde, ayitheghaye, ayithondeke, aby’e oyukakokaya abagheni, kandi inyanga-na kangiiriirya”. Ekyinywa “akatholera” kyikaminyiisaya ambu “ni kyilhayiro”, kyikayitsuutsawa, isikyabya kyith’eho”, ni kyikulhu”. Yesu mwabuugha athi ekyo abakwenda basyaboha oko kyihugho kyasyabohwa n’omolhubulha) Matt. 16:19). Ebikayitsuutsa abakulhu eribya ibali, ni kwene binabohire n’elhubulha hayiima n’oko kyihugho. Obuli nzumwa yikaiisunzibawa. Kyikalire omundu eritholera ng’omukulhu erikwamana n’amasako kandi isyawithe obuli kyikay-istutsawa ngoko thulyasoma ahighulhu.

1. Isyali ko kahinira. “Erithendi-by’ako kahinira” kyikaminyiisaya “isikuli itswebwa” oyutheko kahinira syangatswebwa. Ekyi sikiyirimiiinyiisaya kyithi awithe obubuyirire obw’obuthabihya, kusangwa abandu abosi baka bihaya (I Yoh. 1:8). Niikwa, kyikaminyiisaya kyithi omundu akalengah kutsibu omwiyyikakiirya oko kyibi. Akanguha okwiyyisub’amo, eribuugha amalholho wiwe, n’erisaba omughulhu akibuka esyosobe syiwe. Omo muusiindo oyu syangatswebwa kutse erithabaliibwa busana n’emitse yiwe. Zakkaria na Elizabesi babya bandu abathetswebawa embere sy’ekyilhayiro (Luk. 1:6). Abakwakali ab’eriwathikiibwa n’ekanisa bakatholera eribya isibaliko kahinira (I Tim. 5:7). Saulo abya isyaliko lhubanza erikwamana n’obuthunganene bw’ebihano bya Musa (Fil. 3:6). Abakristo abosi bakabwirawa eribya isibaliko kahinira omwiyyitheka-thekera erisubulha lya Kristo (II Tes. 5:23; II Pet. 3:14). Erillhuua omo milhondo eyi thukalhangira thuthi kyinathokekene eribya isighuliko lhubanza. Abakulhu bakatholera eribya isibaliko ekangaleka ibahemuka kutse eribya isibangatswebwa omo mitse yabo.

2. Inyanahiikiirye mukali mug huma musa. Ekyiyitsutso ekyi kyikaminyiisaya ebindu bibiiri; kyithi omulhume akathekawa inathahya, kandi kyithi inyathunga mukali mug huma musa. Sabye oyuthe wathahya kutse oyuthahire bangyi, isyabya Mukulhu w’ekanisa. Omo mwatsi oyu, kandi ngoko kyine

omo myatsi y'obwikiiriya, akabya ky'erileberyako embere sy'ekanisa eyosi (I Pet. 5:3). Obuli mulhume akatholera inyabya n'omukali wiwe, kandi n'obuli mukali akatholera inyabya n'omulhume wiwe (I Kor. 7:2). Omulhume kutse omukali amathahya oghundi kandi owiwe inyakyineho, ni busingiri (Rom. 7:1-3). Yesu mwabuugha athi eyi yabya ndekatheka ya Nyamuhanga eril-hw'oko nzuuko, nomo kyine kyithi mwaliigha habye eribindulha omo Bihamo bya Musa busana n'erikalha ly'emithima y'abu (Matt. 19:3-9). Omukulhu w'ekanisa akatholera inyabya n'omukali mug huma.

3. Inyayithondekire. Eribya mutswiri-tswiri ly'eribya mutheya. Omusirikali oyukalhamba omo kyiro akabya mutswiri-tswiri. Akabya inyanasamalire busana n'akabi akosi akangasa. Abatheya b'oko miyi ya Isaleri babya ibabirihanwa erikunga abandu busana n'akabi akangasa, bithe bithya emisasi y'abandu iyikendi-ghanzirwa kubo akabi kanalyasa (Ezek. 3:17-19). Heb. 13:17 hakabuugha hathi Abakulhu bakatheghaya emithima y'abandu ibanasi ngoko bakesyathonda busana n'ebyo bakolha. Abakristo abosi bakatholera eribya butsira thamiro n'eribya ibanasamalire, kusangwa omuthebya ali ng'endali eyikaruruma n'erithimba-thimba yikasondy oyo yangalya (I Pet. 5:8). Abakulhu abakatholera ibayowa ibanawithe olhukwamirwa ol-hw'eritheya ekyiihyo.

4. Inyahumulikene. Eribya oyuhumulikene ly'erithunga obulengekania obuthekene, n'amenge, kandi n'erileghana. Abakristo bakatholera erikalha ibanahumulikene omo kyihugho eky'ekyibi (Tit. 2:12). Engulhu mbuya yirimmo omwatsi w'ekwenene n'obuthekane (Emibiiri 26:25). Sithutholere erig-hotsera niikwa thubye ithunasamalire (I Tes. 5:6). Obulengekania bwethu bukatholera ery'ambalha obuthekane (I Pet. 1:13). Thukathekawa ithwayithendya oko engebe y'obukristo (I Pet. 4:7; 5:8). Omukulhu syatholere eribya muthaleghana oko myatsi y'omo ngebe. Akatholera inyabya mutswiri-tswiri, oyukalengekanaya, kandi inyanawithe obulengekania omo mitse yiwe.

5. Inyawithe mitse mibuya. Eritholera obukulhu, engebe yomundu yikathekawa inyabya inyakathoka erithabalha oko ngebe yiwe kandi inyanayithondire. Omukwenda Paulo mwakangania eky'erilhangirir'ako ekyuwene eky'emitse mibuya embere sysa Kristo (I Tesa. 2:10,11; II Tes. 3:7). Emibere y'esyangebe syethu yikatholera iyabya ya kwenene kandi mibuya embere sy'abikiiriya imothwathoka erimukurira eyiri Kristo (I Pet. 2:12). Engebe y'omukulhu yikabya ttere-ttere kandi ya kwenene okw'abo abamwasi.

EBIIBUULYO

1. Ni kyiinywa kyahi ekyikamiinyiisaya kyithi "ni ky'ekyi-lhayiro" _____

2. I Tim 3:1 hakabuugha hathi omundu akanza ekyibuya _____
 3. Matt. 16:19 hakabuugha hathi erikangiiriya ly'abakwenda lyabya ly'eri_____
 4. Erithendiby'ako kahinira kyikaminyisaya bihi? _____
 5. Erithendiby'ako kahinira kyikanamiinyisaya erithendikolha kyibi? _____
-
- 6.“Omulhume w’omukali mug huma” kyikaleka oghundi athabya _____ n’oghundi athabya _____
 7. Eribya mutswiri-tswiri kyikamiinyisay’akyi? _____
 8. Hereraya ebiinywa 3 ebikamiinyisaya “oyuthekene” _____
-
9. Hereraya ebiinywa bibiiri ebikamiinyisaya “emitse mibuya”
-
10. Ni mundu wa muthina wahi oyukakanibaw’ako omo Ezek. 3:7-19).

EKY’ERYIGHA 23 **EBIKALEK ABANDU IBATHOLERA ERIBYA** **BAKULHU B’EKANISA (II)**

Emithwe Yomo Ky’eryigha

1. Oyukakokaya abagheni.
2. Oyuwanganathoka erikangiiriya abandi.
3. Oyuthenywa ok’obwabu obuhire.
4. Oyuthe muulhu.
5. Oyuthawithe mururu oko ndundi y’omo kyihugho
6. Oyukayiyinaya.

ERIGHANIIRYA KUBYO

1. Oyukakokaya abagheni. Eky’eryigha ekyihambire oko by’omukulhu akatholera inyabya inyali, kyikayitsuutsa erisomwa ndeke. Obuli nzumwa ni y’eriminya ndeke. Emitse eyi y’obuli mukristo akatholera inyabya inyawithe. Niikwa ebyosi ebi sibiriysiunzibawa ok’obuli mukristo, ng’erithahya omukali mug huma musa, erithendibya muhya-muhyia, n’erithunga abana abiikiiriya. Ebisathu ebi bikahamba oko bakulhu basa. Ekyindi kya kubyo ky’ekyerikokya abagheni, ebinene bya kubyo obuli mwikiiriya n’iweriyitsukumirira erilhangira athi akabya nabyo. Ekyighuma ky’okwebyo ly’erikokya abagheni. Tit. 1:8 hakabuugha hathi omukulhu akatholera inyabya inyanzire erikokya. Ekyi kyikamiinyisaya erikokya omoka yaghu mw’abandu abali

omwiyitsuutsa. Niikangania olhukeri lhw'omwikiiriirya erilhaba omwigh-abana n'abandi ebyalya n'aherikesya. Erikokya eri likatholera erikolerwa abandu bosi, niikwa kwilhabiiriirya oko bikiiriirya (Gal. 6:10). Rom. 12:13 hakabuugha hathi, "musangire omo bwagha bw'abandu ba Nyamuhanga, mukokaye abagheni". Heb. 13:2 hakabuugha hathi, "simwibirirawe erikokya ab'eandi: kusangwa abandi babirkokya aba malaika bo bathya isibasiibo". Omulhondo oyu kakanaya oko mughulhu Brahamu akokaya ab'eandi kwe-si ini ba malaika (Enzuuko 18:1-8), I Yoh. 3:17 akakangiriraya athi, "omundu oyuwithe ebindu by'ekyihugho kyino, neryo akalhangira muliky'abo ali n'ob-wagha, iniakakalhaya omuthima, awithe olhwanzo lwa Nyamuhanga omo muthima wiwe mo athi kwehi?" I Pet. 4:9 hakabuugha hathi, "mukokaye omo manyuumba wenyu butsira eriyithonga-thonga". Omukulhu w'ekanisa akatholera enyayiherery'ayo okw'ikokya abandu.

2. Oywanganathoka erikangiiriirya abandi. Ekyiinywa "opt" kyikami-inyiisaya "oyutholere kandi inyananzire". Omukulhu w'ekanisa akatholera inyabya ini mukangiiriirya w'eBiblia oyuwasiyo ndeke. Ekyi kyikalhwa om-wisoma ighunawithe olhukeri, eriyitheka-theka butswiri-tswiri, kandi ighun-awithe mughulhu muli omwiikangiiriirya. Omuthuuliiri akatholera inyabya inyanasi erikangiiriirya (II Tim. 2:24). Obukristo ni kisomo eky'erikangiiriib-wa. Yesu mwabugha athi erikangiiriirya ekyihugho ekyosi, mwibike abandu, neryo kandi imwathasyabakangiiriirya (Matt. 28:19,20). Yesu mwabuugha athi Nyamuhanga akakurira abandu boko Kristo erilhaba omw'ihulikirira n'omwithendekwa (Yoh. 6:44, 45). Paulo mwabwira Timoteo erikangiiriirya ebindu ebyabya inyabiryigha oko bandu bowene nayo eriya kangiriry'abyo abandi (II Tim. 2:2). Ekanisa eyatsuuka muyithaleka erikangiiriirya n'erithuul-ha engulhu ya Kristo (Emibiiri 5:42). Abaebrania bakristo bangabya ibab-ya bakangiriry, niikwa nabo bayisuunza oghundi mundu erikangiriry'abo ekyiinywa kya Nyamuhanga (Heb. 5:12). Emilhondo eyi yika-kanganaya obukulhu obuli omwiikangiiriirya libuya, kandi n'abakangiiriirya babuya omo kanisa. Omukulhu akatholera inyabya ky'erilhangirir'ako ekyibuya em-bere syabandu akabya mukangiiriirya mubuya kandi oyuyithondekire omo kyinywa kya Nyamuhanga. Akatholera inyabya inyanayi-thekathekire eriri-isya ekyiihyo (Emibiiri 20:28). Akalengekaniibw'amo eriyirinda esobe n'eky-ibi omo kanisa erilhaba omwikangiiriirya erisiikiire. Akatholera inyabya inya-nasi erikangiiriirya.

3. Oyuthenywa oko obwabu (obuhire). Ekyi kyikamiinyiisaya kyithi omukulhu syatholere akanywa kyindu kyosi-kyosi ekyikaletha ethamiro. Pau-lo mwabuugha athi isithwayisanga ahisi sy'obuthokyi bwa kyindu kyosi-kyosi

(I Kor. 6:12). Mwabuugha athi abathamiiri sibendisyingira omo bwami bwa Nyamuhanga (Kor. 6:10). Abathamiiri bawithe obunaku, enaku, obuliighe, eriyitsuutsa, obuhaka, omudodom, ebironda ebyaathasi kobiryasa, kandi n'ameso w'omusasi (Emisy. 23:21,29-35). Obwabu obukayighendera bukahuthalhaya kandi bukasokolhaya ng'enzoka kandi ibwa sokolya ng'enzwira. Obu bw'obwabu obukathamiraya (obuhire). Obwabu bwanganakolesiibwa omo mibere eyuwene ng'omwiirya oko meza y'omukama (Matt. 26:29). Kandi bwanganakolesibwa mo buubalya (ITim. 5:23). Niikwa eriinywa obwabu obukendiletha ethamiro ni ilholho. Abakulhu bakatholera erikangania eky'erilhangirir'ako ekyibuya bakayikakiraya ekwithendiyihererya ok'obwabu.

4. Oyuthe muulhu. Omukulhu siy'omundu oyukaswiraya abandi. Akathoka erilekerya abandu isihali iswiry'abo. Omukristo isyabulikira akaswirya mundu wosi. Yesu mwakolesya omunyamba akahighitha ebisoro erilhwa omo Hekalo (Yoh. 2:15). Ababuuthi bakatholera ibaswirya abana babu omwibahabulha (Emis. 13:24). Niikwa abakulhu bakakolesaya obuthokyti obuli ky'erilhangirirako kyabu omo kyitswa ky'erikolesya omunyamba. Erisuyira kinya-mubiri likakolesibawa esyagavumente (Rom. 13:3,4). Niikwa obwami bwa Kristo sibilithabalhawa n'omuyali (Matt. 26:51,52). Ekyiinywa kya Nyamuhanga kyiwithe obuthokyti, ni tuyali w'obuthokyti kwilaba omuyali ow'othwasi (Heb. 4:12). Eribindulira oyukakuswiraya y'erindi ithema kyikakyinda enzighu kwilhaba erikolesya amalhwa (Matt. 5:39). Abakulhu ni ky'erilebery'ako embeere sy'abandi bikiriirya omwiyikakiirya eribya abandu abathe n'omwagha.

5. Oyuthawithe mururu oko ndundi y'omo kyihugho. Omukulhu syalikwa kyihehu oko by'abandi. Obutsunde obukyinire sy'esyombuulho esy'erithunga omo mibere yithatholere. Omundu oyukayisuunza eby'abandi y'omundu oyukalengekanaya athi engebe yiwe yiri omo bungyi bw'ebindu ebyawithe (Luk. 12:15). Akayisonga-songeraya obutheke mobwiwe iyowene isibwanga hiika oko Nyamuhanga (Luk. 12:21). Yesu mwabuugha athi sithwangakolera Nyamuhanga kandi thukakolera n'esyosente (Matt. 6:9,10). Abakayi-sunza eby'abandi bakabya ibaghanga-ghangire (Kol. 3:5). Sibendisyingira omo Lhubulha (I Kor. 6:9,10). Bakatholera ibahighithwa omo Kanisa (I Kor. 5:11). Abikiiriirya sibalisondekanaya eribya bandu b'ebindu. Enduundi yabu eyirengire ebindi, ly'eribya abandu abakakenga Nyamuhanga. Bamathunga eby'erirya n'ekyeryambalha bakayowa ibama thunga bingyi. Bakayihighulha erithendiwira omwilengw'ako n'omutegho w'ebindu owakalholhaya abandu b'omwithoghotha. Banasi ngoko olhwanzo lhw'esyombuulho y'onzuuko y'obuli bibi byosi kandi kyikalholhaya

omundu okw'ihitha oko bwikiiriirya n'eriyisookoolya omo biiriitho bingyi (I Tim. 6:6-10). Olhuhembo lhw'omwikiiriirya lhuli elhubulha (Matt. 5:12). Akaiibalhaya eritherera omwiyyiminy'ako hayiima nok'olhwanzo lhw'esy-ombuulho ebikaletha omururu. Abakulhu bakatholera ibabya ini balhume ababiyikolh'amo eby'erilebery'ako ebisiikiire omwibya ky'erilhangirirako omo mwatsi w'eryanza esyosente hayiima n'ebindu by'omo kyihugho. Akay-iyiniraya ebiritho isihali ihithana. Sibalibya na mururu ow'ebindu byomuky-ihugho ebithundathundire.

6. Oyukayiyinaya. Omukulhu akayisumathanaya kandi ini muyiyyinia. Akabya mubuya kandi w'olhukeri. Akasiikiira ebiriitho kandi syalihithana. Syalihuhirira omo mughulhu hakabya erihwa amaha. Ni mutswiri-tswiri kandi inyana bangukiire oko kyithaka. Eriyiyinia likatholera erithomekerwa oko ngebe y'obuli mwikiiriirya (II Pet. 1:6). Erilengw'ako busana n'erikiiriirya likalhw'amo eriyiyinia (Yak. 1:3). Eriyiyinia omo biritho likalhw'amo eriyikethera Nyamuhanga. Busana n'obuyiyinia bw'omukulhu kyikamuthokesaya erihira omo bandi abali omo biritho mw'akaghala. Kusangwa ayisumathenie kandi inyanawithe obulengekania, abikiiriirya bakamusikir'ako omo mughulhu w'erilengw'ako akabasuubay'amo amaha. Akathokesaya emikania eyikabya omo ndeko sy'ekanisa iyithaby'amo obuhaka. Akaleka omo Kanisa imwabya obuthekane n'erihumulikana. Eriyiyinia nirya mibere mikulhu kutsibu kandi likayitsutsiibawa kutsibu n'obuli mwikiiriirya. Abakulhu niberilebery'ako obuyiyinia.

EBIBUULYO

1. Hereraya omo bikuhi ekyinywa erikokya abagheni _____
2. Liriho busana na ___, kwilhabirirya liriho habwa bahi? _____
3. Heeraya omo bikuhi “opt to teach-eritholera erikangiiriirya” _____
4. Thonda emilhondo 7 oko “erikangiiriirya” _____
5. Thonda emiisindu 2 ey'erikolesery'amo obwabu (ebiinyu) _____
6. Thonda emisiindo 2 eyitholere erikolesery'amo obwabu. _____

7. Oyukaswiraya ni kyi_____
8. Thonda eby'erilebery'ako bibiri ebya eriswirya _____
9. Ebindu ebithuunda-thuundire ni bihi? _____
10. Eriyiyinia ni kyi? _____

EKY'ERYIGHA 24
EBIKATHOKESAYA ABANDU ERITHOLERA ERIBYA BAKULHU
B'EKANISA (III)

Emithwe Yomo Ky'eryigha

1. Oyuthehithana lhuba-lhuba.
2. Akathabalha ndeke eb'eka yiwe.
3. Akathunga abana biwe abayiketherwa
4. Syalibya mundu muhyaka omwiikiriirya
5. Oyukakanibaw'ako ndeke n'abandu b'eyiihya.
6. Omukoli wa Nyamuhanga.

ERIGHANIIRYA KUBYO

1. Oyuthehithana lhuba-lhuba. I Tim. 3:3 hakabuugha hathi omukulhu isyabya oyukahithana lhuba-lhuba. Tit. 1:7 hakabuugha hathi omukulhu akabya mundu oyutheneghena. Akathabalha oko bunya-muthima bwiwe. Syalikanaya kutse erikolha kyindu kyahi inyane n'obuhithane. Akabya wa buholho kandi akaletha obuholho. Yesu mwahererya omughisa oko bakaletha obuholho (Matt. 5:9). Abikiiriirya nib'eribya n'engebe y'obuholho embere sy'abandu bosi (Rom. 12:18). Bakabya n'amenge w'abunya-Lhubulha bw'obukabahererya eriyisiikya hayiima n'olhukeri. Bakabiba omo buholho ebiighuma by'obuthunganene. Bakaletha obuholho (Yak. 3:17,18). Thukahabulhawa: “muleke obukalihe obwosi n'erihithana, n'erikania ebibi, bibye hali okwinywe, n'erikolha nabi eryosi: kandi mubye b'olhukogho oghundi oko ghundi, ab'emithima myolho, imwabuyirana, ngoko Nyamuhanga busana na Kristo abiribabuyira” (Efes. 4:31,32). Thukabwirawa eryanguhya okwowa, isithwanguha erikania, isithwanguha okw'ihithana” (Yak. 1:19). Omundu oyuwanzire amalhwa yukanza eriletha erikaka-kakania. Akamin-yawa busana n'eriletha obutsumbu-tsumbu n'erikaka-kakania. Omukulhu akasombolhawa mo ky'erilhangirir'ako ky'obuholho n'eriyibombeka.

2. Akathabalha ndeke eb'eka yiwe. Omukulhu akabya ini mwira mubuya kandi thatha mubuya. Emitse yiwe mibuya yikabindulha erihika lyiwe eririkolya ok'obwa Nyamuhanga. Eb'eka bakalhangira kandi bakabya ibamwasi ndeke kwilhaba ghundi mundu ghosi. N'okweryo, bakakanaya oko mitse yiwe kw'ebibi kutse ebibuya. I Tim. 3:5 hakabugha hathi, “omundu amabya isyangathoka erithegheka eka yiwe y'ondeke, syangathoka erisondolla ekanisa ya Nyamuhanga. Eka n'ekanisa bikasondoler'awa omo misingyi y'obukristo. Erithoka n'erithalhuka ly'omundu likaminyawa n'aberihika ly-

iwe. Omundu amabya isyalithoka ery'embembethya eb'eka yiwe bo ndeke, akabya inyamabirikangana ngoko syatholere eribya mukulhu w'ekanisa. Koronelio inyakasikaya Nyamuhanga hayiima n'abeka yiwe (Emibiiri 10:2). Ab'eka yiwe ibamusiikirye n'erimukwama ng'ekyerilhangirir'ako iniakanza erikolha ebitholere. Omukulhu akatholera inyalhaghira eka yiwe iyamwowa, busana n'ekyo akathoka erihererya amenge oko bandi abakamuyitsuutsa eribawathiikya omo mughulhu w'emiryambo. Omuhereeri Eli mwasuyirwa kusangwa isyalitsweba abana biwe b'ondeke (I Sam. 3:13). N'okweryo ab-alhume, bakatholera ibatsuuka eriyikiriry'amo omo maka wabu imobathoka eribya batheya b'omo ihika lya Nyamuhanga, iy'ekanisa.

3. Akathunga abana biwe abayiketherwa. Ekyi kyikwamene n'ekyithukalhwa okwikani'ako ahighulhu. Abana b'omukulhu bakatholera "eribya abowa omo mibere yosi" (I Tim. 3:4). Bakatholera "ibabya bayiketherwa isibalitswerawa eribya ibakabya omo buhaka kutse omo mitse eyithuwene" (Tit. 1:6). N'okweryo abana b'omukulhu banganaleka inyatholera kutse in-yabya isyanga tholera. Ababuthi sibatholere ery'endererya abana babu bak-abahithania, niikwa bakatholera eritswererer'abo omo mibere y'erikenga Nyamuhanga (Efes. 6:4). Omubuthi akakanganaya ngoko anganakangii-riirya n'eritswere-rera abandi omughulhu akatswererera ndeke abana biwe. Syalitholera eritheya omo mosiindo ow'eriletera abana b'erihithana niikwa eribatswererera n'eribakangya olhwanzo n'erisondolh'abo ndeke. Omundu akalhangirir'awa ngoko akathegheka ab'erihika liwe imwaminywa ngoko an-ganathegheka ndeke eb'erihika lya Nyamuhanga. Abana b'omundu bam-abya ibakikalira amalhwa kandi ibawithe obuthakw'isoni ekyi kyikakangan-aya kyithi thatha wabo syasi eritswere-rera obw'owa. Nokweryo syalitholera eritheya ekyiihyo. Omukulhu akatholera iniathunga abana abayiketherwa kandi ibakowa omo mibere eyosi.

4. Syalibya mundu muhya-muhya omwiikiriirya. Omukulhu syangabya ini mundu muhya-muhya omo Kanisa. Oyukatsuuka, y'omundu oyukabya isyalyaminya bingyi, n'okweryo isyalya kulha. Eribuugha ghuthi "syathokire" n'ibuugha ghuthi salya akoghotha omo masako. Ekyiinywa "omukulhu" ikyo kyisa kyikaminyisaya omundu oyukuuliire kandi oyuwasi bingyi. Omundu oyukabya imwamabinduka syangabya Mukulhu w'ekanisa. Omuhya-muhyia anganabya omo kabi k'eriyihika neryo inyathoghera omwitserwa ly'enzii-ghu. (I Tim. 3:6). Akabya isyalyathekwa-thekwa habwa obw'embembethya. Biblia siyirikanaya ngani myaka mingahi omundu erikoghotha, niikwa yika-kanganaya ebyangalhangirwa oko mundu oyuwabirikoghotha. Omundu mu-ghuma anganathunga eby'erilhangirir'ako omo myaka mike kandi n'oghun-

di inyathwalha emyaka minene. Omulhume omulere akayitsuutsa emyaka n'eriminya ndeke imwathunga amenge. Omukulhu syalibya mundu mulere kutse mwikiiriirya muhya-muhyia.

5. Oyukakaniibaw'ako ndeke erilhwa omo b'eyiihya. Omukulhu akatholera inyabya inyawithe eriina libuya erilwa omo bandu abathe bikii-riirya (I Tim. 3:7). Erina libuya liwe likatholera eribya isilyanga tswebwa nomo b'eyiihya nibya. Abandu abakakolha nabo hayima n'abo abakasiba nabo bakasikaya emitse yiwe mibuya. Akabya kyakakalha embere oko bali omo mwirima (Matt. 5:14). Akaleka omwisi wiwe inyakolerya neryo abandu ibalhangira emiibiiri yiwe mibuya neryo ibahererya Nyamuhanga y'ol-hukengerwa (Matt. 5:16). N'abathikiiriirye nabo bakasikaya engebe yiwe nyibuya. Abathe bakristo bakikalha ibanathusamalire busana n'eritswera. Niikwa omughulhu bakahereraya ekyitsumbi oko ngebe y'omwikiiriirya ow'okwenene omo kyitswa ky'erimutswera, kyikakanaya ndeke oko mwikiiriirya oyo. Omundu ngoyu yukatholera eribya Mukulhu. Akaminyererawa busana n'engete yiwe nyibuya omo bulhambo obwiker'emo. Ekyi kyokyikamiinyiisaya erithunga erikanibw'ako libuya eriilhwa omw'abo abathe omo kathi.

6. Omukoli wa Nyamuhanga. Tit. 1:7 hakabuugha hathi omukulhu akatholera inyabya isyaliko kahinira ng'omukoli wa Nyamuhanga. Omukoli y'oyukasiighawa omo busondoli bw'ebindu by'obughuli bunene. Ni muthungereeri w'obutheke bw'obughuli. Awithe olhukwamirwa olhw'erilinda ebuthetheke bw'omukama wiwe. Kyikayitsuutsa omukoli eribya muyiketherwa (I Kor. 4:2). Eby'obuughuli ebikasiighawa omo byalha by'omukulhu y'emithima y'abikiiriirya ey'obughuli bunene (Heb. 13:17). Akatholera inyalind'abyo ng'omundu oyukendisyathonda ngoko ebyosi byabya byaghen-dire. Abirihebwa obusondoli bw'ebindu eby'obughuli bunene obulengire ebindi byosi oko kyihugho (Matt. 16:26). Olhumimbi lhwiwe ni lhunene kutsibu. Nokweryo, eribya mukulhu omulhume akatholera inyaminya eribya muyiketherwa oko miibiiri eyilithohire. Niweribya muyiketherwa oko bindu by'abandi eby'obughuli bunene. Akathekawa inyaby'amo obuyiketherwa obw'erisyahererya omughanzo wiwe. Omukulhu akatholera inyabya oyu-wasibwe ng'omuyiketherwa wa Nyamuhanga.

E BIIBUULYO

1. Omundu oyuthe muhithane, ni kyi? Omundu w'obuhaka akanza kyi?

2. Oyukaminya emitse y'omundu kwilhaba ghundi mundu ghosi, nindi?

-
3. Inyakasikaya Nyamuhanga na _____ kyiwe?
 4. Thonda ebisakirwe 3 omo masako ebikakanaya oko buyiketherwa_____
 5. Thonda emilhondo 3 eyikakanaya oko baana abayiketherwa.
-
6. Omundu muhya-muhya kyikaminyisaya kyi: _____
 7. Ni kyibi kyahi ekyikasamalira omwikiiriirya muhya-muhya? _____
 8. Ni bahi abo ab'eyiihya? _____
 9. Omukoli nikyi? _____
 10. Eky'obuughuuli ekyilhabire oko bindi ni kyahi? _____

EKY'ERYIGHA 25

EBIKATHOKESAYA ABANDU ERITHOLERA ERIBYA BAKULHU B'EKANISA (IV)

Emithwe Yomo Ky'eryigha

1. Syabye oyukanza erikolha ebyakalengekanaya bisa.
2. Oyukanza abandu babuya.
3. Ow'okwenene.
4. Oyuthunganene.
5. Omukulhu akakolera oko lhulengo.
6. Oyumakirire ekyinywa kya Nyamuhanga.

ERIGHANIIRYA KUBYO

1. Syabye oyukanza erikolha ebyakalengekanaya bisa. Omukulhu syangabya iyoyukanza erikolha ebyakalengekanaya iyuwene (Tit. 1:7). Syatholere akabya oyukayisunzira ebyosi kutse oyuthethwika muthima. Akaiisuunza inyanganalhwika ebyalyayisunzira kutse esyonzira asyakayan-zir'amo. Omundu oyuthikenga Nyamuhanga kutse oyuwanzire eby'ekyihugho akabya ini mundu w'omuthima mubi kandi oyukayanza iyuwene (II Pet. 2:10), niikwa omukulhu syatholere eribya athya. Sihali ekyakakolera omwikaka-kakania. Sihali akyakakolera omwikuunwa kutse eribuugha amabehi omo miyiheko, niikwa omo muthima mwolho akasunzira abandi b'ebibuya kwilhaba kwakayisunzir'abyo nibya. Akayira omuuuhwa omo myatsi y'abandi butsira omo byiwe bisa (Fil. 2:3,4). Siy'omundu ayukiikalha inyanzire eri-halhambwa (Yoh. 9). Omundu oyukanza erikwama ebiwe bisa akatsandaya ekanisa. Akaghana erikolerana n'abandi oko kyindu kirebe, mbino iyo inyalyakyitsemera. Akalengekanaya athi ekanisa eyosi yimuseghemer'eko. Niik-

wa omukulhu ow'eryembembethya ekanisa syatholere eribya ng'omundu oyu. Obw'embembethya bwabu bukakwamana n'eb'y'erilebery'ako n'obwolho-bwolho isibya oyutheliigha eby'abandi balyaghambulha. Omw'embembethya oyukayanza iyuwene syalithokesaya ghundi mundu erimukwama. Yesu eribya mw'embe-mbethya mukulhu ngoko ali, ni busana syali yanzi-ra iyuwene kandi ni mwolho-mwolho. Nomo anawithe obuthoky n'amani, mwathayironderya eyiwe nzira. Ng'abaliisya abali ahisi sy'omuliisya Mukulhu, Abakulhu bakatholera erikwama eky'erilhangirir'ako kyiwe. Sihali kyindu ekyikayitsuutsawa kutsibu omo kanisa kwilhaba eriyibombeka. Abakulhu bakakanganaya enzira y'erithendi-yanzir'amo ibobene kandi bakabya n'obwolho-bwolho. Sibehengemera okwibya abakanza ebyabu bisa.

2. Omwanzi w'abandu babuya. Omukulhu akanza ebyosi ebyuwene kandi ebilhungukere (Tit. 1:8). Akapona ekyibi ekyosi. Erikwama abanywani ababihya likatsandaya emitse mibuya (I Kor. 15:33). Akanza emyan-ya eyuwene n'ebindu ebyuwene. Akayikakiraya erithendikolha kibi kyosi (I Tes. 5:12, 22) kandi akayitsingirira oko byosi ebithunganene. Obuholho bwi-we bukasanganawa omw'ikolha ebya Nyamuhanga. Bingyi byangaminywa oko by'omundu akabya inyakayowir'amo ndeke. Thwangaminya binene oko mitse y'omundu omwisamalira abandi abw'akikalha nabo nganibandu ba muusiindo wahi kandi n'ebindu ebyakabya inyayowirir'amo ndeke. Omul-hume oyukatholera eribya mw'embembethya akatholera inyabya omwanzi w'abandu babuya kandi inyanzire ebindu ebilhungukere.

3. Mulingirirania. Omukulhu akabya mubuya, ow'okwenene, mulingirirania (Tit. 1:8). Ebyakakolh'ako omughulhu ghasi bikabya isiby'erithiimbya-thiimbya. Syaliyira lhuhandi hamabya eb'erilekya abandi. Syaliriigha hakabya obulibatha-ngania athi nimwakendikolha mibere mirebe. Eritswera liwe n'erithw'amo liwe bikakwamana n'obulingirirania hayiima n'omo kwenene. Akakolesaya obulengekania bwiwe omo myatsi y'okwenene, eby'erisiikiibwa, ebithunganene, ebibuyirire, ebyanganzwa, eby'erisiimwa (Fil. 4:8). Omo mubiiri wiwe ngomutheya, ebirengo bingyi bikabya embere syiwe ibyamutsandya oko mubiiri. Abiikiiriirya abandi abathekenga Nyamuhanga n'abathebya b'eyiihya bakamulenga n'erikyithya obulengekania bwiwe. Omughulhu omunene akendibya akanza erikolera ndeke abahugho n'abanywani biwe omo myatsi y'ekanisa. Akendiyisanga isikyolho eriminyerera ekyibuya kandi n'eriminyerera ekyithowene oko mubiiri. Niikwa akatholera inyabya omul-hume oyo abikiiriirya bawith'emo amaha wabu. Bakatholera ibaminya bathi omwiyo nimo bangathunga eritswerwa eriri ndeke.

4. Oyuw'erire. Omukulhu akabya inyerire (Tit. 1:8). Engebe yiwe si-

yiriby'amo kahinira. Ni ngebe eyihiiwe. Esyondambi syiwe n'akaghala kiwe bihihirwe busana n'omubiiri w'engabane. Omubiiri wiwe ali embeere sya Nyamuhanga ng'obuhere obuliho (Rom. 12:1). Syaliyitsandaya omo mitse y'obulibathangania, kusangwa Omulimu Abuyirire akikalha omo mubiri wiwe (I Kor. 3:16). Ng'omutheya akasondekanaya eriletera Kristo y'ekanisa ey'olhukengerwa, eyitheko kathingu, kutse obulema kutse kyindi kyibi kyahi: niikwa athi yibye ey'erire kandi isiyiriko kyihemu (Efes. 5:27). Akasumba ebyyalha eby'erire omwisaba (Tim. 2:8). Anasi ngoko abirikirawa omwibirikirwa erithunganene (II Tim. 1:9). Akalholhaya abandi b'oko nzira y'obuthunganene kusangwa iyo athunganene.

5. Omukulhu akakolera oko lhulengo (Tit. 1:8). Akathabalha oko mitse yiwe. Syalitsatsanga ebyiwe kutse eribitumura. Engulhu mbuya ni mulenge w'obuthunganene, erikolesya ndeke eby'oghuwithe, ighunalengekaniryre okw'itswera ly'omukama erikayasa (Emibiiri 24:24). Ngoko omuthibithi akalengeka ebyosi akakolesaya akayithekathekera amalingwatha, n'omukristo akatholera ikwabya athya, isi busana n'empiitha eyikakulha niikwa ini busana n'empiitha eyithe susuka (I Kor. 9:25). Thukatholera ithwikalha ithunayithaber'eko neryo ithwaletha emibiri yethu yahisi sy'obuthokyti bwethu, thukasyathoghotha kandi ithwabirithuulh'agho oko bandi (I Kor. 9:27). Omulimu Abughirire akaletha eryaghalya omubiri ng'ekyighuma oko bighuma by'omuliimu (Gal. 5:23). Omukulhu akathoka busana n'obuwathiikya obukalhwa eyiri Nyamuhanga neryo inyathoka erithabalha okw'ihithana liwe noko sya ngumbu syiwe. Engebe yiwe yikabya y'eriyyithanga birebe-na-birebe. Syalyiikiiraya omuthima wiwe erihithana. Ekanisa yiyisunzire kyingahi omwiyyithabalh'ako ly'abakulhu b'ekanisa kwehi?

6. Akamakirira kutsibu ekyiinyawa kya Nyamuhanga. Tit. 1:9 hakangan-girir'aya hathi omukulhu akatholera inyamakirira kustibu ekyiinywa ky'okwenene nimw'akendithoka busana n'erikolesya erikiiriya eritholere omo byosi, angathoka erikolha-kolya n'erilhuusy'ayo oko bakaghay'ayo. Oyu ni mwatsi kandi owakathulhayira oko kyiinywa eky'eribya "ighunatholere eribya iwangana kangiiriya". Akatholera inyabya inyanganathoka erikangii-riya eb'eyiihya hayiima n'abikiiriya. Akatholera inyaminya engangiiriya eyithere neryo inyathebulh'ayo. Akatholera inyabya inyanahikene eribambira obuhakani neryo inyakolesya ekyiinywa kya Nyamhanga kandi n'omuthima ow'erikangirirana nabo. Ekyi kyikayitsuutsa omukulhu inyabya inyabirkuthirwa ndeke omo ngangirirya eyitholere (II Tim. 1:13). Akatholera inyabya inyasi ndeke neryo obuhakani obwosi isibwanga mukyinda. Akatholera inyabya inasiikiire kandi inawithe olhukogho hayiima n'obuthokyti obw'eri-

kangiiriya. Eri lyimakirira kutsibu oko kyinywa kya Nyamuhanga eky'ok-wenene.

Hano hoky'eryigha ekyikathonda ebyo'mukulhu akatholera inyabya inyawithe kikahiindira. Niikwa enzumwa eyikahiinda oko mwatsi oyu yikasanga-wa omo I Tim. 3:10 eyikakangiraya yithi Abakulhu n'abawathiikya nibya, bakatholera ibatsuuka “erisiimwa”. Ekyi kyikaminyisaya kyithi ebithukalhwa okwisoma ahighulhu bikatholera ibyalhangirika ndeke om'obuli mundu oyu-kasonda eribana omubiiri w'ekanisa. Ekanisa eyosi yikatholera eribya iyiwithe obwiimiiri oko mitse y'oyukasonda eribya mukulhu. Ekyi kyikathukanganaya kandi kyithi eritholera eribya mukulhu kyikathwalha erithuuthya-thuuthya erikendithwalha mughulhu muli. Omughulhu owatholere akayitsutsiibawa, ekanisa iyathoka erikyiriya oko bikayitsuutsawa omo mundu oyo. Omul-hume syangakwamiri kabukalha neryo akathunga emitse eyi omo mughul-hu mukuhi, ekyi ni yithendererya. Akatholera inyabya inyabiri-yikanga-nia ngoko awithe emitse eyo kandi iyabiri siimwa. Emitse eyi yikathekawa ini yiwe kwenene kandi iyabiribya mibere yiwe. Eribya mukulhu kwenene kyikathokekana, niikwa sikyolhobire. Ebikayitsuutsawa bikabya omo muth-imma kandi n'eyiihya. Sihali ghundi mubiiri kutse kyaghanda kya musiindo ghosi wahi, ekyangaberererya olhulengo olhu. Ekyi ni busana sihali ghundi mubiri ow'obulithohe ng'oyu.

EBIIBUULYO

1. Hereraya ebiinywa 2 ebikaminyisaya “eryanza erikolha ebyagu bisa”

2. Hereraya ebiinywa 4 ebikakanaya oko “eribya isighulikolha ebyaghu bisa”

3. Omukulhu anzir'ekyi? _____ kandi ekyathanzire nikyahi? _____
4. Emikagho y'omundu yikakanaya bingyi oko _____?
5. Hereraya ebiinywa 3 ebikamiinyiisaya “Omulingirirania” _____
6. Hereraya emyanya 2 ahali ebikamiinyiisaya “obubuyirire” _____
7. Hereraya emyanya 6 ahakanaya oko “obubuyirire” _____
8. Hereraya ebiinywa 2 ebikamiinyiisaya “temperate - erighanzirira eby'eri-kolesya omo ngebe” _____
9. Omukulhu akatholera inyabya inyanasi erikangiiriya _____ hayiima na _____
10. Kyikamiinyiisaya kyi, “eritsuuka erisiimwa”? _____

EKY'ERYIGHA 26

EBIKALEKA ABANDU IBATHOLERA ERIBYA BAWATHIIKYA HAYIIMA N'OMUUBIIRI W'ABAWATHIIKYA OMO KANISA

Emithwe Yomo Ky'eryigha

1. Ebitsumbi byabo.
2. Omubiiri wabu.
3. Ebikaleka ibatholera.

ERIGHANIIRYA KUBYO

1. Ebitsumbi byabo. Omukoli oghundi omo kanisa yomo ndaghano Nyihya-nyiihya abya iy'omuwathiikya. Ithwamabirithonda ibikaleka abandu ibaatholera eribya bakulhu, n'eBiblia yikathonda ebikaleka abandu ibatholera eribya bawathiikya (I Tim. 3:8-13). Omul. 10, akabuugha athi, “kandi batsuuke erirengwa, neryo bamathendi-banik’ako mwatsi, bakole omubiiri w'omuwathiikya”. Omughulhu oyo Abawathiikya babya bakoli b'omo Kanisa. Omo Fil. 1:1 omukwenda Paulo akathumira ekisakango kyiwe oko bikii-riiryia eFilipi “hayiima n'abakulhu n'abawathiikya”. Ekyi kyikakanganaya ngoko abawathiikya babya bakahererya omo bwembe-mbethya bw'ekanisa ibane n'abakulhu. Erikwamana n'emilhondo eyi thukaminya ngoko omubii-ri w'obuhererya ni ghundi mubiiri omo kanisa kandi niwa ngabane ok'owo Mukulhu. Omo Emibiiri 6:1-6 thukasoma okw'isombolha abalhume omo kanisa ya Yerusalem erithwalha olhumimbi lhw'erihererya ebyalya n'eriwathiikya abiikiiriiryia ababya isibali yithoka. Olhumimbi lhw'abu lhwabaya “obusondoli obw'obuli kyiyo” oko bakwakali n'ababya isibali-yithoka (Emib. 6:1). Abakwenda basondaya omundu “oyuwanga hererya oko meza” (Emib. 6:2) omo kyitswa ky'abu. Ekyiinywa “erisondolya” na “erihereerya” kyan'ekyiinywa kyomo Guriki ekyo “omuwathiikya” kyilhw'iremo. Ekyi kyikathukanganaya kyithi abalhume irinda (musangyu) ababya basombwerewe basombolhawa omw'ihinda-hindana eryatsuuka. Omubiiri oyu ow'obuwathiikya, nokw'eryo, ni mubiiri mukulhu kandi ni kitsumbi ekyikatholera oko Kanisa y'omukama.

2. Omubiiri wabu. Abawathiikya sibali-bathahulhw'amo “batheya” b'ekanisa (I Pet. 5:1,2). Sibali bathabwirwa “ery'embembethya” liriryo abakulhu ni b'eryembe-mbethya ndeke” (I Tim. 5:17). Omubiiri w'abawathiikya niwa ngabane oko wa abatheya. Ngoko ekyiinywa Omuwathiikya “Deacon” kyikamiinyiisaya “erihereerya” thukasangana abawathiikya ini “baghombe” b'ekanisa. Olhumimbi lhwabu silhw'erilebereerya niikwa eriwathiikya. Ngoko abawathiikya abatsuuka babya b'eriwathiikya abakwenda, abawathiikya

b'omughulhu ono bakawathikaya abakulhu, ibo bo batheya kinyamulimu. Omubiiri wabu ly'erithokesya omubiiri w'ekanisa n'eriramya iryaghenda ndeke ngoko kyikatholera. Aho kyangathokekana ibawathiikya abakulhu eri-bathokesya erikolha oghundi mubiiri owa withe eriyitsuutsa linene ow'abakulhu basa bobakatholera erikolha. Ababiiri oko bawathiikya omo kanisa ye Yerusalemu mubanakolha ng'abathuuliiri (Stefano na Filipi). Niikwa ekyi siku'eryiikalha ikyinemubya kyithya ok'obuli muwathiikya. Omubiiri w'omuwathiikya ly'eriwathiikya abakulhu omo Kanisa bakasyalhuha kwilhaba lhulengo n'emibiiri eyo abandi balhume banganakolha. Ngoko kyabya oko bakulhu, habya hakiikalha ihane "abawathiikya" omo kyitswa kya "Omuwathiikya" om'obuli Kanisa. Sihali muwathiikya oyuwabya awithe obukulhu kwilhaba abandi. Abosi babya baghombe bolho-bolho b'ekanisa kandi ini bawathiikya b'abakulhu.

3. Ebikaleka ibatholera. Abakoli abosi abomo Kanisa y'omukama bakatholera eribya by'erilhangirir'ako, ngoko Yesu, iyoli muthwe, yo ky'erilhangirir'ako kykulhu. Nokweryo omundu akatholera inyabya n'ebikaleka inyatholera ng'ekyerilhangirir'ako inimo inyathoka erisombolhwa mo muwathiikya. Abawathiikya be Yerusalemu mubasombolhwa kusangwa "babya balhume abaka-kaniibaw'ako ndeke iboswire OmuliImu Abuyirire kandi ibawithe amenge" (Emib. 6:3). Babya nibya "iboswire erikiiriya hayiima n'obuthoky" (Emib. 6:5,8). "Erikaniibw'ako libuya" lino lyalhwa omo Kanisa hayiima n'eyiihya sy'ekanisa. "Eryosuuliibwa Omulimu Abuyirire" mulyal-hangirika omo biighuma by'omuliimu omo ngebe eyibuyiirire. Amenge wabu abya w'abulengekania n'eritswera libuya omo mubiiri wabu. Eribya "iboswire eryikiiriya hayiima n'obuthoky" babya balhume ibawithe eriyikethera erisiikiire omo Nyamuhanga, nokweryo ini balhume b'obuthoky, ebi by'ebindu ebikalethawa eryikiiriya. I Tim. 3:8-13 hakahereraya omukolholho ow'oswire ow'ebikatholera, aho thukigha ngoko omuhererya akatholera eribya "mutswiri-tswiri" kutse oyutsomene kandi inyawithe obulengekania. Syatholere eribya wa "thulimi thubiri" kutse erithunga amasuu abiri (obusu bubiri), erikania bindu bibiri-bibiri omo kyitswa ky'erikaania eky'okwenene. "Isyali yihereraya oko bwabu bunene" kandi isyawithe mururu w'ebindu by'omo kyihugho", abalhume abathe thamira kutse abakayi-ghombereraya ngoko thulyasoma oko Bakulhu. "Eribya n'ekyeriswekya ky'obwikiiriya eky'eriythabalh'ako" likabanika omwingira omo ngebe eyithiko kahinira hayiima n'erithuulha engulhu mbuya eyikathokesaya omundu erithunga obunyamuthima obusongokwere. Abawathiikya nabo bakatholera ibatsuuka "erisiimwa" n'eribya "isibaliko itswebwa" ngoko abakulhu babya. Bakatholera eribya "ibawithe mukali mughu-

ma” kandi “ibanathabere oko bana babu hayiima n’amaka wabu w’ondeke”. Abakali babu “bakatholera eribya batwiri-tswiri, isibathebya, ibahumulikene, ini bayiketherwa omo bindu byosi”. Ekyi kyikakanganaya obukulhu obw’omo bwikiiriirya bw’okwenene, eribya bakali b’abakulhu n’abakali b’abawathiikya. Sibatholere eribya abakathonga abandi bo nabi. Niikwa bakatholera erikolha olhuukwamirwa lhwabu lho ndeke kandi n’obuyiketherwa ibathoka erihir’amo omuuhwa n’eriwathiikya biira babu. Omo bithwamabiryigha ebi, omulhume amathoka eriyikangania ng’eky’erilhangirir’ako ekyitholere inyakendibya muwathiikya omo kanisa.

Ekyibuulyo kyangana-buuliibwa kyithi abawathiikya ngabangana-sombolhwa omo Kanisa eyith'emo Bakulhu. Erisuubirya liri lithi, "eyihi", busana n'esyanzumwa hino; (1) kusangwa omo Biblia simuli eky'erilhangirir'ako ekyindu ekyi. Liriryo, abakulhu bobabya bakatsuuka erisombolhwa (Emib. 14:23) kandi abawathiikya bakakaniibaw'ako haghumereera n'abakulhu (Fil. 1:1; I Tim. 3:1-13), ghulhusiiry'eho eYerusalemu abakwenda mubakolha ng'abakulhu. (2) ngoko abawathiikya bakabya b'akabiri oko Bakulhu, sikyangathokekana eribya muwathiikya kandi isihali Mukulhu ow'eriwathiikya. (3) Abawathiikya bamasombolerwa omo bithe bilhayiro, ahathe Bakulhu, ibakendigherya ery'emebembethya ekanisa neryo ibayihambira omwanya w'abakulhu. Niikwa abakulhu banganahererya isihali Bawathiikya, ngoko omubiiri wabo syalibya ahisi h'obuthokyi bw'abawathiikya (Emib. 14:23).

EBIIBUULYO

1. Abawathiikya bakanathunga ekyagħanda _____
 2. Abalhume mubanasombolhw'amo bawathiikya omo Emib. 6 ? _____
 3. Omubiiri w'abawathiikya si _____
 4. Thukasoma oko “Muwathiikya” ow’ekanisa _____
 5. Hereraya abawathiikya 2 omo Biblia _____
 6. Ng’abakulhu, kandi nga Kristo, abawathiikya bangan’embe-mbethya, kusangwa ni _____
 7. Abawathiikya abatsuuka babya boswire bihi _____
 8. Hereraya bindu 4 ebikathokesaya eribya muk’ali w’omuwathiik-ya _____
 9. Ekanisa yanganathunga abawathiikya isiyiwithe Bakulhu? _____
 10. Thonda myanya 3 aho thwargasanga omo Biblia ihakakanaya oko bawathiikya _____

EKY'ERYIGHA 27
OMUSIINDO ABAKOLI B'EKANISA BATHATHOLERE
ERISOMBOLERW'AMO

Emithwe Yomo Ky'eryigha

1. Omwikiiriya ow'okonzuuko.
2. Omwikiiriya oyuwithe oko bindu.
3. Omukulhu owa mughulhu mukuhii.
4. Erikolesya amathebo.
5. Omwiyisuunza ly'omuuthuuliiri
6. Simuusiindo ghosi-ghosi ghuulhuusiry'eho erikwamana n'eky'erilhangi-rir'ako.

ERIGHANIIRYA KUBYO

1. Omwikiiriya ow'okonzuuko. Erilhangira ndeke ngoko abakoli b'ekanisa bakasombolhawa, ni kibuya thwamatsuuka erilhangira omuusiindo bathatholere erisombolerw'amo. Eyi ni misombolere y'abandu bakakolesaya isi ya Nyamuhanga. Ni mbirinduke n'obuliibathangania omo ndeka-theka ya Nyamuhanga. Omughuma oko mikolerere eyi (eyithere)ly'erisombolha omundu oyuwatsuuka eryikiiriya, inyahulhw'amo mundu oyughunzerer'eyo ambu kusangwa yuwatsuuka eryikiiriya. Omughulhu omunene omulhume oyuwaletha omuuthuuliiri y'omo bulhambo akanayilengekaniray'amo eribya munene athi anganabya Mukulhu w'ekanisa. Niikwa sithulisoma oko "bikiiriya eribya omo mikolere y'eriyibughira omo masako". Eribya iniwe ghulyatsuuaka eribya mwikiiriya sokyiri kukolh'amo w'ekyitsumbi. Erithunga omughisa w'eribya mug huma w'oko balyatsuuka ekanisa sokyirikolha omundu mo Mukulhu kutse Muwathiikya.

2. Omwikiiriya oyuwithe oko bindu. Mughulhu omunene omwikiriya oyuwithe oko bindu kutse oko syombuulho nene inyasingikw'amo Mukulhu. Ekanisa yikayowa yithi erimuusiikya likendileka inyahonga mbuulho nene. Kandi bangana-musiikya busana n'obuthokyti awithe omo kyihugho. Niikwa Biblia yikakunga abandu busana n'obutheke bw'ebindu (I Tim. 6:17). Omukulhu syangabya wa mururu busana n'ebindu by'oko kyihugho ebith'emo nduundi (I Tim. 3:3). Omundu siw'eriysisonderya omubiri w'obukulhu busana n'eriyyihama omo bindu omo kyihugho (I Pet. 5:2). Eribya mw'embembethya w'omo kyihugho sikirileka omundu eribya mukulhu kinya-muliimu, niikwa kyikana mukakiraya eribya. Erithunga erithungo ly'omo kyihugho sokyiriminyisaya kyithi omundu ngoyo ni mutheke ewa

Nyamuhanga (Luk. 12:21). Bangyi ni batheke omo bindu niikwa ni buhanya, ab'obulighe, ni beera, ndime-thime kandi bali buthambalha kinya-muliimu (Erib. 3:17). Obutheke bw'ebindu sikyo kyikaleka omundu inyatholera eribya Mukulhu kutse Muwathiikya w'ekanisa.

3. Omukulhu ow'omughulhu mukuuhi. Abalhume bangyi bakaya-hulh'amo "Abakulhu b'omughulhu mukuuhi". Ekyi kyikamiinyisaya baka-kolha ng'abakulhu niikwa isibakulhu. Omundu inganabugha mughulhu muli inyanemuyahulh'amo Mukulhu neryo inyayowa athi atholere erisingikwa hakabya erisingika Abakulhu. Niikwa Abandu abakakolha omo "mwan-ya w'abakulhu" bakatsandaya endeka-theka ya Nyamuhanga. Eryanza lya Nyamuhanga liri lithi abakoli b'ekanisa ibasingikwa busana n'eriberererya ibikayitsuutsawa, niikwa "abakakolha omo mwanya w'abakulhu" bakalenge-saya erithunga omughisa w'omukulhu n'ebitsumbi nibya isibatholere. Kyiri "ng'eriyyithendererya eribya mukristo" kandi isighuli kiriraya ebikaleka omundu inyabya mukristo. Omundu amatsuuka eriyahulh'amo mukristo oyukaby'aho habwa mughulhu mukuuhi" kandi isyali, ekanisa yikatholera iyakolha kyahi? Ibakendimughana kusangwa simukristo. Kobine bithya ki-katholera "abakulhu abakaby'aho habwa mughulhu mukuuhi" ibaghanwa. Erisingika "omukulhu ow'amughulhu mukuhi" ni thomekera oko kyiinywa kya Nyamuhanga (Erib. 22:18). N'iyyihengeka oko Mwatsi Mubuya wa Kristo (Gal. 1:7,18). Ni ndeka-theka eyithe ya kwenene erisuba omo kyitswa ky'eya Nyamuhanga ey'erisingika Abakulhu n'abawathiikya.

4. Erikolesya amathebo. Omughulhu akanahiika amathebo inyingira omo busombole bw'ekanisa. Abikiiriya bakalengaw'ako ibatswangaliikania olhw'enge-lhw'enge lhw'eritheba-theba, eyi ni mikolere eyithe omo masako. Baka buugha-buugha n'erilemba-lemba ng'abakasondekanaya obuuthuuli. N'amakanisa awandi akasumbira abakoli b'ekanisa b'amaboko. Bakay-ighulirira kutse ibasagliisa abandi. Omusiindo ow'erisomboler'amo abakoli b'ekanisa ni wangabane oko mikolere y'erisombolha abakoli b'ekyihugho. Niikwa ekanisa simwanya ow'erithebatheber'amo. Omundu oyutholere erib-ya mukulhu sokyiri-muyiitsutsa erighenda akabwira abandu obubuya bwi-we. Sokyiri-muyiitsutsisaya erikolha mikania akayikani'ako n'eriyyihalhamba. Ekanisa yikasangawa iyinasi engebe yiwe n'eriminya ng'anatholere. Nibya, akabya isyali omo malingwatha n'abandi. Abalhume abosi abakatholera, basingikawe, kandi sulibya iwamakyindwa kusangwa oghundi akendisingik-wa. Abakulhu sibalisombolhawa erilhaba omw'ithoya buuthuuli, liriryo bakasingikawa. Eritheba-theba siriri omo ndeka-theka ya Nyamuhanga mu-kasonda erisingika abakulhu n'abawathiikya.

5. Omwiyyisuunza ly'omuuthuuliiri. Omuthuuliiri oyukakolerana n'ekanisa, angana-lengw'ako kutsibu iniasombolha omundu wiwe oyo anzire. Omundu oyu angabya iyoyo wabirikolera omuthuuliiri oyu y'ebibuya. Neryo omuthuuliiri inyayowa athi amuhembe busana n'olhukeri olhwabirimukolera. Kutse omuthuu-liiri angananza erisombolha omundu oyukendihiira "omo masakwa wiwe" akanza ery'embe-mbethya ekanisa ngoko ayisuunzire. Angaliigha erisingika omukulhu, omukulhu oyo amabya inyakendibya akakolha eby'omuthuuliiri ayisunzire om'omughulhu owali embeere. Omo misiindo eyi hayiima n'eyindi minene omuthuuliiri akalengaw'ako erithoghera omo muthegheho w'ebibi. Niikwa amakolha athya akabya inyamahuuma erilhuua oko lhulengo lhwa Nyamuhanga olhukamusond'ako eribya isyawithe lhuhandi omo mwatsi w'erisombolha abakoli b'ekanisa (Emib. 10:34). Eryo, omuthuuliiri inyakendibya oyukasiikkaya omundu nzwi-ri. Akathoghera omw'itswerwa ery'eriyyira olhuhandi olhwakaseghemer'ako. Eribya omuuthuuliiri iyulyakwanza sikyiri leka omundu akatholera eribya mukoli w'ekanisa.

6. Simuusiindo ghosi-ghosi ghuulhuusiry'eho erikwamana n'eky'erilhangirir'ako. Ni kwenene eky'eryigha ekyi, sikyanga bughayo emisiindo eyosi eyitha hikire ey'erisingikir'amo abakulhu. Niikwa kyangana-buugha kyithi obuli musiindo ghosi isigh'oyo owali omo ndeka-theka ya Nyamuhanga oватhe-kwamana n'ekyerilhangirir'ako ni w'amathebo. Omusiindo wosi ow'erisingikir'amo abalhume eribya baakoli b'ekanisa kandi isyali kwamana n'ebyerilhangirir'ako akabya isiwa kinya-mulimo liriryo niw'amathebo. Erisombolha lyosi eryangakwamwa ahathe erisamalira oko mitse y'omundu eya Kinya-mulii mu n'emithokere yiwe, likabya ini ry'amathebo. Nyamuhanga akakolha ab'embembethya erilhaba omo by'erilhangirir'ako: obulengekania bw'abandu sibuli bindulha ekyo.

EBIIBUULYO

1. Ekanisa yikabuugha oko "bikiiriyya b'eriyyibweka"? _____
2. Biblia yikanakanaya oko "bakulhu ab'eriyyibweka"? _____
3. Obutheke bw'oko kyihugho sibulileka omundu akabya _____
4. Omukulhu "w'eriyyibweka" ali ng'omwikiiriyya "ow'eriyyibweka" _____
5. Thonda emisiindo 2 eyikakolesiibawa omo mathebo _____
6. Hakanabya amalingwatha omwisingika abakoli b'ekanisa _____
7. Hereraya ahakakanaya oko Nyamuhanga hathi syaali siikaya mundu-nzwi-ri _____
8. Ekyiinywa kighuma ekyikathondogholha endeka-theka ya Nyamuhanga _____

- ey'esisomboler'amo abakoli ni kyahi? _____
9. Thonda ebindu 2 ebikaghanaya eribindulha endeka-theka ya Nyamuhanga_____
10. Abikiiriya bakana thoghaya obuuthuuli omwisombolha abakoli b'ekanisa? _____

EKY'ERYIGHA 28

NGOKO OMULIIMU ABUYIIRIIRE YUKASINGIKA ABAKULHU

Emithwe Yomo Ky'eryigha

1. Erikangiiriya eritholere.
2. Eriyisuunza eritholere.
3. Erisiima eritholere.
4. Abalhume abakalhangirika.
5. Erisombolha kutse erisingika.
6. Eriminyererwa kanisa oko kanisa.

ERIGHANIIRYA KUBYO

1. Erikangiiriya eritholere. Eryikiiriya ni kyisomo ekyikakangiriribawa (Yoh.6:45). Abikiiriya bakatsuuk'erikangiiriibwa imuba batizibwa (eribiikwa) (Matt. 28:19,20). Eribya n'ebikaleka omundu inyatholera eribya Mukulhu n'erisingikwa kyikayitsuutsa erikangiiriibwa mughulhu muli inyanemukangiiriibwa n'obuyirinde. Omuliimu Abuyiiriire yukakolha abandu mubatheya (Emib. 20:28). Omuusiindo ow'omulimu akakoler'amo Abakulhu, w'omusiindo w'eBiblia kusangwa Biblia w'omuyali wa Muliimu Abuyiiriire (Efes. 6:17). Omuliimu mwasondolha amasako aw'alhwamu erikangiiriya erikakolha abandu mo Bakulhu omo Kanisa. Niikwa omuusiindo oyu akathoka erikolha ndeke, abandu ibalyakangiririb'awa Biblia. N'okweryo ni kyindu kyamubongo erihabulha lya Nyamuhanga erikakolha abandu mo bakulhu erikangiiriibwa om'obuli kanisa. Erikangiiriya ly'eBiblia okw'iyithondeka ly'ekanisa likatholera iryaminywa ndeke. Obuli mwiikiiriya akatholera inyamina emyanya n'emiibiiri y'abakoli b'ekanisa. Eby'erigha bingyi, n'ebi'eryigha by'embiitha, n'erithuulira, bikatholera erihebwa abandu byangatheka-theka ekanisa omo bw'embembethya obutholere. Ahathe erilhaghira erihikire sihangabya mithondekere mibuya y'ekanisa. Erikwama amasako y'onzuuko eyikalholhaya okwiyithondeka ly'ekanisa erihikire. Omuliimu Abuyiiriire akatsuuka erikolha abalhume mo Bakulhu erilhaba omwithendekwa eritholere.

2. Eriyisuunza eritholere. Eribbasulha ery'akabiri ly'erisuubirya eritholere erilhwa okw'abo abakabya ibalyathendekawa. Ni Nyamuhanga oyukakolera omo bikiiriiryा eryanza n'erikolha busana n'obutseme bwiwe (Fil. 2:13). Abiikiriiryा bakabya bamakangiriiribwa ebyo Nyamuhanga asondire, neryo bakayow'amo eryanza erikolha erisonda liwe. Oko nzuuko ebikaleka abandu ibatholera eribya Bakulhu bikabuugha bithi, “omundu amanza eribya oko mubiiri w'omukulhu bw'ekanisa, akabya inyakayiitsutsa mubiiri mubuya” (I Tim. 3:1). Omundu akabya akiigha ebikakanganaya bithi ni mwiikiiriryा oyu kulire, akakolerera erithung'abyo. Akayow'amo eriyiitsuutsa eribya mwikii-riiryा oyusiikiire, oyuwangathoka eribwira abandi athi bakwame Kristo. Omo nzira eyi Omuliimu Abuyiiriire akabya inyalimuletha ebiighuma by'emitse y'obukristo (Gal. 5:22,23). Niikwa si Muliimu Abuyiiriire musa owakalethera omundu y'eriyitsuutsa eribya Mukulhu. Sitani nayoakanalethera omundu y'engumbu, niikwa busana n'ekyilhubirilhwa ky'engabane. Sitani akaletha eriyiitsuutsa ly'ebitsuumbi n'eriyihalhamba, kutse busana n'esyombuulho, abandu bakalengekania ok'obukulhu. N'okweryo, si obuli ngumbu eyikaletha eryanza obukulhu, ghuthi ni ya kwenene. Niikwa abandu bamasonda omubiiri oyo kusangwa bayisuunzire eribya n'emitse ngeya Kristo, kusangwa bayisuunzire ebiighuma by'omuliimu, aho Omuliimu akabya iwakasondolha abandu eribya bakulhu. Eriyitsuutsa eri eritholere ni kyindu kyikulhu omo nzira ey'eryanke eribya Mukulhu.

3. Erisiima eritholere. Abakoli b'ekanisa bakatholera ibatsuuka erisiimwa (I Tim. 3:10). Eyi y'enzira ey'akasathu eyikakanganaya yithi Omuliimu wakakolha Abakulu. Eriminya ndeke-ndeke ly'omundu n'eriyitsuutsa ery'okwenene, bikamusondolera eriyiikuuly'amo mukristo oyuhikene. Erikulha liwe n'emithokere yiwe yikalhangirika n'abandi bikiiriiryा. Omundu omughulhu akayirinda omo ngebe yiwe n'okwikangiiriiryा lyiwe, erikulha-kulhana liwe bikalhangirika embere sy'abosi (I Tim. 4:15). Ngoko bithondire ahighulhu, erihika okw'ebi likathwalha mughulhu muli. Erikulha kinya-muliimu sirya sesene. Emaka omwithendekwa, erisaba kandi n'erikulha biwithe eriby'aho. Erikulha mughulhu muli kyikayiitsutsawa erithokesya omundu eribya omwembe-mbethya kandi omukangiiriiryा. Erilhaba omo myaka eyi omundu akabya inyamakangania ng'oko atholere, ni buugha ambu inyanemuhethya emitse y'obwikiiriiryा ey'abandi bakalhangira. Ekyikalhw'omo, abandi bikiiriiryा bakahika okwiminaya obubuya n'emikolere yiwe ng'omwikiiriiryा oyuthe eky'erilhangiriir'ako. Ebikaleka omundu inyatholera obukulhu akabya inyanemuthung'abyo omo lyolho-lyolho. Erily'eriminyerera omundu oyukatholera eribya Mukulhu.

4. Erisondekania abalhume. Abakwenda eYerusalem mubalhaghi-ra bathi ekanisa yisondaye omo Kanisa mwabalhume bathe basingika Abawathikya ab'erimbere-mbere (Emib. 6:3). Ekyi ky'eky'erilhangirir'ako eky'akani ekyikakanganaya ngoko Omuliimu Abuyiiriire yukasingika abakulhu. Abalhume abatholere bakasombolhwa erilhwa omo kanisa neryo ibasmalirw'amo abakendisombolhwa mo bakoli b'ekanisa. Ghulhangire ngoko ekyi ni lhukwamirwa lhw'ekanisa. Ekanisa eyosi, iyabikangiiriibwa ndeke, ni y'erisondekania omo bikiiriiryaya bayo abakulire kandi ibanawithe ebikaleka ibatholera obukulhu. Omo musiindo oyu abikiiriiryaya ibobene-bene, isi ghundi mundu oyuli eyighulhu okwibo, bakasingika abakoli babu (Emib. 6:5). Bakasombolha abalhume abobakalhangira ibahikire omo kathi-kathi kabu. Bakasingika oyo banzire erikwama. Bakahulha abobanzire erigherererya imubathoka eribya nga Kristo. Ekyi ni bbasulha likulhu. Omuliimu Abuyirire akasondolha emikolere erilhaba omo masako n'omo mithima y'abikiiriiryaya. Oyo balyasombolha ni kwamana n'erisondolha ly'omulimu wa Nyamuhanga. Bakakwamana n'amenge wa Nyamuhanga awakasanganawa omo kyiinywa kya Nyamuhanga (Kol. 1:9) bakasaba bathi Nyamuhanga amuhe amenge wiwe (Yak. 1:5). Erilhaba omwisaba bakabulhaya Nyamuhanga erithwamo erilhaba omo buhererya bwiwe (Emib. 1:24). Sihali ky'eriswekya ekyikakolhawa ambu abandu bangamiinyerera oyukendisombolhwa, liriryo Omuliimu Abuyirire wakabya musondoli erilhaba omo kyiinywa kya Nyamuhanga. Amena w'abalhume ababirikubungulhwa akasomawa n'erisakangwa inyalethwa embeere sy'ekanisa. Ekanisa eyosi yikalhangira kandi iyaminya omulhondo w'amena aw'abandu abakendisombolhw'amo habw'emanya eyibakasonda. Ekyi kyikamiinyiisaya "erisondekania" omundu oyuwithe ebikamutholeraya eribya Mukulhu.

5. Erisombolha kutse erisingika. Biblia yikabuugha yithi abakulhu baka "highulhawa-erithongoliibwa" (Tit. 1:5); Emib. 14:23). Biblia eyindi yikabuugha yithi erisuumbwa "appointed". Ekyiinywa ekyi kyikamiinyiisaya eriminyerera kutse eriyimiinyikalya. Ekyiinywa "erihighulha" kyabirit-sandiibwa n'ebisomo bingyi, okwibyo kyikamiinyiisaya "erihererya ebaruha eyikikiriraya erikolha omo kitsumbi ky'ekanisa. Niikwa Biblia siyiri buugha oko "omukulhu w'ekanisa" kutse ehamulii y'obukulhu bw'ekanisa. Erihighulha omo Kanisa y'omo Ndaghano nyiihya-nyiihya lyabya likamiinyiisya erisingika abakulhu b'ekanisa abo abikiiriiryaya babya ibabirisombolha. Ikyikakolhawa omuthuuliiri (Tit. 1:5), kusangwa yuwabya mbuuyii omugulhu abakulhu babya isibali basingikwa. Niikwa erisombolha lyabya isiriri okw'iyiisunza ly'omuthuuliiri. Iyo siyo wabya akasombolha. Ekyi sikyo ekyiinywa "erihi-

ghulha” kyikaminyiisaya. Omuthuuliiri inyakathuulhuughanaya omo buno bwiwe buyira ebyo ekanisa eyosi iyikabya iyabiriithw’amo. Ibakabya ibabiri-kubungulha omo Kanisa n’erisiima abakendisingikwa. Bamabiri kubungulha abalhume abakatholera, ekanisa eyosi iyabirithwalha endambi omwikubungulha n’erisiima kutse erithendisiima ab’erisombolhw’amo. Sihali muusiindo w’erisomboler’amo owasakangire liriryo obuli mwikiiriiryia akasamalira obuli mundu oko bakalengekanibaw’ako eribya bakoli neryo inyayithwir’amo ng’omundu erikwamana n’ebikatholera omundu eribya mukoli w’ekanisa, ngoko Biblia yikabuugha, neryo inyamuliigha kutse inyamughana. Eriithwamo ly’abandu banu lyangana thwalha mughulhu muli, nga yenga ibiiri imobathoka erisamalira ndeke n’erisiima. Abakoli banu bamabiri-siimwa, neryo erisingikwa lyabu iryabwirwa ekanisa eyosi erilhaba omo Muuthuuliiri kutse om’oghundi murangyi. Ekyi kyokyikahulhaw’amo erisingika kutse erihighulha abakoli.

6. Eriminyererwa kanisa oko kanisa. Abakulhu bamabirisamalirwa, n’erisiimwa, kandi n’erisingikwa n’olhuhindano neryo hakasighalha eriminyererwa abanya-banya abalyasombolhawa n’ekanisa. Abawathikya b’erimbeere-mbeere “mubasingikwa” embeere sy’abakwenda abasabir’abo n’eribathek’ako ebyalha. Abakwenda omo mughulhu w’ebithiko-thiko, ibakahereraya obuthokyi bw’omuliimu obukaswekeraya erilhaba omwitheka oko bandu kw’ebyalha (Emib. 8:18). Niikwa ngoko omughulhu ono sihakyiri bakwenda hayiima n’ebithiko-thiko, eritheka oko bandu kw’ebyalha sikuiri-kolha olhumimbi olhu. Niikwa ekanisa y’eNtokia tuyatheka oko Baranaba na Saulo kw’ebyalha erikangania erisiimwa lyabu n’eriyisinga ngoko bakendikolera-na nabu (Emib. 13:1-3). Omo mughulhu ono eritheka oko bandu kw’ebyalha lyanganakolha olhumimbi olhu. Kyine omo mitheghekere (niikwa sikuikulu) eriminyererwa ly’abakoli bahya-banya omo muusiindo oyu n’eriliigha ly’ekanisa eyosi. Omo musiindo w’embere sy’abangyi, ekanisa yinatholere eriminyererera abakoli abakulhu n’abanya-banya, erisabir’abo n’eribalhaghakobakendi-bayikethera n’eribolhobera. Omukonga oyu akatholera iniabya muke niikwa inyanawithe ekyakamiinyiisaya. Ekyi isikyatsandiibawa kyikabya ky’obulibathangania kutse omukonga owathawithe ekyakaminyisaya. Sihali ekyangaleka ihabya erirya kutse eriheembwa. Yikatholera iyabya endambi eyo ekanisa yikaminyererera abakoli bayo omo mwisi.

EBIIBUULYO

1. Omulimu Abuyirire akakangiriraya erilhaba omo _____
2. Hereraya abandu babiri abakaletha eriyiitsutsa _____

3. Ekanisa yikabya yinasamalire erikulha ly'omundu, akabya inyan
na _____
4. Omusiindo ow'akani ly'eri _____ abalhume abatholere.
5. Oyuka "kubungulha omo balhume" banu nindi? _____
6. Hereraya ebiinywa 3 ebikaminyiisaya "erihighulha-erithongolya"

7. Nindi ukasingika abakulhu erilhaba omo Bathuuliiri? _____
8. Erihighulhwu lithe lyabya, ekanisa yika _____ kutse _____
abandu bayo abakasonda omubiiri w'obuuthuuliiri?
9. Abandu banatholere erithekw'ako ebyalha imubathoka erikolha ebithi-ko-thiko? _____
10. Omuuusiindo mulebe w'omukonga akatholera erikolhwu erikangania kin-ya-mwisi _____ na _____ ly'ekanisa.

EKY'ERYIGHA 29 **ERITHUMA LYA NYAMUHANGA OKO KANISA**

Emithwe Yomo Ky'eryigha

1. Ghubye eky'erilhangirir'ako embere sy'ekyiihyo.
2. Ghuliisaye ekyiihyo.
3. Ghutswerererere ekyiihyo.
4. Ghutheghaye ekyiihyo.
5. W'embembethaye ndeke.
6. Ghulebereraye oko mithima.

ERIGHANIIRYA KUBYO

Thwabiriminya ebikaiiitsutsawa omundu eribya Mukulhu, lino thukayaminya emiibiiri yabu. Ebi thukendibisangana omwithuma lya Nyamu-hanga akalhaghbir'abo ebibakole. Omwiminya ebyo abakulhu bakatholera erikolha, thukendilhangira ndeke abakulhu ngoko bakatholera ibabya.

1. Ghubye eky'erilhangirir'ako embere sy'ekyiihyo. Nomo kyine ambu eby'eryigha byabiri thukangania bithi abakulhu bakatholera ibabya b'erilhangirir'ako, okwenene oku kukatholera erithasyakania kuko kwilhaba. Sihali kyindu kyikulhu kwilhaba eky'erilhangirir'ako omo ngebe y'omukulhu w'ekanisa. Ebini ebyosi ebikaleka inyatholera obukulhu biseghemire oko musingyi oyu. Busana n'eyi abakulhu bakathumawa omo I Pet. 5:3. "isi habw'eribya bami embere sy'ekyiihyo, niikwa busana n'eribya ky'erilhangirir'ako embere sy'ekyiihyo". Omuhererya oyukayithwalha nga ni mukama embere sy'abikii-

riiry ayalikolha ngoko Nyamuhanga akanza ebyiwe ibyakolha. Omwami anganakolesya obuuthokyи bwiwe erikaka abamukwamire bakole ebyo banzire, niikwa obw'embembethya obwa muthiina oyu sibulithokesaya endekatheka ya Nyamuhanga eribererera oko bakristo. Endeka-theka ya Nyamuhanga y'erisondolha n'erikwama, y'eyirengire obubuya kandi niya muusiindo w'eyighulhu. Siyirikolera okw'ikakwa liriryo oko lhwanzo. Siyi seghemere oko banya-kikaka niikwa oko buthokyи bweby'erilha-ngirir'ako. Omusiindo wa Nyamuhanga ow'obwembembethya ali athi, abikiiriiry apanza erikwama abembembethya babu. Kobiri bithya abakulhu bakatholera ibayiithey ibo-bene-bene liinyuma ibatheya ekyiihyo (Emib. 20:28). Bakatholera ibakangania ekanisa y'eky'erilhangirir'ako ekyihikire ekky abikiriiry abandi bakendiyowa ndeke bakakwama emibere yabu mibuya. Abakulhu sib'eribya bakama b'ekanisa niikwa ibabya ky'erilhangirir'ako embere sy'ekyiihyo.

2. Ghuliisaye ekyiihyo. Omubiiri ow'akabiri oko bakulhu ly'eririisya es-yambuuli sya Nyamuhanga esiri omwinywe" (I Pet. 5:2). Ekyihande ekyinene omo mubiiri w'abakulhu ly'erilisya kutse erikangiiriiry ekanisa. Ekyiinywa kya Nyamuhanga ni byalya by'abakristo. Kyikendibahiimba kinya-muliimu (Emib. 20:32). Abalyahinduka bakayiitsutsa amathe imubakulha (I Pet. 2:2). Abandi bakanza ebyalya ebikalire erilhwa omo kyiinywa kutse omo buthunganene (Heb. 5:12-14). Abakulhu bakatholera ibahererya ebyalya oko bikii-riiry balere hayiima n'oko bakulire. Bakendikangiiriiry amasako okw'ibibene n'ebibene, kusangwa "bakatholera ibabya ibangana kangiiriiry" (I Tim. 3:2). Niikwa kandi bakabya ibakendilebererya okw'ikangiiriiry ly'abandi bakangiiriiry n'eribaha omuuwha hayiima n'ebyerikolesya. Ni lhukwamirwa lhukalire eribya mukulhu ow'erighabira ekanisa y'akalyo ka kinya-muliimu, ni lhumimbi lhukalire kwilhaba erighabira ebyalya-byalya oko eka yaghu. Ekyi kyamakolhw ndeke ekanisa iyikendikulha kinya-mulimu, niikwa abakulhu bamathalhuka, ekanisa yikendihwa akaghala neryo iyathiinda. Eriramya erihikire nalyo ni kalyo k'omuthima w'omwikiiriiry. Omughulhu abakulhu bakathalhuka erikolya oko bikiiriiry kw'ebyerikolesya omwiramya ebihiikire, abikiiriiry bakalhwalha n'eryo ibaghotsera kinya-muliimu (I Kor. 11:30). Nokweryo Nyamuhanga akathuma abakulhu eriliisya ekyiihyo kyiwe erilhaba omwikyishererya akalyo ka kinya-muliimu akabirithekwa-thekwa ndeke akakendiribwa emithima.

3. Ghutswerererere ekyiihyo. Erithomeka okw'iriisya ekyiihyo abakulhu bakathumawa eritswerererera ekyiihyo. Ni "b'eritheya" ekyiihyo n'erilebererya kukyo (Emib. 20:28). Ekyiinywa kye Guriki hano "eritheya ekyiihyo" omo kwenene kyikamiinyisaya "erikolha ng'omulebererya oko mbuuli". Erileber-

erya oko sya mbuuli kyikaminyisaya erisisondolha n'obuyirinde. Omo mu-ghulhu w'eBiblia abaliisyia ibakakesaya ahali esya mbuuli. Ibamina obuli bulhuhe bw'obuli mbuuli kandi ibawith'e lhwanzo ok'obuli mbuli. Omo kyiro, abaliisyia ibakathimbaya oko syambuuli kw'olhukanda, kandi omo musibo ibakasondolh'asyo erilhaba omo syonzira syowene. Enguma yanabya yamathalha inyakasondekanay'ayo. Enguma yanabya yamalhwalha kutse erihuthalha, inyakatheka kuyo kw'amaghutha oko kyironda kyayu erihika aho yikendi suba-subanira. Omuliisyia omughulhu oghosi inyakasondolha esyambuuli syiwe; isyali-sithibithaya. Inyakasye-mbembera n'erisibirikira n'erisikangya enzira. Isikaminya omulenge wiwe neryo isika-mukwama isinanzire kusangwa isikaminya ngoko asyanzire n'erihererya ebitholer'eso. Omo nzira eyi abakulhu kubakatholera ibakolha abikiiriya bo bathya ky-inya-mulimu. Bakatholera eriminya n'eryanza obuli mwikiiriya. Bakatholera erisondekania abathere n'eritheya abaluhire. Abakulhu omughulhu oghosi bakabya embere sy'ekanisa bakakangy'ayo enzira, isibalibya enyuuma y'ekanisa n'erithibithy'ayo. Bakasondolha omo muusiindo w'erilhangira bathi ekanisa yikendibakwama iyinayowire ndeke, iyinasi ngoko ni busana n'obubya bwayo erikolha yithya. Omwisoma Eyan. 23, thukaminya ngoko Nyamuhanga akatswererera esya mbuuli syiwe kandi ngoko omo bwolho-bwolho n'obuyirinde akaminyisaya embere sy'abakulhu nabu eritswerera n'erihambirira esyambuuli syiwe. Abakulhu bakathumawa eritswere-rera ekyiihyo kya Nyamuhanga.

4. Ghutheghaye ekyiihyo. I Pet. 5:2 hakabuугha hathi abakulhu, "mutheghaye esyombuuli esiri omukathi-kathi kenyu. Mulebererayeso kusangwa mwanzire erokolha muthya busana na Nyamuhahanga, butsira erihathikanwa. Kandi simukole muthya busana n'erihembwa lisa, niikwa omo muhwa w'erikolha...". Abakulhu bahebirwe omubiiri ow'erilebererya busana n'ekyilhubirilhwa ekyihikire kandi n'omuthima mubuya. Amena "Omukulhu" na "Omulebererya" akakanganaya athi abakulhu ni b'erilebererya ekansi. Omuliimu Abuyirire akakolha abakulhu mu "balebererya oko" Kanisa (Emib. 20:28). Erilebererya eri siritholere likabya ly'erikuunwa, niikwa ibanzire bathya. Ni buugha ambu "abakulhu bakatholera ibayithwir'amo eribya balebererya, butsira ikuunwa, isibanzire niibya. N'erilebererya lyabu likendibya inirya musiindo oвате w'erikuuna abikiiriya, niikwa oyukabathokesaaya erikwama ibalyanza bathya. Ekilhubirilhwa ky'abakulhu isikyabya ky'esyombuulho kutse ebitsumbi, niikwa ini kyomo muthima ow'erikolera Nyamuhanga. Omulebererya w'ekyithunga kyosi-kyosi akabya inyawithe ol-

hukwamirwa olhulithohire. Niikwa abalebererya b'ekanisa bawithe olhukwamirwa olhulengererye. Omuliisya Mukulhu asyabuly'abo okw'ibya ndeke n'oko mubiri w'ekyiihyo. Abakatholera eriberererya olhukwamirwa lhawabu n'obuyirinde bunene kandi bakathekawa erikolha bathya omo muthima owatholere. Eri lyikolha omubiiri ow'erilebererya oko Kanisa.

5. Embembethaye ndeke. Ni lhukwamirwa lhw'abakulhu erisondolha ndeke ekanisa (I Tim. 5:17). Ekyihandi kyino kyikathonda okw'abo abakasondolha ng'abo “abakakolera omo kyiinywa n'omo ngangiiriry”. Omwitonda omubiiri w'abakulhu, Biblia yikabuugha yithi: “ko omundu amabya isyasi erithea abomo nyuumba yiwe, angathoka athi erithea enyuumba ya Nyamuhanga?” (I Tim. 3:5). Ko biri bithya, kyikalhangirika kyithi, omwithea ekanisa, kyikamiinyiisaya erikolha ghukakangiiriya n'eritsomana ekanisa ngoko omwiny'eka akakolerera ab'eka yiwe. Erithabalha siriri-miinyiisaya lithi omukulhu abye muheke oko kanisa (I Pet. 5:3) kyikamiinyiisaya erilebererya ok'obubuya bw'ekanisa n'erisondolha abikiiriya omo by'omuliumu. Abandu abandi bawithe ekyibakalengekanaya ekyithere ambu mbino ky'ekyikakanibaw'ako omo kyiinywa omulemi “ruler”. Bakalengekanaya bathi omwembe-mbethya akatholera inyakolha ng'omwami oyukakolha abali ahisi syiwe mu bakobe. Ekyi sikuitholere oko bakulhu abak'embembethaya ekanisa. Biblia yikabuugha yithi nib'erithabalha, kyikaminyisaya kyithi sib'eribya bathaleghana omo myatsi y'ekanisa. Bawithe eribya bimaniiri kabutsira bakaghala-ghandyia ekanisa eyo bakimanira. Bawithe omo bw'embembethya bwabu m'olhumimbi olhulithohire. Abakabere-reraya olhukwamirwa olu lho-ndeke bakatholera “erihembwa kabiri..” kusangwa olhumimbi olu lhulithohire (I Tim. 5:17). Abakulhu bakathumawa erithabalha ndeke ekanisa y'omukama.

6. Ghulebereraye oko mithima. Abakulhu ni beri liiwa n'eryolhoberwa. “mwowe abakabasondolha kandi mukole ebyo bakababwira. Bakatheghaya emithima yenu, ng'abandu abakendisyakangania Nyamuhanga ebyo bakolha, neryo bakole bathya n'obutseme, butsira buulighe: bamakolha n'obuliighe sibwendibalethera nduundi” (Heb. 13:17). Ekyikalire omo byosi ebi ly'erilebererya n'erithonda ebihambire oko mithima y'abikiiriya. Bali ng'abaliingyi oko lhuiimbo lhwe Yerusalem ababya b'eribyako omusasi w'abandu bamathendibwira abandu enzighu kuyamasa (Ezek. 3:17-21). Ekyangayitsuutsa erisamalirwa kwilhaba ni kyahi, ekyilhabire okwibwirwa ambu ghukendisyathonda ebyabya oko muthima gh'oghundi mundi? Omukulha siw'erisamalira buyira , niikwa niw'erisyathonda eby'abikiiriya bomo Kani sa yiwe bakolha. Erithea erya muthina oyu likaiiitsutsa erikalha ighunay-

ikengemerere abu ghukalinda ngabene buholho (I Pet. 5:8). Kyikayiitsuutsa erithomekera oko butheya obw'erithendi lekerera oko ok'obuli mwikiiriirya omo misonia (Emib. 20:28). Omukulhu akathumawa erilebererya omo mithima neryo inyanakangania eyiri Nyamuhanga y'endondogholi oko biikiiriirya.

EBIBUULYO

1. Thonda emilhondo 2 oko omukulhu eribya ky'erilhangirir'ako _____
2. Omukulhu akaliisaya ekyiihyo erilhaba omwikolha kyi? _____
3. Thonda akalyo ka misiindo 2 ako abikiririya bakasonda _____
4. Erilisyा kutse erikangiiriirya ekyiihyo nina kyighuma n'eritswerererera?

5. Abakulhu b'ekanisa bakan'embe-mbethaya ng'abasondoli b'ekyihugho?

6. Ni biinywa byahi 2 ebikalhw'amo ekyiinywa "omutheya" _____
7. Omukulhu akatholera iny'embembethaya ekanisa ngoko ak'embembethaya
ya _____
8. Thonda emyanya 4 ahakakanaya oko "erilebererya" _____
9. Omuliisya w'esyambuuli aby akyabaya hayi akasondolha esya mbuuli?

10. Hereraya ekyindi kyiinywa ekyikaminyisaya "erilebererya" _____

EKY'ERYIGHA 30

OBUMINYIKALHO OBW'OBUBI OBUKABANIKA

OMW'IYITHONDEKA LY'EKANISA

Emithwe Yomo Ky'eryigha

1. Erithondeka lyosi-lyosi eyighulhu sy'amakanisa.
2. Erithondekana lyosi-lyosi lyamabya omo makanisa.
3. Ab'embembethya b'ekanisa bamatsuuka erilhwira eyiihya sy'ekanisa.
4. Embirinduke yosi-yosi yamabanika omo kanisa.

EBIKAKUUNINGIRA

1. Erithondeka lyosi-lyosi eyighulhu sy'amakanisa. Hali buminyikalho bulebe obukakanganaya ngoko ekanisa yikayingira omw'itsanda. Ebi byangahulhw'amo obuminyikalho bw'ebibi, kandi bukakanganaya buthi endeka-theka ya Nyamuhanga yirimubindulhwa. Enguma ya kubo ly'eriyithondekania omo makanisa. Erithondekania erisosire lithya likalhangirika

omo bisomo bingyi. Hakabya ekanisa eyiri ahakathi-kathi k'awandi makani-sa amake-make. Neryo ekanisa enyinene eyi yikalhaghira esindi sy'ebyerigh-ender'ako. Yikasombolha omuthuuliiri wayo, n'erisondolha emibiiri yayo, neryo iyalhaghira yithi habyeho eribathuuha emisolho. Ekainisa ya Kristo yinasi ngoko Biblia siyirikiriiraya emithondekere ey'omuthina ng'oyu. Niik-wa embirinduke y'omuusiindo oyu, omughulhu akanahika iyayiseserya omo bandu ba Nyamuhanga. Eky'erilebery'ako, abikiiriirya bangyi bakanza amathendekero w'eBiblia eribya kyithunga ky'obuhererya eyighulhu oko makanisa wabu. Bakanza abiikiiriirya abasungu ibabya bakasingika n'erithu-ha omuthuuliiri wabu. Neryo omo kanisa mukabya mwamabanika omulyam-bo, bakanza abikiiriirya obomo America eribathwir'amo eky'erikolha. Niik-wa amathendekero w'eBiblia syalithunga buthokyi obw'erikolha amakanisa. Abikiiriirya abasungu sibo b'erithwir'amo amakanisa eky'erikolha. Obuli Kanisa yikatholera iyabya iyiwithe eriyithabalh'ako eryoswire. Omughulhu ekyithunga kyosi-kyosi kyikathunga obuthokyi eyighulhu oko makanisa, kakabya ini kaminyikalho k'obubi n'eritsanda ly'ekanisa.

2. Erithondekana lyosi-lyosi lyamabya omo makanisa. Kusangwa abikiiriirya bangyi babinduka ibakalhwa omo makanisa w'ebisomo, bakanza eriyithonduka ngoko babya eriimbere. Erikolha bathya bakako-lesaya obukiso nga “esyandeko sy'erithuulha sy'ekyiinywa” eryanza erimathania amakanisa w'ohaghuma. Neryo bakathuma abakwenda erilhwa omo makanisa the-the-the n'eryo ibakolha olhuhiindano olhw'ahaghuma. Bakasombolha abakurathi, Omukulhu w'ekyithumbi, Omubikyi, omusakangyi. Banganayil-huk'amo “Endeko y'abathuuliri b'omughulhu ono”, bakakangania eriyikundikania ng'amaliisya, n'amathungereeri na disiturikiti. Hakabya ngabane nyike kutse isihali, ahakath-kathi k'emithondekaniryre y'amakanisa aw'omo bisomo. Neryo esyandeko sy'ekyiinywa hino nomo syangakolha mubiiri mubuya, n'ebithunga byomo makanisa aw'omobisomo kubine bithya. Ekyi sikiyireka bikabya by'omo masako. Omo Biblia simwabya ndeko-ndeko si-yithondekire. Ni tsopa-tsopania erikalhwa omo makanisa aw'omo bisomo. Abikiiriirya babirilhwa omo malengetania aw'ebisomo, niikwa emithok-ere y'omo bisomo siyithabahulhuk'amo. Nomo kyine ambu emberenduke yanganabya nyike oko nzuuko, ni musiindo owakalhw'amo erithera linene. Esyandeko sy'erithuulha engulhu syangasuubiibw'amo erikangiiriirya omo Kanisa nguma-nguma. Ekyikalhwa omo, esyonzumwa esyosi esywene sanganabikwa, neryo isithuwene n'emikolere emibi ibyaguswa hali. Abikiiriirya kobangaghenda emuliro bathya ibanemuthunga erisanga-sangana n'erihererya omuuuhwa ahakabya ihabere erisanga-sanga eri. Niikwa emyatsi y'eri-

kolesya abakoli iyabiri lekwa, isihali babikyi, n'emithahi eyindi. Isibendikolha esyandeko esy'eriboher'amo eby'ekanisa yikendikolha. Sihendibya irenga misolho. Ebyosi ebyuwene bikakwamawa, n'ebithowene ibyasighalha. Biblia yikathuhana erilenga emyatsi yosi' n'erikwama ebibuya n'erisagha obuli muusiindo w'ekyibi. (I Tes. 5:21,22). Esyandeko sy'erithuulha engulhu syamabiri-samalirwa, isikendighanwa neryo ekyilhubirirwa kyasyo eky'ekyibi isikyendithasyasa. Niikwa ebyuwene byanganathasyalethwa omo ndeko sy'ekanisa neryo ibyakaniibwako, n'abalyabiletha. Eriyithondeka lyosi-lyosi ng'erya amakanisa erikolha esyandeko sy'erithuulha engulhu ni kyabubi, kandi ni kaminyikalho ak'omubi akerikyitha oko kiinya kya Nyamuhanga.

3. Ab'embembethya bamatsuuka erilhwira eyiihya sy'ekanisa. Akan-di kaminyikalho k'obubi ly'erithunga abakoli abakalhwa eyiihya sy'ekanisa. Abakoli b'ekanisa aba banganabya b'omuusiindo ogho thulyakanay'ako eyighulhu kutse bangabya ibakalhwa omo wandi makanisa. Ekanisa enene, eyisiikire yamabya hakuhi n'enyike, eyithawithe mani, enyinene yikalenge-saya erithabalha oko nyike. Ekanisa enyikulhu yangalengekania yithi abakoli bayo ni bakoli b'amakanisa amake-make awabathimbir'eko. Ekyi sikya kwenene. I Pet. 5:2 hakalhayira abakulhu "...eriliisya ekyiihyo ekyiri omwiny-we". Abakulhu b'omukanisa ni b'erithea oko myatsi eyiri omo kathi-kathi k'ekanisa yabu nyisa butsira yindi. Emib. 20:28). Hakabuugha oko Bakulhu erithea ekyiihyo eky'omuliumu abiribakolh'amo balebererya. Omulimu abya inyabiribakolh'amo batheya oko kanisa y'e Efeso nyisa Emib. 20:17. Ekyi sikyirimiinyiisaya ambu abakulhu sibangaleghana ebiri omo makanisa awandi kutse isibangabawathiikya n'erikolerana nagho. Ng'abali omo mubiri mug huma owa Kristo, bangana-bawathiikya (Efes. 4:16). Niikwa abakulhu banu bakawathikaya n'eribathek'amo omuuwhwa isi busana n'eribya bakoli b'ekanisa eyindi. Obuthokyi bwabu bukabya omo kanisa yabu nyisa, n'obuli kanisa yikathabalha oko myatsi yayo. Erithunga abakoli erilhwa omo ghundi musiindo, erilhwa eyiihya nikaminyikalho k'obubi obw'eritsandya ende-ka-theka y'obwembembethya ya Nyamuhanga.

4. Emberinduke yosi-yosi yamabanika omo Kanisa esiyithaber'eko. Endeka-theka ya Nyamuhanga y'eyobuli kanisa eriyithabalh'ako. Obuli Kanisa yiyimenieho habwa Kristo. Yiyithondekire siyiri na yindi Kanisa kutse kyindi kyithunga eribya eyighulhu okwiyo. Siyiri ahisi h'obusondoli bwa bandi bakoli. Obuli kanisa yikayithwir'amo omo myatsi yayo, erikolha emiibiiri yayo, erithonda emyatsi yayo, eriyisombolera abakoli babyo, erisongya-songya esyambuulho syayo, erisondolha emisabe yayo, n'eritsweba abiikiiriiry ya bayo abakathoghera omo sobe. Eyi ni ndeka-theka ya Nyamu-

hang. Eyi y'emikolere ye Biblia. Eyindi mikolere eyithe ngeyi, iyikendibya iyamaketha obuthoky bwa Nyamuhanga n'eritsandya ekyilhubirirwa kyiwe. Thwikiiriaye erikolha ebindu bya Nyamuhanga omo musiindo wa Nyamuhanga, omwikolha ebiri omo Biblia omo musiindo w'eBiblia. Emikolere ya Nyamuhanga yo mikolere yirengire eyindi yosi.

E BIIBUULYO

1. Ekyikakanganaya eritsandya kyanganahulhw'amo _____
2. Ni ithondekana lyahi eryo amakanisa manene ayisuunzire? _____
3. Abikiiriya abasuungu banawithe obuuthoky oко makanisa?

4. Erihulhuka omo _____ akaleka abiikiiriya bangyi ibanza emithonderekere eyithere.

5. Thonda ebibi 3 eby'esyondeko sy'ahaghuma omw'ithuulha engulhu

6. Ekyangasuba omo kyitswa ky'esyandeko sy'erithuulha engulhu ni kyahi?

7. Abakoli b'ekanisa eyindi banatholere erithabalha oко kanisa eyindi?

8. Abakulhu bakalebereraya oко kyiіhyo, ekyiіhyo ni? _____
9. Ni makanisa mangahi aw'omuliimu Abuyirire akathek'ako abakulhu erilebererya?

10. Hereraya ebiinywa 2 ebikakanaya oко makanisa awali omo masako

**OBUMINYIKALHO OBUKAKANGANAYA OBUBI ERYASIRA
EKANISA**

1. Ekyithunga kyosi-kyosi ekyikakanganaya obuthoky oко Kanisa.

OBUTHOKYI BW'AHA KATHI-KATH

I Ekanisa	I Ekanisa	I Ekanisa
--------------	--------------	--------------

2. Erisongya-songerya amakanisa wo haghuma (nomo hangabya busana n'erikolha omubiiri owene) neryo ihabya abakoli, omubiikyi, n'aboko ab'aha-ghulhu okw'aho:

Ekanisa Ekanisa Ekanisa
I I I
Abakurathi-abakoli-district-ebithunga

3. Ekanisa kutse mug huma oko bakoli bayo kutse abikiiriirya eritsuuka erithunga obuthokyti oko kanisa eyindi:

I ----- ABAKULHU ----- I
Ekanisa evisikiire

Ekanisa eyith'ime
ndeke

Ekanisa
eyikatsuuka

4. Embirinduke yosi-yosi omo ndekatheka ya Nyamuhanga obuli kanisa eriyikolera endwamu yayo, eriyikolera byabu, n'eri yikolera miibiiri yayo:

Ekanisa	Ekanisa	Ekanisa
I	I	I
Miibiiri	Eriyiithwiir'amo	myatsi yayo

EKY'ERYIGHA 31

OBW'EMBEMBETHYA BW'EKANISA NGOKO BWATSUUKA ERITSANDA

Emithwe Yomo Ky'eryigha

1. Obulhaghu bw'eBiblia okw'ithogha.
 2. Ebyo thukighira oko byabya kera.
 3. Erithakira abalisva abathe bakwenene.

ERIGHANIJRYA KUBYO

1. Obulhaghu bw'eBiblia okw'ithogha. Eky'eryigha kyethu eky'eriumbere mukyabuugha enzumwa nguma ey'eryigha oko mithondekere y'ekanisa thuthi ni kyamubongo, kyiri kyithi erithogha ery'oko nzuuko lyasira omo bu-

sondoli bw'ekanisa. Eky'eryigha kyino kyikendithukangania ngoko eritsanya eri lyasira ekanisa. Eky'eritsuukir'ako thukalhangira obulhaghu bw'omo Biblia buthi erithogha lyasasa. Omukwenda Paulo mwakengesya abakulhu ba Efeso athi esyombwa sy'omoli sikendisyingira n'eripura ekyiyo. Esyombwa esi b'abakangirirya b'amabehi, abakesya pura abikiiriirya n'eribathalya (Emib. 20:29, 30). Obu bwabya bulhanghu obukakanganaya ngoko ekanisa yikendisyatsandibwa n'abakangiiriirya b'amabehi. Ni kyikulhu ngoko Paulo mwabuugha athi, "abenyuu-benyuu" mwomukendi-syahangana abakangiiriirya b'amabehi. Ekyi kyamiinyiisaya ambu abahakani omw'inywe nimo banemwendisyalhwa; omo bakulhu n'omo bembe-mbethya. I Tim. 4:1-4, Hakasangawa erikengesya erindi, lithi abandu b'akesyakyitha okwiikiiriirya. Abakangiriirya b'amabehi bakakanganiibawa ngoko bo bakesyabya nzira ey'erikyiithya abikiiriirya. Kandi abakangiiriirya b'amabehi bakakanganiba-wa ngoko erikyitha lyasyasa. Omo IKor. 1:10-13 Thukalhangira eriyighaba-ghaba iryabiryasa omo Kanisa ye Korinto. Ekyi kyasa busana n'abikiiriirya erikwama ab'embembethya babu butsira erikwama Kristo. Eriyighaba-ghaba n'eritsanda omo bw'embe-mbethya bilhuka-lhukene n'obusondoli bw'ekanisa. Erindi ikunga liri omo II Tes. 2:3,4, erikabuugha lithi erisuba enyuma likendisyasa n'omundu w'ekyibi "omubi oyo" akendisya-kanganiibwa. Oyu abya ini oyo oyukendisyiikalha omo Kanisa n'eriyahulh'amo Nyamuhanga. Erisuba enyuma lyabya irikendisyalethwa abakulhu abathesagha Nyamuhanga, abandi omo kanisa n'abandi erilhwa eyiihya. Niikwa obw'embembethya bw'ekanisa bukinu-wene, habya irithogha erisuba enyuma. Niikwa abakulhu n'abakangiiriirya babere balhwa oko kyiinywa kya Nyamuhanga, noko ndeka-theka ya Nyamuhanga y'emithondekere y'ekanisa, eritsanda mulyingira omo Kanisa. Biblia yabya iyabirilhaghulha okw'ithogha eryasyabya omo bw'embembethya. Thukalhangira obubi obukalhwa omwiyighaba-ghaba eri n'engangiiriirya eyithere ey'omughulhu ono.

2. Ebyo thukighira oko byabya kera. Biblia yikahiinda n'ekyuutsuutsuu ky'amakanisa musangyu erilhwa omo Asia (Erib.1,2,3). Amakanisa amanene abya inyabiri tsanda ngoko obulhaghu bwabya ibwabirithuulhagho. Thukendibya thukalholya embere, thunemukubu-ngulha amakanisa aya, nibya n'ebiblia isiyiri yakyingwa, thukathasya-lhangira erikengesya okwisay-suba enyuma, irinemubererera. Biblia yikabuugha yithi enzighu yikatsandaya ekanisa erilhaba omw'ikyithya abikiiriirya erilhwa omo "kyolho-kyolho ekyikabanika omwisi wa Kristo" (II Kor. 11:3). Ni kwenene ekyo kyabanika omo mithondekere y'ekanisa y'omukama. Abandu mubayowa isibathahum-wa endeka-theka ya Nyamuhanga. Busana n'eriyanzira esyombuulho n'ebit-

sumbi, mubathomekerako n'eribindulha emithondere ye Biblia. Endondogholi y'ebithwangaminyir'ako by'ebyabirilhaba omwibyaho ly'ekanisa ngoko thukendilhangira omo lyolho-lyolho Endondekania y'ekanisa koyikingir'amo eritsanda: (1) Erisuba enyuma lyatsuukira oko bw'embe-mbethya bw'ekanisa, obusondoli bwabere bukaalhwa oko ndeka-theka ya Nyamuhanga, esyasobe nene musyanguha iryiingira. (2) Ekyilhubirirwa ky'abasuba enyuma kyabya kibuya. Sibaminyisaya erisuba enyuma. Mubalengekania bathi omwibendulha emithabalire yikendibya mibuya kwilhaba. Niikwa mubasubya enzira ya Nyamuhanga mw'eyomundu. Enzuuko y'erisuba enyuma yabya nyike. Ekyi ni kwenene. Abandu "bakathendera" omo lyolho-lyolho erilhwa oko ndeka-theka ya Nyamuhanga niikwa ibanemusubenyuma. (4) Erisuba enyuma lyamabiritsuuka, kyikathokesaya abandi erikwam'abo. Kyikabya olhukyo olhuke ngalhukyingukere, neryo ekyungungu ky'abandu kyisa kyikathibitha eryingira. (5) Busana n'eriyihambulya omo abatsuuka erisuba enyuma, eriyihumangura iryabiritsuuka omo b'erimbere abasuba enyuma. Abandu ibakabuugha ambu kusangwa abandi babirikolha kyindu kyighuma ibo bakayakolha ebilhabire ok'waho. (6) Sihali mbirinduke nene eyabya yabereho sesene, niikwa eby'engabane bike-bike ibikakwam'ako lyolho-lyolho. Abandu bakalhangira eritsanda erinene eryangabyaho sesene. Niikwa esyambirinduke nyike-nyike sisiri tsomanawa, hakalhaba mughulhu muli isisiri syalhangirwa. (7) Abandu mubatha-huumwa erithunga obuthokyi obulingirirene nobw'abakulhu. Lhuuba mubasombolha "abakulhu b'omo muuyi", neryo linyuma mubasombolha "abakulhu b'abakulhu". (8) Abandu mubathahuma erithunga obw'embembethya bw'omo kanisa nguma. Omo mughulhu neryo mubathomengekania amakanisa inyali ahisi sy'abakulhu. (9) Amakanisa awabya alithohire mwanza obw'embembethya bw'amakanisa amahya-mahya kutse awaby'athawithe mani. (10) Abalhume abasomire mubanza eribuughira abandu abolho-bolho omo kanisa. (11) Abasondoli mubanza ebitsumbi by'eribya ahighulhu oko bikiiriirya b'obuli kyiyo, neryo bamatsuuka "ekyitsumbi ky'abembembethya bebisomo" Omukumu na Omuhereeri; ebiinywa ebi sibiri omo masako. (12) Amasako mwasamalirwa ngakalire, neryo bamasakanga Katikisimu erisobolya amasako. Obu katikisimo buno mubwathunga obuthokyi obulingirirene n'eBiblia. (13) Esyandeko sy'abakulhu musyakolesiibwa erithw'amo ebyo abikiiriirya bakatholera eryikiiriirya. Neryo erithwamo ly'abakulhu n'obulengekania bwabu eryo mubyabya by'erikaka oko biikiiriirya erikwama. (14) Obw'embembethya bw'ekanisa neryo mubwatswangana n'obwekyihugho. Ekanisa kuyabya yalekire yithya omwanya wayo ow'obunya-muliimu neryo yamabya buthokyi bw'epolitiki.

Hanyuma waho obulibathangania bw'omo bihugho mubwathomekerwa oko kanisa. Oyo w'omusiindo ow'enzighu yatsandiray'amo obw'embethya bw'ekanisa obwolhobire. Thukalhangira obulhaghu bwe Biblia omo myatsi eyi ey'erisuba enyuma ngoko bwabererera. Omo mughulhu ono thukalholha embere n'erilhangira erithogha omo bisomo.

3. Erithakira abaliisya abathe bakwenene. Eky'eryigha ekyikalholhaya embere kyamabya ikyanganabya ky'amubongo embere syethu, ab'embembethya bamakanisa w'omughulhu ono, bakatholera ibahulikirira erihabulhwa. Isibakolha esyasobe esy'akolhawa n'abakulhu b'ebisomo abatsuuka Thahulikirira erithakira eriri omo ndaghano eyakera oko baliisya abathekolla okwenene. Ni thakira inene bungahi eriri oko baliisya b'omughulhu ono, "obuuliighe oko baliisya abakaheraya n'eripanza-panza esyombuuli sy'olhuliisiiryo lhwaghe, lebaya nasyaba-suyira busana n'ebibi by'emiibiiri yenyu" Yer. 23:1,2). Abasondoli abawithe amaka bangana-kakirya erisuba enyuma erithendithasyaby'aho, abolho sibangathoka. Nyamuhanga abirihir'aho olhukwamirwa olhulithohire okw'abo abakasondolha abandu biwe. Kandi abi-ri lhagha olhuhembo olhubuya oko b'embembethya b'okwenene. I Pet. 5:4 hakalhagha eby'erisyahemba abakatheghaya ekyiihyo. "Omuliisya Mukulhu asyabya atsubuka, bakesyathunga embiita y'olhukengerwa eyithe-susuka". Ni mbiitha y'olhukengerwa ya musiindo wahi eyasyahebwa abakulhu ba-buya eriilhwa eyiri Omuliisya Mukulhu kandi Omutheya w'emithima yethu? (I Pet. 2:25). Yikendisyabya mbiitha y'olhukengerwa eyithe-susuka.

EBIIBUULYO

1. Thonda emyanya 4 ahakasangawa obulhaghu bw'erithogha oko Kanisa

2. Omughulhu _____ basyathogha, ekanisa yasyasuba enyuma.
3. Enzighu yikakyithaya abandu erilhwa _____ lya Kristo.
4. Obusondoli bw'ekanisa erithogha lyabya omo _____
5. Enzuuko y'erithogha yabya _____
6. _____ y'abangyi yabya mbuya.
7. Ekyiinywa "Omukuumu" n'ekyiinywa "Omuhereeri" nina biinywa by'eBiblia? _____
8. Obw'embembethya bw'e _____ mubwathuulhuungana n'obwe _____
9. Ni mulhondo wahi omo Biblia owaka thakira abaliisya abathekolla okwenene? _____
10. Ni mulhondo wahi owakalhagha olhukengerwa oko baliisya b'okwenene?

EKY'ERYIGHA 32

ERY'EMBEMBETHYA ENDEKO Y'EKANISA

ERIGHANIIRYA KUKYO

Thwamahika oko ky'eryigha ekyikakuniingira omuthwe w'ebi'eryigha oko "bw'embembethya bw'ekanisa ya Kristo" ngoko kyisakire omo masako. Niikwa thuthe thwahiinda, thukenditsuuka erilhaba omo by'erilhangiirir'ako endeko y'emiibiiri y'ekanisa ko yikabya. Esyandeko nasyo isyembembe-thibwa omo misiindo minene emibuya. Eby'erilengekania ng'abino ni by'eriseghemer'ako buyira, ebyangibukwa omo mithondere eyikakolesiibawa. (1) Ebindu ebyosi bikolhawe omo musiindo ow'ekyitsumbi kandi inyanayithondekire. (I Kor. 14:40). Ekyi kyikasonda eritheka-theka eryuwene. Eritheka-theka ni ry'eritsuuka endeko yithe yahika. Omulhondo oyu akayitsuutsa emithondekere eyuwene n'emikolere mibuya. Hakatholera ihakania mughu-mughuma. Ihabya erisiikania ahakathi-kathi k'oyukakanaya n'abahuliikiiri. (2) Obuli mughuma akatholera erisiikya oghundi, omundu erighanza abandi kwilhaba iyuwene-wene (Fil. 2:3). Ekyi kyikaleka ihathabya erineghena, obukyine, n'eri-kaka-kakania. Obuli mughuma akabya inyananzire erihererya obulengekania bwiwe oko kyika-kaniibaw'ako erileth'aho erikolerana. (3) Sihabye oyukanza eriyithwalira omukania owosi (III Yoh. 9). Sihabanike oyukanza erikangania athi iyo yuli ahighulhu oko bandi. Eriyiheka lyosi isilyaby'aho. Abosi bambale obwolho-bwolho; eriyiminy'ako n'eriyiheka isibyabanika. Abosi ibambilha obw'olhobwolho kusangwa Nyamuhanga akalhwa n'abakaiheka, n'eri kanya olhukogho oko bakayikehaya (I Pet. 5:5). (4) Obuli mundu asondaye erihererya abandi hayiima n'ekanisa. Yesu mwabuugha athi embere syiwe omukulhu y'omughombe w'abosi (Matt. 20:27). Ekyi mwathukangy'akyo omughulhu anabaya ebisando by'abakwenda (Yoh. 13:12-15). Obuli mundu niw'eryingira omo ndeko y'ekanisa inyanzire eribya mughombe. Obuli mughuma akole omubiiri w'ekanisa n'obutseme. (5) Mutsuuke endeko n'eri hind'ayo n'emisabe ey'okwenene. Omo ndambi eyi ey'omubongo busana n'erithwir'amo eby'erikolera ekanisa, amenge wa Nyamuhanga n'obulengekania bwiwe bikabya ibikayiitsutsawa kutsibu. Abirilhagha amenge okwabo abakamus-ab'agho (Yak. 1:5). Emisabe siyitholere yikabya isiyiwithe nzumwa omwisubirira muyo. Bakatholera ibabya n'omuuuhwa n'eriyitsingirira Nyamuhanga abawathikaye (Yak. 5:16). (6) Obuli mukulhu (kutse obuli mulhume, hamabya hathe bakulhu) athunge eyiwe ndambi ey'erimanira endeko. Ekyi kyikendikunga omundu omughuma erilengekania athi iyo y'omukulhu w'esyandeko emighulhu eyosi. Kyikahereraya obuli mughuma y'omughisa ow'eribya

inyanasi eryimanira endeko omo mukania. Kandi kyikahigha erikaka-kakania n'obuuha. N'iyibegherya ndeke omulhume erikolesya obulengekania bwiwe n'eriyiyinia omwisondolha endeko mbuya. Oyu simubiiri mwolho. Omukulhu w'endeko nibya, syalithunga buthokyi omwithw'amo eky'erikolla kwilhaba abandi abali omo ndeko. Ni buthokyi bwiwe erisondolha endeko yithoke eribya iyiyithondekire bakaghambulha oko mwatsi w'endeko. (7) Omundu mug huma akatholera inyasakanga ndeke ebyosi ebiryakaniibawa omo ndeko. Olhumimbi olhu nalho lhwanganaghanbanwa ilhwaleka eribya lhw'omundu mug huma om'obuli ndeko. Omundu oyo nayo akabya isyawithe buthokyi kwilhaba abandi abali omo ndeko eyo. Akasakanga eby'endeko yikamubwira erisaka bisa. Iyo simukoli kandi syalithunga kyaghanda. Oko muhiindo w'endeko ebiryasakangawa bikatholera ibyasomwa n'erithekwako amaboko w'abosi kundi bihikire. Neryo oko nzuuko y'endeko eyindi ebindu ebi bikendisyasomwa kandi endeko yikayatsuuka. Ebisakango ebi niby'eribika ndeke kusangwa hanganasyabya eribuulya ekindu ngamukyasohwa kyithi omughulhu w'embere. Obusakange obu sibutholere bukabya buli-buli bukaluhya abahulikiriri. Muthunge eritheka-theka eryuwene busana n'endeko, kandi simuliighire "erihathikana likabya omo ndeko". Erisegheerya endeko habw'omughulhu muli kyikiitha ebilhubirirwa by'endeko neryo isihendisabya ekyikakolhawa. (9) Mwikiriraye omulenge w'obuli mulhume eryowiibwa omo mukania. Simwiikiiriraye omundu mug huma kutse abandu baghumerera bakabya inibo basa abakakanaya. Obuli mulhume ahebawe obwiranda obw'erikania enzumwa yiwe isihali erimwingirira. (10) Endeko yikatholera iyathea-theka ebikendisyakolhwa omughulhu w'embere butsira eribya obuli mug humlhu erikania oko biiriitho eby'omughulhu w'enyuuma. Esyandeko sikatholera isyabya isikaletha omuuhwa butsira eribugh'amani. Esyandeko sy'emiibiiri y'ekanisa sikatholera isyaletha omuuhwa n'eryanza erikolha. Sikathoka erikolha sithya syamabya isy'embembethibirwe ndeke. Ekyilhubirirwa kyasyo kyikatholera ikyabya ily'erithokesya obuli mwiikiirirya "eribya inyanzire erikolera omukama" (I Kor. 15:58). (11) Isihabya erithoya obuuthuuli. Omo kyitswa ky'ekyo, erikubungulha omo mukania iryaholya embere erikolya aho abosi "erithunga bulengekania bughuma n'omuthima mug huma" (IKor. 1:10). Endeko yithathahika okw'ithwamo kyighuma, iyasuubiibwa embeere abiikiirirya bangasyasa ibabirithunga bulengekania bughuma (Emib. 4:32). Eryikiirirania lyanganahiikwako abiikiirirya abosi bamanza eribya ba "bulengekania obusosene", ibanawithe olhwanzo lhu-ghuma, ba kyilhubirirwa kyighumerera, n'omuthima mug huma (Fil. 2:2). Erikaka-kakania omo biikiirirya likaleka esyanzighu syethu isyayisyetha (Esy.

80:6). Kusangwa abiikiiriirya bakabya ng'abasubenko, bangayighunzira erithendihambana lyabu omo malengekania neryo isibendilhwa (Enzuk. 13:8). Banganalendera haghuma omwilhaghana (Amos. 3:3). Enyuumba eyiyigh-abire siyangiimana (Matt. 12:25). Nyamuhanga aponire omundu oyukaletha obwiko omo biikiiriirya (Emis. 6:16, 19). Omo bandu abosi, abikirirya, abali mubiri wa Kristo, omo kwenene bakatholera ibakolerana (I Kor. 12:12,25). (12) Muyitsingirire erihererya obuli mwiikiiriirya olhumimbi olhwangana-kolera omukama. N'omo omubiiri oyo angabya muke bungahi, ni mwatsi mukulhu oko ngebe y'obwikiriirya bw'omundu oyo. (13) Ekyikulhu eky'eribya omo ndeko kyikatholera ikyabya iry'erihiimbiira Nyamuhanga y'enyuumba eya kinya-muliiimu. Abiikiiriirya bakatholera ibabya isibangathunga muuhwa munene omw'ihiimba enyuumba eya kinya-mubiri, kutse kyindi kyindu ek-yikalhangirika omo meso. Obuli buhimbe bukatholera ibwabya ini buhiimbe bw'ekanisa ya kinya-muliiimu. Amakanisa aw'ebisomo angana-hiimba ekyihiimbano ekyinene, niikwa endekatheka ya Nyamuhanga yikahiimba enyuumba eya kinya-muliiimu. Neryo enyuumba y'ekanisa iyanahiimbwa omo mwanya owatholer'eyo. (14) Ekyirengekanio kyikulhu om'obuli ndeko kyikatholera ikyabya ily'eritheka-theka omubiiri hayiima n'erikolha endeka-theka yaghu. Ekanisa eyikathalhuka eritheka-theka, yiyitheka-thekera erithalhuka.

OMUULUUMO

Hano hothwama-hiindira omukania owahambire okwiyyithondeka ly'ekanisa. Bingyi okw'ebi nibya, byanganathendekwa. Biblia yoswire kandi yinahiindene mw'endeka-theka ya Nyamuhanga busana n'ekanisa. Niikwa hali amaha thuthi eky'eryigha ekyi kyikendiletha omuuuhwa ok'obuli oyukasoma inyaayisuunza erilholya embere n'eryigha ebyosi ebyo Biblia yikangiiiriiraya oko ky'eryigha ekyi ekyikulhu. Hali amaha, thuthi eby'eryigha bikendilethera obuli muyiima eriyisuunza erisuubuulya obukristo obw'omo ndaghano nyihya-nyihya. Omo kwenene, ekyi kyanganakolhwa obuli kihandi ky'endeka-theka eyosi eya Nyamuhanga yamakwamwa, kandi omo kwenene Kristo amabya iy'omukama om'obuli mwatsi. Ekanisa y'omukama siyangasuba-subaniibwa hathathabya erisuubasubania omo mithondekere y'ekanisa. Niikwa obw'embembya n'obusondoli eby'omo Kanisa y'omo ndaghano Nyihya-nyihya, eby'olhobire, hamabya eribisubirir'amo, ekanisa y'omughulhu ono iyikendibya omo kwenene. Ekanisa yiri ng'enyuumba eyabirithonwa ndeke erikwamana n'endeka-theka eyiri oko kyibabi. Yesu mwahiimba ekanisa yiwe ngoko alhagha (Matt. 16:18). Niikwa abakangiiriirya b'amabehi

mubathery'ayo omo myanya mingyi (Emib. 20:28-30). Omughulhu ono thuli b'erikolesya endeka-theka iyane nguma (endaghano nyihya-nyihya) n'erikwama ndeke-ndeke obuli kyihandi, ithunalya-subaya enyuumba engumerera eyo ey'omuliiimu. Erisuba-subania endeka-theka ya Nyamuhanga omo mithondekere y'ekanisa, ni kyihandi kyikulhu omwisuubasubania ekyihiimba-no ky'ekanisa. Endeka-theka y'ebiblia yamakwamwa, Nyamuhanga y'omusaki kandi yona muhiimbi. Niikwa esyonzira sy'abandu syamasubiibwa omo kyitswa ekkyo, neryo imukendibani ka amakanisa w'abandu. Biblia yikakunga abandu yithi: “Omwami Mukulhu amathendi hiimba enyuumba, omubiiri w'abahiimbi ini buyira” (Eson. 127:1). Niikwa muyire ng'abikiiriirya, nga amabwe awaliho, thuhiimbe enyuumba eya kinya-mulimu, erihonga ebihongwa bya kinya-mulimu, erikiiriiribwa na Nyamuhanga erilhaba omo Yesu Kristo (I Pet. 2:5).